

宋史

冊三



宋史卷九

元中書右丞相總裁脫脫等修

本紀第九

仁宗一

仁宗體天法道極功全德神文聖武睿哲明孝皇帝諱禎初名受益真宗第六子母李宸妃也大中祥符三年四月十四日生章獻皇后無子取爲己子養之天性仁孝寬裕喜愠不形於色七年封慶國公八年封壽春郡王講學於資善堂天禧元年兼中書令明年進封昇王九月丁卯冊爲皇太子以參知政事李迪兼太子賓客癸酉謁太廟四年詔五日一開資善堂太子秉笏南鄉立聽輔臣參決諸司事乾興元年二月戊午真宗崩遺詔太子卽皇帝位尊皇后爲皇太后權處分軍國事遣使告哀契丹己未大赦除常赦所不原者百官進官一等優賞諸軍山陵諸費毋賦於民庚申命丁謂爲山陵使出遺留物賜近臣宗室主兵官甲子聽政於崇政殿西廡乙丑以生日爲乾元節丙寅遣使以先帝

宋史卷九

元中書右丞相總裁脫脫等修

本紀第九

仁宗一

仁宗體天法道極功全德神文聖武睿哲明孝皇帝諱禎初名受益真宗第六子母李宸妃也大中祥符三年四月十四日生章獻皇后無子取爲己子養之天性仁孝寬裕喜愠不形於色七年封慶國公八年封壽春郡王講學於資善堂天禧元年兼中書令明年進封昇王九月丁卯冊爲皇太子以參知政事李迪兼太子賓客癸酉謁太廟四年詔五日一開資善堂太子秉笏南鄉立聽輔臣參決諸司事乾興元年二月戊午真宗崩遺詔太子卽皇帝位尊皇后爲皇太后權處分軍國事遣使告哀契丹己未大赦除常赦所不原者百官進官一等優賞諸軍山陵諸費毋賦於民庚申命丁謂爲山陵使出遺留物賜近臣宗室主兵官甲子聽政於崇政殿西廡乙丑以生日爲乾元節丙寅遣使以先帝

宗廟社稷癸酉上謚冊於延慶殿己卯命以天書從葬冬十月壬寅契丹使來賀卽位己酉葬真宗皇帝於永定陵詔中外避皇太后父諱己未祔真宗神主於太廟廟樂曰大明之舞以莊穆皇后配辛酉降東西京囚罪一等杖以下釋之蠲山陵役戶及靈駕所過民田租十一月丁卯朔錢惟演罷甲戌唵廝囉立遵求內附乙亥以皇太后生日爲長寧節辛巳初御崇政殿西閣講筵命侍講孫奭馮元講論語壬午以張知白爲樞密副使十二月壬戌契丹使來賀明年正旦是歲蘇州水滄州海潮溢詔振卹被水及溺死之家南平王李公蘊遣使進貢

天聖元年春正月丙寅朔改元庚午契丹使初來賀長寧節癸未命三司節浮費遂立計置司戊子以京東淮南水災遣使安撫辛卯發卒增築京城二月戊戌許唵廝囉歲一入貢丁巳奉安太祖太宗御容於南京鴻慶宮壬戌減諸節齋醮道場三月甲戌奉安真宗御容於西京應天院丙子詔減西京囚罪一等徒以下釋之賜城中民八十以上者茶帛仍復其家甲申詔自今營造三司度

實給用辛卯司天監上崇天曆行淮南十三山場貼射茶法夏四月辛丑罷禮儀院丁未乾元節百官及契丹使初上壽於崇德殿癸丑詔文武官奏蔭親屬從本資丁巳詔近臣舉諫官御史各一人五月甲子行陝西河北入中芻糧見錢法庚午詔禮部貢舉辛未錄繫囚甲戌命魯宗道按視滑州決河庚寅議皇太后儀衛制同乘輿六月甲辰罷江寧府溧水縣采丹砂乙卯禁毀錢鑄鐘秋七月壬申除戎瀘州虛估稅錢詔職田遇水旱蠲租如例辛巳蠲天下逋負八月乙未募民輸芟塞滑州決河丙申下德音減天下囚罪一等杖以下釋之廢鄆州東平馬監以牧地賦民甲寅芝生天安殿柱九月丙寅馮拯罷以王欽若爲門下侍郎同中書門下平章事昭文館大學士辛巳詔凡舉官未改轉而坐贓者舉主免劾庚寅宴崇德殿閏月甲午詔裁造院女工及營婦配南北作坊者並釋之戊戌寇準卒於雷州己亥馮拯卒丁未禁彭州九隴縣采金丁巳禁伎術官求輔臣宗室薦舉冬十月辛酉朔徙陝西緣邊軍馬屯內地十一月丁酉詔諸州配囚錄具獄與地里上尙書刑部詳覆禁兩浙江南荆湖福建廣南

路巫覡挾邪術害人者戊午置益州交子務是歲甘沙州來貢涇原咩迷卜杏
家族納質內附

二年春二月庚午遣內臣收瘞汴口流屍仍祭奠之三月丁酉奉安真宗御容
于景靈宮奉真殿癸卯王欽若上真宗實錄是月賜禮部奏名進士諸科及第
出身四百八十五人夏四月辛酉詔三司歲市紬絹非土產者罷之乙酉錄晉
石氏後五月乙未錄繫囚六月壬申罷天慶天祺天貺先天降聖節宮觀然燈
秋七月癸丑奉安真宗御容於玉清昭應宮安聖殿八月丙辰朔宴崇德殿初
用樂之半詔舉官已遷改而貪汙者舉主以狀聞聞而不以實者坐之己卯幸
國子監謁孔子遂幸武成王廟甲申太白入太微垣九月辛卯祠太一宮賜道
左耕者茶帛冬十月丙辰奉安真宗御容於洪福院十一月甲午加上真宗諡
乙未朝饗玉清昭應景靈宮丙申饗太廟丁酉祠天地於圜丘大赦百官上尊
號曰聖文睿武仁明孝德皇帝上皇太后尊號曰應元崇德仁壽慈聖皇太后
賜百官諸軍加等乙巳立皇后郭氏辛亥加恩百官十二月庚午詔開封府每

歲正旦冬至禁刑三日是歲龜茲甘肅來貢

三年春正月辛卯長寧節近臣及契丹使初上皇太后壽於崇政殿二月戊寅詔陝西災傷州軍盜廩穀傷主者刺配隣州牢城徒減一等夏四月丁丑詔三館繕書藏太清樓五月庚寅錄繫囚癸巳幸御莊觀刈麥聞民舍機杼聲賜織婦茶帛己亥賜隱士林逋粟帛己酉禁臣僚奏薦無服子弟六月壬戌太白晝見癸酉環原州屬羌叛寇邊環慶都監趙士隆等死之遣使者安撫陝西秋七月戊子詔諸路轉運使察舉知州通判不任事者丙午詔邊戶爲羌所擾者蠲租復役二年八月戊午以忠州鹽井歲增課夔州奉節巫山縣舊籍民爲營田萬州戶有稅者歲糴其穀皆爲民害詔悉除之辛未蠲陝西州軍旱災租賦九月乙巳詔司天監奏災異據占書以聞冬十月乙未太白犯南斗辛酉晏殊爲樞密副使十一月己卯朔罷貼射茶法辛卯以襄州水蠲民租晉絳陝解州饑發粟振之戊申王欽若卒十二月癸丑王曾爲門下侍郎昭文館大學士張知白同中書門下平章事集賢殿大學士乙丑張旻爲樞密使戊寅太白晝見是

歲龜茲甘州于闐來貢環慶蕃部嵬逋等內附補涇原降羌首領潘征爲大將
軍主

四年春正月己亥命張得象與流內銓同試百司人庚子涇原兵破康奴族二
月甲寅詔吏犯贓至流按察官失舉者併劾之庚午置西界和市場三月甲申
詔轉運使提點刑獄罷勸農司己亥鄜延蕃部首領曹守貴等內附夏四月壬
子詔京東西河北淮南平穀價五月己卯詔禮部貢舉壬午詔大辟疑者奏讞
有司毋輒舉駁戊子錄繫囚己亥詔士有文而行不副者州郡毋得薦送閏月
戊申減江淮歲漕米五十萬石除舒州太湖等九茶場民逋錢十三萬緡己酉
詔補太廟室長齋郎辛亥復陝西永豐渠以通解鹽六月丁亥建劍邵武等州
軍大水詔賜被災家米二石溺死者官瘞之庚寅大雨震電京師平地水數尺
辛卯避正殿減常膳丁酉降天下囚罪一等徒以下釋之畿內京東西淮南河
北被水民田蠲其租癸卯詔官物漂失主典免償流徙者所在撫存之秋七月
戊申御長春殿復常膳辛未減兩川歲輸錦綺易綾紗爲絹以給邊費壬申詔

諸路轉運使舉所部官通經術者八月丁亥築泰州捍海堰己丑詔施州溪峒首領三年一至京師九月乙卯詔孫奭馮元舉京朝官通經術者庚申詔禮部貢院諸科通三經者薦擢之錄周世宗從孫柴元亨爲三班奉職辛未廢襄唐州營田務以田賦民冬十月甲戌朔日有食之壬辰詔郎中以上致仕賜一子官甲午昏霧四塞丙申奉安真宗御容於鴻慶宮十二月丁丑發米六十萬斛貸畿內饑丁亥帝白太后欲元日先上太后壽乃受朝太后不可王曾奏曰陛下以孝奉母儀太后以謙全國體請如太后令

五年春正月壬寅朔初率百官上皇太后壽於會慶殿遂御天安殿受朝己未晏殊罷戊辰以夏竦爲樞密副使二月癸酉命呂夷簡夏竦修先朝國史王曾提舉丙子詔振京東流民丁丑西域僧法吉祥等來獻梵書三月戊申賜禮部奏名進士諸科及第出身一千七十六人秦州地震罷瓊州歲貢瑋瑁龜皮紫貝夏四月壬辰壽寧觀火五月庚子朔詔武臣子孫習文藝者聽奏文資壬寅太白晝見丙午閱諸班騎射辛亥錄繫囚辛酉命呂夷簡等詳定編敕癸亥楚

王元佐薨是月京畿旱磁州蟲食桑六月甲戌禱雨於玉清昭應宮開寶寺丙子詔決畿內繫囚丁丑雨癸未罷諸營造之不急者秋七月己亥朔振秦州水災賜被溺家錢米丙辰發丁夫三萬八千卒二萬一千緡錢五十萬塞滑州決河詔察京東被災縣吏不職者以聞九月庚戌閱龍衛神勇軍習戰冬十月辛未罷陝西青苗錢癸酉奉安真宗御容於慈孝寺崇真殿己丑頒新定五服敕甲午同皇太后幸御書院觀太宗真宗御書乙未詔西州廣南在官物故者遣人護送其家屬還鄉官爲給食丙申滑州言河平十一月丁酉朔以陝西旱蝗減其民租賦庚子遣使河北體量安撫壬寅復作指南車辛亥朝饗景靈宮壬子饗太廟癸丑祀天地於圜丘大赦賀皇太后於會慶殿丁巳恭謝玉清昭應宮十二月辛未加恩百官甲戌詔輔臣南郊恩例外更改一子官丁亥詔百官宗室受賂冒爲親屬奏官者毋赦是歲甘州及南平國王李公蘊遣人來貢京兆府邢洛州蝗華州旱蚘蚘蟲食苗

六年春正月己酉罷兩川乾元節歲貢織佛戊午罷提點刑獄二月庚辰大風

晝晦壬午張知白薨三月丙申朔日有食之壬子以張士遜同中書門下平章事集賢殿大學士癸丑以姜遵爲樞密副使己未以范雍爲樞密副使壬戌作西太一宮夏四月戊辰詔審官三班院吏部流內銓軍頭司各引對所理公事自帝爲皇太子輔臣參決諸司事於資善堂至是始還有司丁丑貸河北流民復業者種食復是年租賦癸未命官減三司歲調上供物甲申旦有星大如斗月北流至西南光燭地有聲如雷庚寅下德音以星變齋居不視事五月降畿內囚死罪流以下釋之罷諸土木工振河北流民過京師者五月乙未朔交阯寇邊六月丙寅罷戎瀘諸州穀稅錢秋七月壬子江寧府楊真潤州江水溢壞官民廬舍遣使安撫振卹八月乙丑詔免河北水災州軍秋稅乙亥河決澶州王楚埽丙戌錄唐張九齡後九月己亥詔令京朝官任內五人同罪奏舉者減一任癸卯祠西太一宮甲辰詔河北災傷民質桑土與人者悉歸之候歲豐償所貸乙巳遣使修諸路兵械冬十月甲申除福州民逋官莊錢十二萬八千緡十一月戊午京西言穀斗十錢十二月癸亥祠西太一宮是歲甘州三佛齊來

貢

七年春正月癸卯曹利用罷丙辰降利用爲左千牛衛上將軍二月庚申朔魯宗道卒甲子詔文臣歷邊有材勇武臣之子有節義者與換官三路任使丙辰張士遜罷以呂夷簡同中書門下平章事集賢殿大學士丁卯以夏竦薛奎參知政事陳堯佐爲樞密副使癸酉貶曹利用爲崇信軍節度副使房州安置未至自殺乙酉以河北水災委轉運使察官吏不任職者易之癸巳募民入粟以振河北閏月戊申禁京城剝造寺觀壬子復制舉六科增高蹈邱園沉淪草澤茂才異等科置書判拔萃科及試武舉癸酉置理檢使以御史中丞爲之三月乙丑詔吏胥受賕毋用蔭辛巳詔契丹饑民所過給米分送唐鄧等州以間田處之癸未詔百官轉對極言時政闕失在外者實封以聞夏四月庚寅赦天下免河北被水民租賦辛卯南平王李公蘊卒其子德政遣人來告以爲交趾郡王五月乙未朔詔禮部貢舉庚申詔戒文弊己巳頒新令庚午詔先朝文武官自刺史少卿監以上並錄其後癸酉錄繫囚庚辰御承明殿臣僚請對者十九

人日昃乃罷六月壬辰置益梓廣南路轉運判官丁未大雷雨玉清昭應宮災
甲寅王曾罷秋七月癸亥以玉清昭應宮災遣官告諸陵詔天下不復繕修乙
亥詔殿直以上毋得換文資乙酉罷諸宮觀使八月丁亥朔日有食之詔罷天
下職田官收其入以所直均給之己丑以呂夷簡爲昭文館大學士辛卯夏竦
復爲樞密副使陳堯佐王曙並參知政事己亥詔命官犯正入贓毋使親民冬
十月壬寅閱虎翼武騎卒習戰丙午京師地震詔知州軍歲舉判司簿尉可縣
令者一人十一月癸亥冬至率百官上皇太后壽于會慶殿遂御天安殿受朝
庚午詔天下孤獨疾病者致醫藥存視詔周世宗後凡經郊祀錄其子孫一人
是歲河北水遣使決囚振貧瘞溺死者給其家緡錢察官吏貪暴不恤民者龜
茲下溪州黔州蠻來貢

八年春正月甲戌曹瑋卒辛巳作會聖宮於西京永安縣二月戊子詔五代時
官三品以上告身存者子孫聽用蔭三月壬申幸後苑遂宴太清樓乙亥禁以
財冒士族娶宗室女者詔河北被水州縣毋稅牛是月賜禮部奏名進士諸科

及第出身八百二十二人五月甲寅賜信州龍虎山張乾曜號澄素先生丙辰大雨雹辛酉錄繫囚六月癸巳呂夷簡上新修國史己亥詔御史臺獄勿關糾察司乙巳親試書判拔萃科及武舉人秋七月丙子策制舉人八月丙戌詔詳定鹽法丁亥詔近臣宗室觀祖宗御書於龍圖天章閣又觀瑞穀於元真殿遂宴藥珠殿戊子詔流配人道死者其妻子給食送還鄉里九月癸丑復置諸路提點刑獄官丙辰罷轉對乙丑姜遵卒己巳以趙稹爲樞密副使冬十月壬辰奉安太祖御容於太平興國寺開先殿丙申弛三京河中府潁許汝鄭鄆濟衛晉絳號亳宿等二十八州軍鹽禁壬寅置天章閣待制十一月丙寅朝饗景靈宮丁卯饗太廟戊辰祀天地於圜丘大赦賀皇太后於會慶殿十二月癸未加恩百官辛丑西平王趙德明交趾王李德政並加賜功臣是歲高麗占城邛部川都蠻來貢

九年春正月辛亥詔諸路轉運判官員外郎以上遇郊聽任子弟丙辰長寧節百官初上皇太后壽於會慶殿辛未減畿內民租二月癸巳詔復郡縣職田三

月甲寅奉安太祖太宗真宗御容於會聖宮夏四月戊寅詔以隴州論平民五人爲劫盜抵死主者雖更赦並從重罰乙巳闕大樂五月乙丑錄繫囚六月庚辰宋綬上皇太后儀制秋七月丙午朔契丹使來告其主隆緒殂遣使祭奠弔慰及賀宗真立九月癸亥祠西太一宮賜道左耕者茶帛冬十月丙戌詔公卿大夫勵名節乙未詔常參官已授外任毋得奏舉選人辛丑罷益梓廣南路轉運判官閏月戊辰翰林侍讀學士孫奭請老命知兗州曲宴太清樓送之十一月丁亥弛兩川礮禁己丑祈雪於會靈觀丁酉出知雜御史曹修古御史郭勸楊偕推直官段少連十二月甲寅詔吏部銓選人父母年八十以上者權注近官辛酉大風三日是歲契丹主及其國母遣使來致遺留物及謝弔祭南平王李德政遣人謝加恩龜茲沙州來貢女真晏端等百八十四人內附

宋史卷十

元中書右丞相總裁脫等修

本紀第十

仁宗二

明道元年春二月癸卯呂夷簡上三朝寶訓丙午詔仕廣南者毋過兩任以防貪黷庚戌以張士遜同中書門下平章事集賢殿大學士戊午錄故宰臣孫並試將作監主簿甲子詔員外郎以上致仕者錄其子校書郎三丞以上齋郎丁卯以真宗順容李氏爲宸妃是日妃薨三月戊子頒天聖編敕戊戌以江淮旱遣使與長吏錄繫囚流以下減一等杖笞釋之己亥除婺秀州丁身錢夏四月丙午錄繫囚戊午知棣州王涉坐冒請官地爲職田配廣南牢城五月癸酉遣使點檢河北城池器甲密訪官吏能否壬午廢杭秀二州鹽場秋七月丙申詔諸路轉運使舉國子監講官丁酉王曙罷太白晝見彌月乃減八月辛丑以晏殊爲樞密副使丙午晏殊參知政事甲寅以楊崇勳爲樞密副使辛酉授喚廝

羅爲寧遠大將軍愛州團練使壬戌大內火延入殿癸亥移御延福宮甲子以
呂夷簡爲修內使乙丑詔羣臣直言闕失丁卯大赦九月庚寅重作受命寶丙
申皇太后出金銀器易左藏緡錢二十萬以助修內冬十月庚子黃白氣五貫
紫微垣丁巳詔漢陽軍發廩粟以振飢民十一月甲戌以修內成恭謝天地於
大安殿謁太廟大赦改元百官進秩優賞諸軍是日還宮己卯冬至率百官賀
皇太后於文德殿御大安殿受朝壬辰延州言夏王趙德明卒癸巳以德明子
元昊爲定難軍節度使西平王十二月壬寅以楊崇勳爲樞密使戊午詔獲劫
盜者奏裁毋擅殺壬戌西北有蒼白氣亘天是歲京東淮南江東饑
二年春正月己卯詔發運使以上供米百萬斛振江淮饑民遣使督視二月戊
戌舍譽星見東北方庚子詔江淮民饑死者官爲之葬祭乙巳皇太后服袞衣
儀天冠饗太廟皇太妃亞獻皇后終獻是日上皇太后尊號曰應元齊聖顯功
崇德慈仁保壽皇太后丁未祀先農於東郊躬耕藉田大赦百官上尊號曰睿
聖文武體天法道仁明孝德皇帝三月庚午加恩百官丁亥祈雨於會靈觀上

清宮景德開寶寺庚寅以皇太后不豫大赦除常赦所不原者乾興以來貶死者復官謫者內徙甲午皇太后崩遺詔尊皇太妃爲皇太后呂夷簡爲山陵使夏四月丙申朔出大行皇太后遺留物賜近臣壬寅追尊宸妃李氏爲皇太后至是帝始知爲宸妃所生甲辰以大行皇太后五使竝兼追尊皇太后園陵使戊申聽政於崇政殿西廂己酉罷乾元節上壽壬子詔臣僚宗戚命婦毋得以進獻祈恩澤及緣親戚通表章罷創修寺觀帝始親政裁抑僥倖中外大悅癸丑召還宋綬范仲淹丙辰內侍江德明等竝坐交通請謁黜己未呂夷簡張者夏竦陳堯佐范雍趙稹晏殊皆罷以張士遜爲昭文館大學士李迪同中書門下平章事集賢殿大學士王隨參知政事李諮爲樞密副使王德用僉書樞密院事壬戌御紫宸殿以張士遜爲山陵使兼園陵使癸亥上大行太后諡曰莊獻明肅追尊宸妃李氏爲皇太后諡曰莊懿五月戊辰詔禮部貢舉癸酉詔中外勿輒言皇太后垂簾日事乙亥罷羣牧制置使丙子命宰臣張士遜撰謝太廟及躬耕藉田記檢討宋祁言皇太后謁廟非後世法乃止撰藉田記戊寅錄

繫囚六月甲午朔日有食之壬寅錄周世宗及高季興李煜孟昶劉繼元劉鋹
後癸卯命審刑大理詳定配隸刑名戊午減天下歲貢物秋七月丁丑詔知耀
州富平縣事張龜年增秩再任以其治行風告天下戊子詔以蝗旱去尊號睿
聖文武四字以告天地宗廟仍令中外直言闕政八月甲午朔契丹使來弔慰
祭奠壬寅作奉慈廟甲辰詔中外毋避莊獻明肅太后父諱丁巳置端明殿學
士九月甲戌幸法福院臨莊懿太后梓宮丙子壬午臨如之冬十月癸巳朔太
白犯南斗甲午禁登州民采金丁酉祔葬莊肅明獻皇太后莊懿皇太后於永
定陵甲辰詔以兩川歲貢綾錦羅綺紗以三之二易爲紬絹供軍須己酉祔莊
獻明肅太后莊懿太后神主於奉慈廟癸丑下德音降東西京囚罪一等徒以
下釋之緣二太后陵應奉民戶免租賦科役有差丙辰贈周王祐爲皇太子戊
午張士遜楊崇勳罷以呂夷簡爲門下侍郎同中書門下平章事昭文館大學
士王曙爲樞密使王德用爲樞密副使宋綬參知政事蔡齊爲樞密副使十一
月癸亥朔薛奎罷詔增宗室奉太白犯南斗乙丑追冊美人張氏爲皇后甲戌

贈寇準爲中書令十二月丙申復置提點刑獄丁酉詔諸路轉運使副歲徧歷所部仍令州軍具所至月日以聞甲辰以京東饑出內藏絹二十萬代其民歲輸乙巳詔修周廟丁未詔臺官非中丞知雜保薦者勿任戊申出宮人二百乙卯廢皇后郭氏爲淨妃玉京沖妙仙師居長寧宮御史中丞孔道輔率諫官御史大呼殿門請對詔宰相告以皇后當廢狀丙辰出道輔及諫官范仲淹仍詔臺諫自今毋相率請對丁巳詔明年改元禁邊臣增置堡砦是歲畿內京東西河北河東陝西蝗淮南江東兩川饑遣使安撫除民租注輦國來貢

景祐元年春正月甲子發江淮漕米振京東饑民丙寅詔開封府界諸縣作糜粥以濟饑民諸災傷州軍亦如之戊辰詔三司鑄景祐元寶錢甲戌詔執政大臣議兵農可更制者以聞詔募民掘蝗種給菽米癸未詔禮部所試舉人十取其二進士三舉諸科五舉嘗經殿試進士五舉年五十諸科六舉年六十及曾經先朝御試者皆以名聞甲申淮南饑出內藏絹二十萬代其民歲輸丁亥置崇政殿說書庚寅詔停淮南上供一年二月乙未罷書判拔萃科辛丑詔禮部

貢院諸科舉人七舉者不限年並許特奏名甲辰權減江淮漕米二百萬石戊申詔麟府州振蕃漢饑民三月壬午免諸路災傷州軍今年夏稅癸未詔解州畦戶逋鹽蠲其半是月賜禮部奏名進士諸科及第出身七百八十三人夏四月丁酉開封府判官龐籍言尙美人遣內侍稱教旨免工人市租帝爲杖內侍仍詔有司自今宮中傳命毋得輒受癸丑詔置殿中侍御史監察御史裏行五月辛酉出布十萬端易錢糴河北軍儲丁卯禁民間織錦刺繡爲服飾西川歲織錦上供亦罷之癸酉詔臺諫未曾歷郡守者與郡壬午錄繫囚是月契丹主宗真之母還政於子出居慶陵六月壬辰交州民六百餘人內附庚子免畿內被災民稅之半己酉策制舉武舉人乙卯詔州縣官非理科決罪人至死者竝奏聽裁閏月甲子泗州淮汴溢己巳常州無錫縣大風發屋乙亥毀天下無額寺院壬午罷造玳瑁龜筒器秋七月丙申賜壽州下蔡縣被溺之家錢有差己亥樞密使王曙加同平章事辛丑詔文武提刑毋得互相薦論壬子詔轉運使與長吏舉所部官專領常平倉粟甲寅河決澶州橫隴埽八月庚申薛奎卒壬

戊有星孛於張翼癸亥王曙卒甲子月犯南斗戊辰帝不豫庚子以王曾爲樞密使辛未以星變大赦避正殿減常膳輔臣奏事延和殿閣壬辰詔淨妃郭氏出居於外美人尙氏入道楊氏安置別宅九月壬辰百官請隻日御前殿如先帝故事詔可丁酉帝康復御正殿復常膳甲辰詔立皇后曹氏丙午熒惑犯南斗冬十月庚申罷淮南江浙荆湖制置發運使詔淮南轉運兼發運事乙亥作郊廟景安輿安祐安之曲十一月己丑冊曹氏爲皇后癸丑作大安之曲以饗聖祖十二月癸酉賜西平王趙元昊佛經是歲南平王李德政獻馴象二詔還之開封府淄州蝗

二年春正月癸丑置邇英延義二閣寫尙書無逸篇於屏二月戊午御延福宮觀大樂癸亥舊給事資善堂者皆推恩戊辰李迪罷以王曾爲門下侍郎同中書門下平章事集賢殿大學士王隨李諮知樞密院事蔡齊盛度參知政事王德用韓億同知樞密院事三月戊申出內庫珠賜三司以助經費夏四月庚午詔天下有知樂者所在薦聞五月甲午獠僚寇雷化州詔桂廣會兵討之丙申

錄繫囚庚子議太祖太宗真宗廟並萬世不遷南郊升侑上帝以太祖定配二宗迭配丙午降天下繫囚罪一等杖以下釋之丁未廣西言鎮寧州蠻入寇六月丁巳詔募職官初任未成考毋薦乙亥頒一司一務及在京敕鎮寧蠻請降秋七月戊申廢西京採柴務以山林賦民官取十之一八月壬子朔詔輕強盜法甲寅宴紫宸殿初用樂甲戌幸安肅門砲場閱習戰己卯置提點刑獄鑄錢官九月壬寅按新樂己酉作睦親宅命中丞杜衍等汰三司胥吏宋綬上中書總例冬十月辛亥朔復置朝集院癸亥復羣牧制置使丁卯詔諸路歲輸緡錢福建二廣易以銀江東以帛庚午熒惑犯左執法十一月戊子廢后郭氏薨癸巳朝饗景靈宮甲午饗太廟奉慈廟乙未祀天地於圜丘大赦錄五代及諸國後宗室任諸司使以下至殿直者換西班牙官百官上尊號曰景祐體天法道欽文聰武聖神孝德皇帝丁未加恩百官十二月壬子加唵廝囉爲保順軍留後丙子詔長吏能導民修水利闢荒田者賞之是歲以鎮戎軍荐饑貸弓箭手粟麥六萬石

三年春正月壬辰追復郭氏爲皇后丁酉葬皇后郭氏二月丙辰命官較太常鐘律壬戌詔兩制禮官詳定京師士民服用居室之制甲子以廣南兵民苦瘴毒爲置醫藥丁卯修陝西三白渠三月癸巳復商賈以見錢算請官茶法乙未觀新定鐘律戊戌詔兩省卿監刺史閣門以上致仕給奉如分司官長吏歲時勞賜之改維州爲威州夏五月庚辰購求館閣逸書丙申錄繫囚丙戌天章閣待制范仲淹坐譏刺大臣落職知饒州集賢校理余靖館閣校勘尹洙歐陽修竝落職補外詔戒百官越職言事六月壬申虔吉州水溢壞城郭廬舍賜被溺家錢有差秋七月丁亥禁民間私寫編敕刑書乙未置大宗正司庚子大雨震甯太平興國寺災辛丑降三京罪囚一等徒以下釋之八月己酉班民間冠服居室車馬器用犯制之禁乙卯月犯南斗九月庚辰幸睦親宅宴宗室癸巳熒惑犯南斗是月定申心喪解官法冬十月丁未命章得象等考課諸路提刑甲寅作朝集院十一月戊寅保慶皇太后楊氏崩辛卯上保慶太后諡曰莊惠十二月丙寅李諮卒丁卯王德用知樞密院事章得象同知樞密院事是歲南平

王李德政西南蕃來貢南丹州莫淮戟內附

四年春正月壬午詔均諸州解額二月己酉葬莊惠皇后於永定陵己未祔神主於奉慈廟庚申德音降東西京及靈駕所過州縣囚罪一等徒以下釋之乙丑置赤帝像於宮中祈嗣三月甲戌置天章閣侍講戊寅詔禮部貢舉夏四月乙巳呂夷簡上景祐法寶新錄甲子呂夷簡王曾宋綬蔡齊罷以王隨爲門下侍郎同中書門下平章事昭文館大學士陳堯佐同中書門下平章事集賢殿大學士盛度知樞密院事韓億程琳石中立參知政事王巖同知樞密院事五月庚戌皇子生錄繫囚降死罪一等流以下釋之是日皇子薨乙卯以旱遣使決三京繫囚丙寅芝生化成殿楹六月乙亥杭州江潮壞隄遣使致祭戊子出神武祕略賜邊臣己丑奉安太祖御容於揚州建隆寺秋七月丁未詔河東河北州郡密嚴邊備戊申有星數百西南流至壁東大者其光燭地黑氣長丈餘出畢宿下八月甲戌越州水賜被溺民家錢有差甲午詔三司轉運司毋借常平錢穀冬十一月癸亥罷登萊買金場十二月甲申并代忻州竝言地震吏民

壓死者三萬二千三百六人傷五千六百人畜擾死者五萬餘遣使撫存其民
賜死傷之家錢有差是歲滑州民蠶成被長二丈五尺喙廝羅龜茲沙州來貢
寶元元年春正月甲辰雷丙辰以地震及雷發不時詔轉運使提舉刑獄按所
部官吏除并代忻州壓死民家去年秋糧二月壬申詔復日御前殿甲午安化
蠻寇宜融州三月戊戌朔王隨陳堯佐韓億石中立罷以張士遜爲門下侍郎
同中書門下平章事昭文館大學士章得象同中書門下平章事集賢殿大學
士王驥李若谷並參知政事王博文陳執中同知樞密院事己亥發邵澧潭三
州駐泊兵討安化州蠻是月賜禮部奏名進士諸科及第出身七百二十四人
夏四月癸酉王博文卒乙亥以張觀同知樞密院事壬辰除宜融州夏稅五月
乙巳錄繫囚六月戊寅罷舉童子己卯建州大水壞民廬舍賜死傷家錢有差
其無主者官葬祭之甲申詔天下諸州月上雨雪狀秋七月壬戌策制舉人癸
亥策武舉人八月丁卯復淮南江浙荆湖制置發運使庚辰熒惑犯南斗九月
戊申詔應祀事已受誓戒而失虔恭者毋以赦原賜宜融州討蠻兵緡錢冬十

月丙寅詔戒百官朋黨十一月甲辰詔廣西鈐轄進兵討安化蠻乙巳詔宜融州民嘗從軍役者免今夏稅運糧者免其半戊申朝饗景靈宮己酉饗太廟及奉慈廟庚戌祀天地於園丘大赦改元百官上尊號曰寶元體天法道欽文聰武聖神孝德皇帝乙卯復奏舉縣令法王曾鼐十二月癸亥朔加恩百官甲子京師地震丙寅鄜延路言趙元昊反甲戌禁邊人與元昊互市己卯奉寧軍節度使知永興軍夏竦兼涇原秦鳳路安撫使振武軍節度使知延州范雍兼鄜延環慶路安撫使是歲達州大水黎州蠻來貢

二年春正月己酉王隨卒辛亥安化蠻平癸丑趙元昊表請稱帝改元三月丁未鑄皇宋通寶錢乙卯閱試衛士戊午賜陝西緣邊軍士緡錢夏四月癸亥授唃廝囉二子瞎斡磨角斡團練使乙丑放宮女二百七十人壬申免昭州運糧死蠻寇者家徭二年賦租一年丁亥募河東陝西民入粟實邊五月癸巳詔近臣舉方略材武之士各二人己亥禁皇族及諸命婦女冠尼等非時入內癸卯命近臣同三司議節省浮費丙午遣使體量安撫陝西河東己酉錄繫囚壬子

王德用罷以夏守贛知樞密院事六月壬戌詔省浮費自乘輿服御及宮掖所須宜從簡約若吏兵祿賜毋概行裁減戊辰詔諸致仕官嘗犯賊者毋推恩子孫丁丑益州火焚廬舍三千餘區壬午削趙元昊官爵除屬籍秋七月丁巳詔宗室遇南郊及乾元節恩許官一子餘五歲授官戊午以夏竦知涇州兼涇原秦鳳路沿邊經略安撫使涇原路馬步軍都總管范雍兼鄜延環慶路沿邊經略安撫使鄜延路馬步軍都總管八月丁卯以篳篥城唃廝波補本族軍主甲戌皇子生丙子降三京囚罪一等徒以下釋之辛巳命輔臣報祠高禔九月壬寅詔河北轉運使兼都大制置營田屯田事乙卯出內庫銀四萬兩易粟振益梓利夔路饑民十月庚午賜麟府州及川陝軍士緡錢甲申詔兩川饑民出劍門關者勿禁十一月戊子朔出內庫珠易緡錢三十萬糴邊儲丁酉盛度程琳罷出御史中丞孔道輔壬寅以王巖知樞密院事宋庠參知政事十二月庚申詔審刑院大理寺刑部毋通賓客壬申詔御史闕員朕自擇舉是歲曹濮單州

蝗

宋

史

卷十

本紀

七

中華書局聚

康定元年春正月丙辰朔日有食之壬戌賜國子監學田五十頃是月元昊寇延州執鄜延環慶兩路副都總管劉平鄜延副都總管石元孫詔陝西運使明鎬募強壯備邊二月丁亥以夏守贄爲宣徽南院使陝西馬步軍都總管經略安撫使詔潼關設備辛卯月太白俱犯昴壬辰夏守贄兼沿邊招討使出內藏緡錢十萬賜戍邊禁兵之家知制誥韓琦安撫陝西白氣如繩貫日甲午括畿內京東西淮南陝西馬丙申詔諸路轉運使提刑訪知邊事者以聞丁酉詔樞密院同宰臣議邊事辛丑出內藏緡錢八十萬陝西市糴軍儲丙午德音釋延州保安軍流以下罪寇所攻掠地除今夏稅戍兵及戰死者賜其家緡錢是日改元去尊號寶元字許中外臣庶上封章言事丁未詔陝西量民力蠲所科芻糧癸丑降范雍爲尙書吏部侍郎知安州甲寅出內庫珠償民馬直三月丙辰詔大臣條陝西攻守策癸亥命韓琦治陝西城池乙丑閱虎翼軍習戰辛未詔延州錄戰沒軍士子孫月給糧丙子大風晝暝是夜有黑氣長數丈見東南丁丑罷大宴詔中外言闕政戊寅王黼陳執中張觀罷以晏殊宋綬知樞密院事

王貽永同知樞密院事詔按察官舉才堪將帥者庚辰詔參知政事同議邊事
辛巳德音降天下囚罪一等徒以下釋之賜京師河北陝西河東諸軍緡錢蠲
陝西夏稅十之二減河東所科粟夏四月丙戌省陝西沿邊堡砦癸巳詔諸戍
邊軍月遣內侍存問其家病致醫藥死爲斂葬之甲午遣使籍陝西強壯軍乙
未契丹國母復遣使來賀乾元節乙巳增補河北強壯軍丙午鄜延路兵馬都
監黃德和坐棄軍要斬丁未贈劉平石元孫官錄其子孫辛亥築延州金明砦
砦砦五月甲寅朔詔前殿奏事毋過五班餘對後殿命大官賜食壬戌張士遜
致事呂夷簡爲門下侍郎同中書門下平章事昭文館大學士癸酉詔夏守贊
進屯鄜州戊寅以夏竦爲陝西馬步軍都總管兼招討使是月元昊陷塞門砦
兵馬監押王繼元死之又陷安遠砦六月丙戌詔假日御崇政殿視事如前殿
丁亥以夏守贊同知樞密院事甲午降三京囚罪一等徒以下釋之乙未南京
鴻慶宮神御殿火壬寅遣使體量安撫京東西甲辰增置陝西河北河東京東
西弓手秋七月乙丑遣使以討元昊告契丹庚午閱諸軍習戰戊寅皇子昕爲

忠正軍節度使封壽國公八月戊戌禁以金箔飾佛像癸卯遣尙書屯田員外郎劉渙使邈川戊申夏守贛罷以杜衍同知樞密院事辛亥詔范仲淹葛懷敏領兵驅逐塞門等砦蕃騎出境仍募弓箭手給地居之九月甲寅滑州河溢戊午李若谷罷以宋綬晁宗慤參知政事鄭戩同知樞密院事戊辰以晏殊爲樞密使王貽永杜衍鄭戩並樞密副使甲戌詔使臣諸班諸軍有武藝者自陳辛巳閱諸軍習戰是月元昊寇三川砦都巡檢楊保吉死之又圍師子定川堡戰士死者五千餘人遂陷乾溝乾河趙福三堡環慶路兵馬副都總管任福破白豹城冬十月乙未製銅木契傳信牌甲辰錄方略士六十一人授官有差十一月壬戌有大星流西南聲如雷者三十二月癸未出內藏庫絹一百萬助糴軍儲詔南京祠大火丙戌詔以常平緡錢助糴軍儲癸卯宋綬卒戊申鑄當十錢權助邊費

宋史卷十一

元中書右丞相吳總裁脫脫一等修

本紀第十一

仁宗三

慶曆元年春正月辛亥朔御大慶殿受朝己未加喚廝囉河西節度使壬申詔歲以春分祠高禩是月元昊請和二月己亥壽國公昕薨辛亥罷大宴京東西淮浙江南荆湖置宣毅軍甲辰詔臣僚受外任者毋得因臨遣祈恩丙午京師雨藥是月元昊寇渭州環慶路馬步軍副總管任福敗於好水川福及將佐軍士死者六千餘人三月庚戌朔修金隄乙卯詔止郡國舉人勿以邊機爲名希求恩澤夏四月甲申以資政殿學士陳執中同陝西馬步軍都總管兼經略安撫沿邊招討等使知永興軍詔夏竦仍判永興軍乙巳下德音降陝西囚死罪一等流以下釋之特支軍士緡錢振撫邊民被鈔略者親屬五月丁巳錄繫囚甲子出內藏緡錢一百萬助軍費乙丑追封皇長子爲襄王賜名昉丁卯罷陝

西經略安撫沿邊招討都監辛未宋庠鄭戩罷以王舉正參知政事任中師任
布爲樞密副使詔夏竦屯軍鄜州陳執中屯軍涇州癸酉閱試衛士六月壬辰
詔陝西諸路總管司嚴邊備毋輒入賊界賊至則禦之乙巳詔近臣舉河北陝
西河東知州通判縣令秋七月丙辰月掩心後星戊午月掩南斗壬戌置萬勝
軍凡二十指揮是月元昊寇麟府州八月戊寅詔鄜延部署以兵援麟府甲申
河北置場括市戰馬緣邊七州軍免括乙未毀潼關新置樓櫓庚子月掩歲星
乙巳募民間材勇者補神捷指揮是月元昊寇金明砦破寧遠砦砦主王世亶
兵馬監押王顯死之陷豐州知州王餘慶兵馬監押孫吉死之九月壬子命河
東鑄大鐵錢乙亥復置義倉冬十月甲午詔罷都部署分四路置使置陝西營
田務己亥罷銅符木契是月修河北城池十一月壬子置涇原路強壯弓箭手
丙辰發廩粟減價以濟京城民甲子朝饗景靈宮乙丑饗太廟奉慈廟丙寅祀
天地於圜丘大赦改元蠲陝西來年夏稅十之二及麟府民二年賦租臣僚許
立家廟功臣不限品數賜戟增天下解額弛京東八州鹽禁是月令江饒池三

州鑄鐵錢十二月丙子加恩百官丁丑司天監上崇天萬年曆戊寅詔陝西四路總管及韓運使兼營田甲午置陝西護塞軍是歲湖南洞蠻知徽州楊通漢貢方物

二年春三月丁巳復京師榷鹽法壬戌詔以京西閒田處內附蕃族無親屬者遣使河北募兵及萬人者賞之癸亥詔磨勘院考提點刑獄功罪爲三等以待黜陟二月乙未詔河北強壯刺手背爲義勇軍三月甲辰朔詔殿前指揮使兩省都知舉武臣才堪爲將者丁巳杜衍宣撫河東辛酉晁宗慤罷己巳契丹遣蕭英劉六符來致書求割地是月賜禮部奏名進士諸科及第出身八百三十九人夏四月戊寅令御史中丞諫官同較三司用度罷其不急者庚辰知制誥富弼報使契丹五月辛亥錄繫囚壬子減皇后及宗室婦郊賜之半甲寅詔三館臣僚上封事及聽請對丙辰詔醫官毋得換右職戊午建大名府爲北京降河北州軍繫囚罪一等杖笞以下釋之乙酉罷左藏庫月進錢戊辰禁銷金爲服飾是月契丹集兵幽州聲言來侵河北京東皆爲邊備六月甲戌出內藏銀

紬絹三百萬助邊費癸未以特奏名武藝人補三班丙戌置北平軍丙申閱蕃
落將士騎射戊戌詔減省南郊臣僚賜與秋七月丙午任布罷丁未詔軍校戰
沒無子孫者賜其家緡錢戊午大雨雹以呂夷簡兼判樞密院事章得象兼樞
密使晏殊加平章事癸亥富弼再使契丹詔京官告病者一年方聽朝參八月
丁丑策制舉人戊寅策武舉人試騎射甲申白氣貫北斗戊子出內藏庫緡錢
十萬修北京行宮己亥遣使安撫京東督捕盜賊九月丙午呂夷簡改兼樞密
使乙丑契丹遣耶律仁起劉六符持誓書來閏月戊戌罷河北民間科徭是月
元昊寇定川砦涇原路馬步軍副都總管葛懷敏戰沒諸將死者十四人元昊
大掠渭州而去冬十月庚戌赦陝西保捷軍甲寅遣使安撫涇原路丙辰知制
誥梁適報使契丹戊午發定州禁軍二萬二千人屯涇原庚申詔恤將校陣亡
其妻女無依者養之宮中丙寅契丹遣使來再致誓書報徹兵十一月壬申黑
氣貫北斗柄辛巳復都部署兼招討等使命韓琦范仲淹龐籍分領之甲申以
泰山處士孫復爲國子監直講是歲占城獻馴象三

三年春正月庚午朔封皇子曦爲鄂王辛未曦薨丙子減陝西歲市木三之一辛巳詔輔臣議蠲減天下賦役戊子詔錄將校死王事而無子孫者親屬辛卯置德順軍壬辰錄唐狄仁傑後癸巳元昊自名曩霄遣人來納款稱夏國二月丙午賜陝西招討韓琦范仲淹龐籍錢各百萬辛酉立四門學三月壬申閱衛士武技戊子呂夷簡罷爲司徒監修國史與議軍國大事以章得象爲昭文館大學士晏殊爲集賢殿大學士並兼樞密使夏竦爲樞密使賈昌朝參知政事夏四月戊戌朔幸瓊林苑閱騎士癸卯遣保安軍判官邵良佐使元昊許封冊爲夏國主歲賜絹十萬匹茶三萬斤甲辰以韓琦范仲淹爲樞密副使乙酉詔夏竦還本鎮以杜衍爲樞密使丙辰以春夏不雨遣使祠禱於嶽瀆甲子呂夷簡罷議軍國大事五月丁卯朔日有食之庚午錄繫囚戊寅詔諸路轉運使並兼按察使歲具官吏能否以聞庚辰祈雨於相國寺會靈觀癸未置御史六員罷推直官丁亥置武學戊子雨己丑謝雨辛卯築欽天壇於禁中乙未近臣薦試方略者六人授官有差是月忻州地大震虎翼卒王倫叛於忻州六月甲辰

詔諸路漕臣令所部官吏條茶鹽礬及坑冶利害以聞秋七月辛未詔許二府不限奏事常制得敷陳留對丙子王舉正罷壬午罷陝西管內營田甲申命任中師宣撫河東范仲淹宣撫陝西乙酉獲王倫八月乙未朔命官詳定編敕戊戌詔諫官日赴內朝丁未以范仲淹參知政事富弼爲樞密副使壬子白氣貫北斗魁癸丑韓琦代范仲淹宣撫陝西甲寅太白晝見戊午罷武學九月丁卯詔輔臣對天章閣戊辰呂夷簡以太尉致仕乙亥任中師罷丁丑詔執政大臣非假休不許私第受謁是月桂陽洞蠻寇邊湖南提刑募兵討平之冬十月丙午詔中書樞密同選諸路轉運使丁未詔縣令佐能根括編戶隱僞以增賦入者量其數賞之戊申詔二府同選諸路提刑甲寅復諸路轉運判官乙卯詔修兵書壬戌詔二府頒新定磨勘式甲子築水洛城是月光化軍亂討平之十一月丙寅上清宮火癸未詔館職有闕以兩府兩省保舉然後召試補用丁亥更蔭補法壬辰限職田是月五星皆在東方十二月乙巳桂陽監徭賊復寇邊丁巳大雨雪水冰河北雨赤雪交趾獻馴象五安化州蠻來貢

四年春正月庚午京城雪寒詔三司減價出薪米以濟之壬申西蕃磨氈角入貢乙亥荆王元儼薨辛卯太常禮儀院上新修禮書及慶曆祀儀二月丙辰出奉宸庫銀三萬兩振陝西饑民己酉白虹貫日甲寅罷陝西四路馬步軍都總管經略安撫招討使復置隨路都總管經略安撫招討使三月癸亥朔以旱遣內侍祈雨辛未省廣濟河歲漕軍儲二十萬石乙亥詔天下州縣立學更定科舉法語在選舉志己卯出御書治道三十五事賜講讀官庚辰錄唐郭子儀後甲申免衡道州桂陽監民經徭賊劫略者賦役一年夏四月丙申詔湖南民誤爲征徭軍所殺者賜帛存撫其家丁酉宜州蠻歐希範叛詔廣西轉運鈐轄司發兵討捕壬子以錫慶院爲太學五月庚午錄繫囚壬申幸國子監謁孔子有司言舊儀止肅揖帝特再拜賜直講孫復五品服遂幸武成王廟又幸玉津園觀種稻乙亥撫州獻生金山丙子詔西川知州軍監罷任未出界而卒者錄其子孫一人戊寅招募人納粟振淮南饑乙酉忻州言地震有聲如雷丙戌曩霄遣人來復稱臣六月壬子降天下繫囚流徒罪一等杖笞釋之范仲淹宣撫陝

西河東癸丑詔諸軍因戰傷廢停不能自存及死事之家孤老月給米人三斗
秋七月戊寅封宗室德文等十人爲郡王國公壬午月犯熒惑癸未契丹遣使
來告伐夏國甲申夷人寇三江砦清井監官兵擊走之丙戌詔諸路轉運提刑
察舉守令有治狀者八月辛卯命賈昌朝領天下農田范仲淹領刑法事甲午
富弼宣撫河北戊戌命右正言余靖報使契丹保州雲翼軍殺官吏據城叛庚
子命右正言田況度視保州仍聽便宜行事丙午進宗室官有差戊午詔輔臣
所薦官毋以爲諫官御史九月辛酉保州平壬戌詔保州官吏死亂兵而無親
屬者官爲殯斂兵官被害及戰沒並優賜其家民田遭蹂踐者蠲其租癸亥以
真宗賢妃沈氏爲德妃婉儀杜氏爲賢妃戊辰呂夷簡薨庚午晏殊罷乙亥遣
使安撫湖南甲申以杜衍同中書門下平章事兼樞密使集賢殿大學士賈昌
朝爲樞密使陳執中參知政事丁亥宴宗室太清樓射於苑中冬十月庚寅賜
曩霄誓詔歲賜銀絹茶綵凡二十五萬五千陳堯佐薨丙申命范仲淹提舉三
館祕閣繕校書籍癸丑桂陽蠻降授蠻酋三人奉職十一月壬戌以西界內附

香布爲團練使己巳詔戒朋黨相訐及按察恣爲苛刻文人肆言行怪者己卯改上莊穆皇后諡曰章穆莊獻明肅皇太后曰章獻明肅莊懿皇太后曰章懿莊懷皇后曰章懷莊惠皇太后曰章惠庚辰朝饗景靈宮辛巳饗太廟奉慈廟壬午冬至祀天地於圜丘大赦十二月壬辰加恩百官乙未封曩霄爲夏國主丁酉詔州縣以先帝所賜七條相誨敕辛亥置保安鎮戎軍權場是歲黎州邛部川山前山後百蠻都鬼主牟黑來貢

五年春正月甲戌罷河東陝西諸路招討使乙亥復置言事御史丙子契丹遣使來告伐夏國還庚辰命知制誥余靖報使契丹癸未詔京朝官因被彈奏雖不曾責罰但有改移差遺並四周年磨勘乙酉范仲淹富弼罷丙戌杜衍罷以賈昌朝同中書門下平章事兼樞密使集賢殿大學士王貽永爲樞密使宋庠參知政事吳育龐籍並爲樞密副使二月辛卯詔罷京朝官用保任敘遷法又罷蔭補限年法壬辰曩霄初遣人來賀正旦癸卯以久旱詔州縣毋得淹繫刑獄辛亥祈雨於相國天清寺會靈祥源觀癸丑桂陽監言唐和等復內寇乙卯

謝雨三月己未詔太宗正勵諸宗子授經務學辛酉韓琦罷癸亥詔禮部貢舉
甲子宜州蠻賊歐希範平庚午東方有黃氣如虹貫月甲戌詔監司按察屬吏
毋得差官體量甲申詔陝西以曩霄稱臣降繫囚罪一等笞釋之邊兵第賜緡
錢民去年逋負皆勿責蠲其租稅之半麟府州嘗爲羌所掠除逋負租稅如之
丙戌罷入粟補官夏四月丁亥朔司天言日當食陰晦不見錄繫囚遣官錄三
京囚辛卯曩霄初遣人來賀乾元節戊申章得象罷以賈昌朝爲昭文館大學
士陳執中同中書門下平章事集賢殿大學士兼樞密使庚戌以吳育參知政
事丁度爲樞密副使五月己巳罷諸路轉運判官閏月丙午曩霄遣人來謝冊
命六月丁卯減益梓州上供絹歲三之一紅錦鹿胎半之秋七月戊申廣州地
震八月庚午荆南府岳州地震九月庚寅詔文武官已致仕而舉官犯罪當連
坐者除之辛卯以重陽曲宴近臣宗室於太清樓遂射苑中冬十月乙卯契丹
遣使來獻九龍車及所獲夏國羊馬辛酉祔章獻明肅皇后章懿皇后神主於
太廟大赦罷轉運使兼按察庚午幸瓊林苑遂畋楊村遣使以所獲馳薦太廟

召父老賜以飲食茶帛辛未頒曆於夏國庚辰罷宰臣兼樞密使十一月丁亥冬至宴宗室於崇政殿己酉詔河北長吏舉殿直供奉官有武才者是歲施州溪洞蠻西南夷龍以特來貢

六年春正月戊申徙廣南戍兵善地以避瘴毒二月戊寅青州地震詔陝西經略安撫及轉運司議裁節諸費及所置官員無用者以聞三月辛巳朔日有食之錄繫囚庚寅登州地震岨嶇山摧自是屢震輒海底有聲如雷甲午月犯歲星是月賜禮部奏名進士諸科及第出身八百五十三人夏四月甲寅遣使賜湖南戍兵方藥五月甲申京師兩雹地震丙戌錄繫囚戊子減邛州鹽井歲課緡錢一百萬丙申詔陝西市蕃部馬丁西京東人劉登劉沔胡信謀反伏誅六月庚戌朔詔夏竦與河北監司察帥臣長吏之不職者丁巳有流星出營室南其光燭地隱然有聲丙寅以久旱民多暍死命京城增鑿井三百九十丁丑詔制科隨禮部貢舉秋七月丁亥月犯南斗庚寅河東經略司言兩壞忻代等州城壁八月癸亥策試賢良方正能直言極諫并試武舉人癸酉以吳育爲樞密

副使丁度參知政事九月甲辰登州言有巨木三千餘浮海而出冬十月辛未詔發兵討湖南徭賊十一月己卯遣官議夏國公封界癸未湖南徭賊寇英韶州界辛丑畋東韓村乘輿所過及圍內田蠲其租一年是歲邈川首領唃廝囉西蕃瞎氍磨氍角安化州蠻蒙光速等來貢交趾獻馴象十道州部瀧酋李石壁等降

七年春正月丙子朔御大慶殿受朝丁亥詔河北所括馬死者限二年償之己亥頒慶曆編敕壬寅詔減連州民被徭害者來年夏租二月己酉詔取益州交子三十萬於秦州募人入中糧丙辰令內侍二人提舉月給軍糧三月壬午錄繫囚癸未詔天下有能言寬恤民力之事者有司驛置以聞以其副上之轉運司詳其可行者輒行之毀後苑龍船丁亥以旱罷大宴癸巳詔避正殿減常膳許中外臣僚實封條上三事乙未賈昌朝罷以陳執中爲昭文館大學士夏竦同中書門下平章事集賢殿大學士吳育爲給事中歸班文彥博爲樞密副使罷出獵丁酉以夏竦爲樞密使文彥博參知政事高若訥爲樞密副使辛丑祈

兩於西太一宮及還遂兩壬寅陳執中宋庠丁度以旱降官一等夏四月丁未
謝雨己酉詔前京東轉運使薛紳專任文吏伺察郡縣細過江東轉運使楊紘
判官王綽提點刑獄王鼎苛刻相尙並削職知州自今毋復用爲部使者壬子
御正殿復常膳乙卯復執中庠度官己巳詔諫官非公事毋得私謁五月戊寅
詔武臣非歷知州軍無過者毋授同提點刑獄己丑補降猺唐和等爲峒主己
亥命翰林學士楊察蠲放天下逋負辛丑詔西北二邊有大事二府與兩制以
上雜議之六月乙巳詔禁畜猛獸害人者辛酉詔天下知縣非鞫獄毋得差遣
壬戌詔臣僚朝見者留京毋過十日秋七月癸未奉安太祖太宗真宗御容於
南京鴻慶宮甲申德音降南京畿內囚罪一等徒以下釋之賜民夏租之半除
災傷倚閣稅及欠折官物非侵盜者辛丑禁貢餘物饋近臣八月乙丑析河北
爲四路各置都總管九月丁酉詔刪定一州一縣敕冬十月壬子李迪薨甲子
幸廣親宅謁太祖太宗神御殿宴宗室賜器幣有差乙丑河陽許州地震十一
月乙未加上真宗諡丙申朝饗景靈宮丁酉饗太廟奉慈廟戊戌冬至祀天地

於圜丘大赦貝州宣毅卒王則據城反十二月戊申加恩百官庚戌樞密直學士明鎬體量安撫河北癸丑詔貝州有能引致官兵獲賊者授諸衛上將軍甲寅遣內侍以敕榜招安貝賊是歲西蕃磨氍角來貢

八年春正月丁丑文彥博宣撫河北明鎬副之壬午江寧府火乙未日赤無光閏月辛丑貝州平甲辰曲赦河北賜平貝州將士緡錢戰沒者官爲葬祭兵所踐民田蠲其稅改貝州爲恩州戊申文彥博同中書門下平章事集賢殿大學士官吏將士有功者遷擢有差辛酉親從官顏秀等四人夜入禁中謀爲變宿衛兵捕殺之丙寅礫王則於都市丁卯知貝州張得一坐降賊伏誅二月癸酉頒慶曆善救方夏國來告曩霄卒己卯賜瀛莫恩冀州緡錢二萬贖還饑民鬻子丁酉奉安宣祖太祖太宗御容於睦親宅三月甲辰詔禮部貢舉辛亥遣使體量安撫陝西甲寅幸龍圖天章閣詔輔臣曰西陲備禦兵冗賞濫罔知所從卿等各以所見條奏又詔翰林學士三司使知開封府御史中丞曰朕躬闕失左右朋邪中外險詐州郡暴虐法令有不便於民者朕欲聞之其悉以陳壬戌

以霖雨錄繫囚癸亥以朝政得失兵農要務邊防備豫將帥能否財賦利害錢法是非與夫讒人害政姦盜亂俗及防微杜漸之策召知制誥諫官御史等諭之使悉對於篇夏四月己巳朔封曩霄子諒祚爲夏國主壬申丁度罷明鎬參知政事五月辛酉夏竦罷宋庠爲樞密使龐籍參知政事六月戊辰朔詔近臣舉文武官材堪將帥者丙子河決澶州商胡埽壬辰以久雨齋禱甲午明鎬卒乙未詔館閣官須親民一任方許入省府及轉運提點刑獄差遣丙申章得象薨秋七月戊戌以河北水令州縣募饑民爲軍辛丑罷鑄鐵錢八月己丑以河北京東西水災罷秋宴九月戊午詔三司以今年江淮漕米轉給河北州軍冬十一月己亥作皇帝欽崇國祀之寶壬戌出廩米減價以濟畿內貧民十二月乙丑朔以霖雨爲災頒德音改明年元減天下囚罪一等徒以下釋之出內藏錢帛賜三司買粟以濟河北流民所過官爲舍止之所賣物毋收算丁卯冊美人張氏爲貴妃戊子遣使體量安撫利州路是歲廬州合肥縣稻再實交州來

貢

宋

史

卷十一

本紀

八中華書局聚

皇祐元年春正月甲戌朔日有食之以河北水災罷上元張燈停作樂庚戌張士遜薨己未詔以緡錢二十萬市穀種分給河北貧民辛酉詔臺諫非朝廷得失民間利病毋風聞彈奏二月戊辰以河北疫遣使頒藥辛未發禁軍十指揮赴京東西路備盜三月丁巳錄繫囚己未契丹遣使來告伐夏國庚申翰林院學士錢明逸報使契丹是月賜禮部奏名進士諸科及第出身千三百九人四月癸未梓州轉運司言瀆井監夷人平六月甲子蠲河北復業民租賦二年甲戌始置觀文殿大學士戊寅詔中書樞密非聚議毋通賓客戊子詔轉運使提點刑獄所部官吏受贓失覺察者降黜秋七月丁酉詔臣僚毋得保薦要近內臣己未詔諸州歲市藥以療民疾八月壬戌陳執中罷以文彥博爲昭文館大學士宋庠同中書門下平章事集賢殿大學士龐籍爲樞密使高若訥參知政事梁適爲樞密副使甲申策制舉武舉人九月乙巳廣源州蠻儂智高寇邕州詔江南福建等路發兵以備戊午太白犯南斗己未罷武舉冬十一月丙申詔河北被災民八十以上及篤疾不能自存者人賜米一石酒一斗辛丑詔民有

冤貧不能詣闕者聽訴於監司以聞十二月甲子遣入內供奉高懷政督捕邕
州盜賊是歲大留國來貢

宋史卷十一

宋

史卷十一 本紀

九一中華書局聚

宋史卷十二

元大中書右丞相總裁脫脫等修

本紀第十二

仁宗四

二年春正月癸卯以歲饑罷上元觀燈壬子命近臣同三司較天下財賦出入之數二月甲申出內庫絹五十萬下河北陝西河東路以備軍賞三月戊子朔詔季秋有事於明堂己丑以大慶殿爲明堂甲午遣官祈雨丁酉月犯軒轅大星戊戌詔明堂禮成羣臣毋上尊號庚子契丹遣使以伐夏師還來告丙午兩己酉詔兩浙流民聽人收養翰林學士趙概報使契丹夏五月丁亥朔新作明堂禮神玉己亥旌定州義民李能六月己未出新製明堂樂八曲丁卯以自製黃鐘五音五曲並肄於太常庚午定選舉縣令法壬申月犯填星癸未錄繫囚熒惑入輿鬼犯積尸癸亥出內藏絹百萬市糴軍儲壬申深州大雨壞廬舍九月丁亥閱雅樂己酉朝饗景靈宮庚戌饗太廟辛亥大饗天地於明堂以太祖

太宗真宗配如圖丘大赦百官進秩一等詔自今內降指揮百司執奉毋輒行
敢因緣干請者諫官御史察舉之冬十月庚午熒惑犯太微上將乙亥宴京畿
父老於錫慶院閏十一月己未詔后妃之家毋得除二府職任丙寅秀州地震
有聲如雷丁卯詔中書門下省兩制及太常官詳定大樂河北水詔蠲民租出
內藏錢四十萬緡絹四十萬匹付本路使措置是歲芻糧十二月甲申定三品
以上家廟制喚廝囉西蕃瞎斡西南蕃龍光滌占城沙州來貢涇原路生戶都
首領那龍男阿日丁內附

三年春正月乙丑幸魏國大長公主第視疾二月丙戌宰臣文彥博等進皇祐
大饗明堂記己亥復行河北沿邊州軍入中糧草見錢法三月庚申宋庠罷以
劉沆參知政事癸酉儂智高表獻馴象及金銀卻之夏四月癸未詔河北流民
相屬吏不加恤而乃飾廚傳交賂使客以取名譽自今非犒設兵校其一切禁
之丙申太白晝見五月庚戌以恩冀州旱詔長吏決繫囚壬申置河渠司乙亥
頒簡要濟衆方命州縣長吏按方劑以救民疾丁丑錄繫囚六月丁亥無爲軍

獻芝草帝命姑免知軍茹孝標罪戒州郡自今勿復獻秋七月癸丑詔少卿監以下年七十不任釐務者御史臺審官院以聞嘗任館閣臺諫及提刑者中書裁處待制以上能自引年則優加恩禮丙辰以孔氏子孫復知仙源縣事丁巳兩制禮官上大樂名曰太安辛酉河決大名府郭固口乙丑罷徙州縣長吏不任事者十有六人丙子減郴永州桂陽監丁身米歲十萬餘石八月丙戌遣使安撫京東淮南兩浙荆湖江南饑民辛卯詔諸路監司具所部長吏治狀能否以聞是月汴河絕流冬十月庚子文彥博罷以龐籍同中書門下平章事昭文館大學士高若訥爲樞密使梁適參知政事王堯臣爲樞密副使十一月辛亥減漳州泉州興化軍丁米十二月庚辰新作渾儀庚子詔文武官七十以上未致仕者更不考課遷官甲辰罷災傷州軍貢物是歲涇原樊家族密廝歌內附四年春正月己巳詔諸路貸民種乙亥塞大名府決河二月庚子蠲湖州民所貸官米三月己酉詔禮部貢舉丙辰蠲江南路民所貸種數十萬斛辛酉錄繫囚辛未詔官禁市物給實直非所闕者毋市夏四月庚辰詔修河兵夫逃亡死

傷會其數以議官吏之罰廣源州蠻儂智高反五月乙巳朔智高陷邕州遂陷橫貴等八州圍廣州壬申命知桂州陳曙率兵討智高六月乙亥起前衛尉卿余靖爲祕書監湖南安撫使知潭州前尙書屯田員外郎直史館楊旼體量安撫廣南提舉經制盜賊事庚辰改余靖爲廣西安撫使知桂州命同提點廣東刑獄李樞與陳曙討智高廣東轉運鈐轄司發兵援之丁亥以狄青爲樞密副使秋七月乙巳出內藏錢絹助河北軍儲丙午命余靖經制廣南盜賊事丁巳大風拔木壬戌智高引衆去廣州廣東兵馬鈐轄張忠知英州蘇緘邀擊於白田忠戰沒甲子廣東兵馬鈐轄蔣偕又敗於路田八月癸未詔開封府比大風兩民廬摧圮壓死者官爲祭斂之辛卯命樞密直學士孫沔安撫湖南江西內侍押班石全斌副之九月丁巳命余靖提舉廣南兵甲經制賊盜事庚申廣西兵馬鈐轄王正倫討智高於昭州館門驛戰沒智高入昭州庚午以狄青爲宣徽南院使宣撫荆湖路提舉廣南經制賊盜事是月智高襲殺蔣偕於太平場冬十月丙子太白犯南斗詔鄜延環慶涇原路擇蕃落廣銳軍各五十人赴廣

南行營丁丑智高入賓州甲申復入邕州丁亥以諸路饑疫并征徭科調之煩令轉運使提點刑獄親民官條陳救恤之術以聞十一月壬寅朔日有食之戊午詔免江西湖南廣南民供軍須者今年秋租十之三十二月壬申朔廣西兵馬鈐轄陳曙討智高兵戰於金城驛壬辰觀新樂乙未錄唐顏真卿後是歲河北路及鄜州水蠲河北民積年逋負鄜州民稅役

五年春正月壬寅朔御大慶殿受朝庚戌以廣南用兵罷上元張燈白虹貫日丁巳會靈觀火戊午狄青敗智高於邕州斬首五千餘級智高遁去甲子遣使撫問廣南將校賜軍士緡錢二月癸未狄青復爲樞密副使甲申赦廣南凡戰沒者給槨櫛護送還家無主者葬祭之賊所過郡縣免其田租一年死事家科徭二年貢舉人免解至禮部不預奏名者亦以名聞丙戌詔廣西都監蕭注等追捕智高丁亥下德音減江西湖南繫囚罪一等徒以下釋之丁壯饋運廣南軍須者減夏稅之半仍免差徭一年戊子詔百官遇南郊奏薦無子孫者聽奏期親一人乙未詔宗室通經者大宗正司以聞三月癸亥遣使奉安太祖御容

於滁州太宗御容於并州真宗御容於澶州是月賜禮部奏名進士諸科及第
出身千四十二人夏四月甲午命劉沆梁適監議大樂五月乙巳詔輔臣凡有
大政許復對後殿高若訥罷以狄青爲樞密使丁未孫沔爲樞密副使戊申詔
轉運使毋取羨餘以助三司庚戌詔智高所至州無城壘若兵力不敵而棄城
者奏裁壬子錄繫囚丁巳詔轉運使振邕州貧民戶貸米一石甲子詔諫官御
史毋挾私以中善良及臣僚言機密事毋得漏泄六月乙亥御紫宸殿按太安
樂觀宗廟祭器丙戌作集禧觀成乙未詔河北荐饑轉運使察州縣長吏能招
輯勞來者上其狀不稱職者舉劾之秋七月乙巳詔荆湖北路民因災傷所貸
常平倉米免償己酉詔薦舉非其人者令御史臺彈奏見任監司以上弗許薦
論戊午詔太常定諡毋爲溢美閏月戊辰詔廣南民逃未還者限一年歸業其
復三歲壬申龐籍罷以陳執中同中書門下平章事昭文館大學士梁適同中
書門下平章事集賢殿大學士乙亥詔武臣知州軍須與僚屬參議公事毋專
決庚辰秦鳳路言總管劉煥等破蕃部斬首二千餘級八月丁酉朔詔民訴災

傷而監司不受者聽州軍以狀聞辛酉策制舉武舉人壬戌詔南郊以太祖太宗真宗並配九月乙酉觀新樂冬十月丙申朔日有食之壬子作鎮國神寶丁巳詔以蝗旱令監司諭親民官上民間利害十一月丁卯朝饗景靈宮戊辰饗太廟奉慈廟己巳祀天地於圜丘大赦丁丑加恩百官戊子放天下逋負十二月戊午詔轉運官毋得進羨餘壬戌以曹陳許鄭滑州爲輔郡隸畿內置京畿轉運使是歲占城國來貢

至和元年春正月辛未詔京師大寒民多凍餒死者有司其瘞埋之壬申碎通天犀和藥以療民疫癸酉貴妃張氏薨輟視朝七日禁京城樂一月丁丑追冊爲皇后賜諡溫成辛卯錄繫囚減三京輔郡雜犯死罪一等徒以下釋之三月庚子詔治河堤民有疫死者蠲戶稅一年無戶稅者給其家錢三千壬戌孫沔罷以田况爲樞密副使三月己巳王貽永罷以王德用爲樞密使辛未命曾公亮等同試入內醫官壬申賜邊臣攻守圖置京畿提點刑獄乙亥太史言日當食四月朔庚辰下德音改元減死罪一等流以下釋之癸未易服避正殿減常

膳乙酉詔京西民饑宜令所在勸富人納粟以振之夏四月甲午朔日有食之用牲於社辛丑御正殿復常膳祥源觀火五月戊寅以河北流民稍復遣使安撫壬辰太白晝見秋七月丁卯以程戡參知政事立溫成園戊辰梁適罷己巳出御史馬遵呂景初吳中復八月丁酉詔前代帝王後嘗仕本朝官八品以下其祖父母妻子犯流以下罪聽贖未仕而嘗受朝廷賜者所犯非兇惡亦聽贖丙午以劉沆同中書門下平章事集賢殿大學士命修起居注官侍經筵九月乙亥契丹遣使來告夏國平辛巳遣三司使王拱辰報使契丹己丑太白晝見冬十月辛卯朔太白晝見壬辰詔士庶家毋得以常傭顧之人爲姻違者離之丁酉葬溫成皇后丙午溫成皇后神主入廟戊午幸城北砲場觀發砲宴從臣賜衛士緡錢十一月甲子出太廟禘祫時饗及溫成皇后樂章肄於太常十二月丙午詔司天監天文算術官毋得出入臣僚家癸丑詔內侍傳宣令都知司劄報被旨者覆奏是歲融州大邱洞楊光朝內附

二年春正月丁卯奉安真宗御容於萬壽觀減畿內輔郡囚罪一等徒以下釋

之賜諸軍緡錢戊辰邕州言蘇茂州蠻內寇詔廣西發兵討之丁亥晏殊薨二月壬辰汾州團練推官郭固上車戰法既試之授衛尉丞三月丁卯詔修起居注立於講讀官之次丙子封孔子後爲衍聖公是月以旱除畿內民逋芻及去年秋逋稅罷營繕諸役夏四月己亥契丹遣使賀乾元節以其主之命持本國三世畫像來求御容辛亥定差衙前法乙卯出米京城門下其價以濟流民五月己未錄繫囚辛酉詔中書公事並用祖宗故事戊寅詔戒百官務飭官守六月戊戌陳執中罷以文彥博同中書門下平章事昭文館大學士劉沆監修國史富弼同中書門下平章事集賢殿大學士乙巳儂智高母儂氏弟智光子繼宗繼封伏誅秋八月戊子減畿內輔郡囚罪一等徒以下釋之乙未置臺諫章奏簿壬子詔中書樞密院第宗姓服屬自明堂覃恩後及十年者咸與進官九月戊午契丹使來告其國主宗真殂帝爲發哀成服於內東門幕次遣使祭奠弔慰及賀其子洪基立戊辰詔試醫官須引醫經本草以對每試十道以六通爲合格辛巳罷輔臣宣徽節度使乾元節任子恩冬十月丙戌錄唐長孫無忌

後己丑詔京畿毋領輔郡罷京畿轉運使提點刑獄癸丑下溪州蠻彭仕義內
寇詔湖北路發兵捕之十一月乙卯交阯來告李德政卒其子日尊上德政遺
貢物及馴象己未行並邊見錢和糴法十二月丁亥修六塔河丁酉詔武臣有
賊濫者毋得轉橫行其立戰功者許之庚子契丹遣使致其主宗真遺留物及
謝弔祭庚戌太白晝見壬子作醴泉觀成是歲西界阿訛等內附詔遣還龍賜
州彭師黨以其族來歸大食國西蕃安化州蠻來貢

嘉祐元年春正月甲寅朔御大慶殿受朝是日不豫辛酉輔臣禱祠於大慶殿
齊宿殿廡近臣禱於寺觀及遣諸州長吏禱於嶽瀆諸祠壬戌御崇政殿癸亥
賜在京諸軍緡錢甲子赦天下蠲被災田租及倚閣稅戊辰罷上元張燈辛未
命輔臣禱天地宗廟社稷是月大雨雪木冰二月甲辰帝疾愈御延和殿三月
丁巳詔禮部貢舉辛未司天監言自至和元年五月客星晨出東方守天關至
是沒壬申遣官謝天地宗廟社稷寺觀諸祠癸酉契丹遣使來謝閏月癸未朔
以王堯臣參知政事程戡爲樞密副使詔前後殿間日視事夏四月壬子朔六

塔河復決丙辰裁定補蔭選舉法甲戌錄繫囚是月大雨水注安上門門關折壞官私廬舍數萬區諸路言江河決溢河北尤甚六月辛亥朔詔雙日不御殿伏終如舊辛未免畿內京東西河北被水民賦租乙亥兩壞太社太稷壇戊寅遣使安撫河北己卯詔羣臣實封言時政闕失秋七月乙酉命京東西湖北監司分行水災州軍振饑蠲租丙戌賜河北流民米壓溺死者賜其家錢有差己丑出內藏銀絹三十萬振貸河北月入南斗乙巳貸被水災民麥種是月彗出紫微垣長丈餘環州小遇族叛知州張揆破降之八月庚戌朔日有食之癸亥狄青罷以韓琦爲樞密使是夕彗滅甲子出恭謝樂章肆於太常乙亥朝謁景靈宮滅京城繫囚徒罪一等杖笞釋之戊寅詔湖北招安彭仕義九月庚寅命宰臣攝事於太廟辛卯恭謝天地於大慶殿大赦改元丁酉加恩百官庚子賜致仕卿監以上及曾任近侍之臣粟帛酒饌癸卯舉行御史遷次格自京至泗州置汴河木岸十一月辛巳王德用罷賈昌朝爲樞密使十二月壬子劉沆罷以曾公亮參知政事甲子白虹貫日是歲西蕃磨氈角占城大食國來貢融桂

州蠻楊克端等內附

二年春二月己酉梓夔路三里村夷人寇清井監庚戌錄繫囚降罪一等徒以下釋之遣使錄三京輔郡繫囚壬戌杜衍薨澧州羅城洞蠻內寇發兵擊走之癸酉王德用卒是月雄霸州地震三月戊寅振河北被災民乙未契丹使耶律防陳顛來求御容戊戌淮水溢遣張昇報使契丹癸卯狄青卒是月賜禮部奏名進士諸科及第出身八百七十七人親試舉人免黜落始此夏四月丁未以河北地數震遣使安撫丙寅幽州地震震壞城郭覆壓死者數萬人己巳邕州火峒蠻儂宗旦入寇癸酉以彭仕羲未降遣官安撫湖北五月庚辰管勾麟府軍馬公事郭恩爲夏人所襲歿於斷道塢己亥詔舉行磨勘法六月戊午夏國主諒祚遣人來謝使弔祭戊辰以淑妃苗氏爲賢妃秋七月辛巳詔河北諸道總管分遣兵官教閱所部軍辛卯命孫抃張昇磨勘轉運使及提點刑獄課績丁酉詔陝西河北諸路經略安撫舉文武官材堪將領者各一人八月己酉詔每歲賜諸道節鎮諸州錢有差命長吏選官和藥以救民疾壬子命富弼等詳

定編敕庚申錄繫囚降罪一等徒以下釋之癸亥策制舉人丁卯置廣惠倉九月庚子契丹再使蕭扈吳湛來求御容冬十月乙巳遣胡宿報使契丹丙午班祿令十一月丙申詔三司使體量判官才否以聞十二月戊申詔自今間歲貢舉天下進士諸科解舊額之半置明經科罷說書舉人辛亥立內降關白二府法是歲西蕃瞎斡并諸族西平州黔南道王石自品西南蕃鸚州來貢

三年春正月戊戌鑿永通河二月癸卯契丹使來告其祖母哀輟視朝七日遣使祭奠弔慰癸丑錄繫囚降罪一等徒以下釋之三月甲戌詔禮部貢舉夏四月甲子吳育卒乙丑罷睦親宅祖宗神御殿丙辰詔守令或貪恣耄昏以弛爲寬以苛爲察以增賦斂爲勞以出入刑罰爲能而部使者莫之舉劾自今其各思率職毋撓權倖毋縱有罪以稱朕意五月壬申增國子監生員甲午契丹遣使致其祖母遺留物六月丙午文彥博賈昌朝罷以富弼爲昭文館大學士韓琦同中書門下平章事集賢殿大學士宋庠田况爲樞密使張昇爲樞密副使甲寅詔學士院編國朝制誥丁卯交趾貢異獸秋七月丙子詔廣濟河盜原武

縣河決遣官行視民田振恤被水害者癸巳以夔州路旱遣使安撫八月己亥朔日有食之己未王堯臣卒庚申彭仕義率衆降九月癸酉議罷榷茶法己丑契丹遣使來謝冬十月癸亥除河北坊郭客戶乾食鹽錢十一月癸酉議減冗費己丑置都水監罷三司河渠司十二月己巳詔三司歲上天下稅賦之數三歲一會虧贏以聞閏月丁卯朔詔吏人及伎術官職毋得任知州軍提點刑獄自軍班出至正任者方得知邊要州軍丁丑詔裁定制科及進士高第人恩數庚辰詔明年正旦日食其自丁亥避正殿減常膳宴契丹使毋作樂壬午錄繫囚降三京囚罪一等徒以下釋之是歲安化上中下州北遐鎮蠻人來貢四年春正月丙申朔日有食之用牲於社辛丑御正殿復常膳以自冬雨雪不止遣官分行京城賜孤窮老疾錢畿縣委令佐爲糜粥濟饑壬寅賜在京諸軍班緡錢頒嘉祐驛令二月己巳罷榷茶庚午廣南言交趾寇欽州乙亥以廣惠倉隸司農寺戊子白虹貫日三月戊戌命近臣同三司減定民間科率是月賜進士諸科及第出身三百三十九人夏四月丁卯詔孟冬大禘於太廟癸酉封

柴氏後爲崇義公給田千頃奉周室祀丙子復銀臺司封駁制癸未陳執中薨
辛卯詔中外臣庶居室器用冠服妾媵有違常制必罰毋貸壬辰錄繫囚降罪
一等徒以下釋之大震雷兩雹五月戊戌詔兩制臣僚舊制不許謁執政私第
所舉薦不得用爲御史今除其法庚子詔內臣員多權罷進養子入內壬子遣
官經界河北牧地餘募民種藝六月己巳羣臣請加尊號曰大仁至治表五上
不許癸酉詔諸路經略安撫轉運使提點刑獄各舉本部官有行實政事者三
人以備升擢嘗任兩府者許舉內外官丁丑詔轉運司凡隣州饑而輒閉糶者
以違制論辛卯放宮女二百十四人秋七月丁未放宮女二百三十六人八月
乙亥策制舉人冬十月壬申朝饗景靈宮癸酉大裕於太廟大赦詔諸路監司
察士有學行爲鄉里所推者同長吏以聞民父母年八十以上復其一丁復益
州爲成都府并州爲太原府戊寅加恩百官十一月庚子汝南郡王允讓薨十
二月丁丑白虹貫日是歲响廝囉來貢

五年春正月辛卯朔白虹貫日太白犯歲星己亥錄劉繼元後二月壬戌錄繫

囚三月壬辰詔禮部貢舉癸巳劉沆薨乙未歲星晝見壬子詔以蝗澇相仍敕轉運使提點刑獄督州縣振濟仍察不稱職者夏四月癸未程戡罷以孫抃爲樞密副使丙戌命近臣同三司議均稅五月戊子朔京師民疫選醫給藥以療之己丑京師地震丁酉詔三司置寬恤民力司己酉王安石召入爲三司度支判官丁巳錄繫囚降罪一等徒以下釋之六月乙丑詔戒上封告訐人罪或言赦前事及言事官彈劾小過不關政體者乙亥遣官分行天下訪寬恤民力事秋七月癸巳邕州言交趾與甲峒蠻合兵寇邊都巡檢宋士堯拒戰死之詔發諸州兵討捕丙申詔待制臺諫官正刺史以上各舉諸司使至三班使臣堪將領及行陣戰鬪者三人戊戌翰林學士歐陽修上新修唐書庚戌詔中書門下采端實之士明進諸朝辨激巧僞者放黜之八月壬申詔求逸書庚辰置陝西估馬司乙酉罷諸路同提點刑獄使臣丙戌置江湖閩廣四川十一路轉運判官九月己丑太白晝見冬十月乙酉深州言野蠶成繭被於原野十一月辛卯罷內臣寄遷法辛丑宋庠罷以曾公亮爲樞密使張昇孫抃爲參知政事歐陽

修陳升之趙概爲樞密副使十二月己卯蘇茂州蠻寇邕州辛巳補諸州父老百歲以上者十二人爲州助教是歲大食國來貢

六年春正月乙未許兩制與臺諫相見二月丁巳詔宗室賜名授官者須年及十五方許轉官乙丑詔良民子弟或爲人誘隸軍籍自今兩月內父母訴官者還之丙寅錄繫囚降罪一等徒以下釋之三月己亥富弼以母喪去位庚子以富弼母喪罷大宴戊申給西京周廟祭享器服是月賜進士諸科及第同出身二百九十五人夏四月辛酉詔嶺南官吏死於儂賊而其家流落未能自歸者所在給食護送還鄉庚辰陳升之罷以包拯爲樞密副使出諫官唐介趙抃御史范師道呂誨五月丙戌官諸路敦遣行義文學之士七人庚戌錄繫囚降罪一等徒以下釋之分命官錄三京繫囚六月壬子朔日有食之乙丑太白晝見壬申歲星晝見丙子以司馬光知諫院入對戊寅以王安石知制誥秋七月乙酉泗州淮水溢丙戌詔淮南江浙水災差官體量蠲稅戊子錄昭憲皇太后孝明孝惠孝章淑德皇后家子孫進秩授官者十有九人癸巳詔臺諫爲耳目之

官乃聽險陂之人興造飛語中傷善良非忠孝之行也中書門下其申徹百工務敦行實循而弗改者絀之八月乙亥策制舉人丁丑詔諸路刺舉之官未有以考其賢否比令有司詳定厥制其各務祇新書以稱朕意仍令考校轉運提刑課績院以新定條目施行戊寅詔州縣長吏有清白不擾而實惠及民者令本路監司保薦再任政績尤異當加獎擢閏月乙酉復以成都府爲劍南西川節度庚子以韓琦爲昭文館大學士曾公亮同中書門下平章事集賢殿大學士張昇爲樞密使辛丑以胡宿爲樞密副使冬十月壬午定內侍磨勘法丙戌詔京西淮浙荆湖增置都同巡檢壬辰起復皇姪前右衛大將軍岳州團練使宗實爲秦州防禦使知宗正寺辭以喪不拜十一月己巳許夏國用漢衣冠癸酉賜昭憲皇太后家信陵坊第戊寅許康州刺史李樞以己官封贈父母十二月丙戌復豐州庚寅命諸路總管集隨軍功過簿以備遷補是歲冬無冰占城國獻馴象安化州蠻來貢

七年春正月辛未復命皇姪宗實爲秦州防禦使知宗正寺乙亥詔南郊以太

祖配爲定制改溫成皇后廟爲祠殿二月己卯朔更江西鹽法詔開封府市地於四郊給錢瘞民之不能葬者癸酉錄繫囚命官錄被水諸州繫囚三月辛亥詔禮部貢舉乙卯孫抃罷以趙概參知政事吳奎爲樞密副使甲子以旱罷大宴乙丑祈雨於西太一宮庚午謝雨壬申徐州彭城濠州鍾離地生麩十餘頃民皆取食夏四月壬午頒嘉祐編敕己丑夏國主諒祚進馬求賜書詔賜九經還其馬五月戊午太白晝見庚午包拯卒六月丙子朔歲星晝見秋七月戊申太白經天壬子詔季秋有事於明堂八月乙亥朔出明堂樂章肆於太常己卯詔以宗實爲皇子癸未賜名曙丁亥奉安真宗御容於壽星觀庚子以立皇子告天地宗廟諸陵九月乙巳朔以皇子爲齊州防禦使進封鉅鹿郡公己酉朝饗景靈宮庚戌饗太廟辛亥大饗明堂奉真宗配大赦己未加恩百官冬十月乙亥皇子表辭所除官賜詔不允丙戌白虹貫日乙未太白晝見丙申詔內藏庫三司共出緡錢一百萬助糴天下常平倉十二月甲午德妃沈氏爲貴妃賢妃苗氏爲德妃丙申幸龍圖天章閣召羣臣宗室觀祖宗御書又幸寶文閣爲

飛白書分賜從臣作觀書詩命韓琦等屬和遂宴羣玉殿庚子再召從臣於天章閣觀瑞物復宴羣玉殿是歲冬無冰占城來貢

八年春正月辛亥交趾貢馴象九二月癸未帝不豫甲申下德音減天下囚罪一等徒以下釋之丙戌中書樞密奏事於福寧殿之西閣三月戊申龐籍薨癸亥御內東門幄殿優賜諸軍緡錢甲子御延和殿賜進士諸科及第同出身三百四十一人辛未帝崩於福寧殿遺制皇子卽皇帝位皇后爲皇太后喪服以日易月山陵制度務從儉約諡曰神文聖武明孝皇帝廟號仁宗十月甲午葬永昭陵

贊曰仁宗恭儉仁恕出於天性一遇水旱或密禱禁庭或跣立殿下有司請以玉清舊地爲御苑帝曰吾奉先帝苑囿猶以爲廣何以是爲燕私常服澣濯帷帟衾裯多用繒絀宮中夜饑思膳燒羊戒勿宣索恐膳夫自此戕賊物命以備不時之須大辟疑者皆令上讞歲常活千餘吏部選人一坐失入死罪皆終身不遷每諭輔臣曰朕未嘗詈人以死況敢濫用辟乎至於夏人犯邊禦之出境

契丹渝盟增以歲幣在位四十二年之間吏治若媮惰而任事蔑殘刻之人刑法似縱弛而決獄多平允之士國未嘗無弊倖而不足以累治世之體朝未嘗無小人而不足以勝善類之氣君臣上下惻怛之心忠厚之政有以培壅宋三百餘年之基子孫一矯其所爲馴至於亂傳曰爲人君止於仁帝誠無愧焉

宋史卷十二

宋史卷一百一十一 十一

宋史卷一百一十一 十一

宋史卷一百一十一 十一

宋史卷一百一十一 十一

宋史卷一百一十一 十一

宋史卷一百一十一 十一

宋史卷一百一十一 十一

宋史卷一百一十一 十一

宋史卷一百一十一 十一

宋史卷一百一十一 十一

宋史卷一百一十一 十一

宋史卷一百一十一 十一

宋史卷十二考證

仁宗紀四嘉祐二年九月庚子契丹再使蕭扈吳湛來求御容冬十月乙巳遣

胡宿報使契丹○臣宗楷按邵氏聞見錄契丹求仁宗御容議者慮有厭勝

之術帝曰吾待契丹厚必不然遣御史中丞張昇遺之據此則使契丹者張

昇本紀則云胡宿彼此互異

四年五月戊戌詔兩制臣僚舊制不許謁執政私第所舉薦不得用爲御史今
除其法○宋通鑑陳執中爲相兩制不許至執政私第執政所薦士不得充
臺官執中卒並除之

宋史卷十二考證

宋史卷十三

元中書右丞相總裁脫脫等修

本紀第十三

英宗

英宗體乾應曆隆功威德憲文肅武睿聖宣孝皇帝諱曙濮安懿王允讓第十子母曰仙遊縣君任氏明道元年正月二日生於宣平坊第初王夢兩龍與日並墮以衣承之及帝生赤光滿室或見黃龍游光中四歲仁宗養於內寶元二年豫王生乃歸濮邸帝天性篤孝好讀書不爲燕嬉褻慢服御儉素如儒者每以朝服見教授曰師也敢弗爲禮時吳王宮教授吳克進宗室六箴仁宗付宗正帝書之屏風以自戒景祐三年賜名宗實授左監門衛率府副率累遷右羽林軍大將軍宜州刺史皇祐二年爲右衛大將軍岳州團練使嘉祐中宰相韓琦等請建儲仁宗曰宗子已有賢知可付者卿等其勿憂時帝方服濮王喪六年十月辛卯起爲秦州防禦使知宗正寺帝以終喪辭奏四上乃聽喪終復

授前命又辭七年八月許罷宗正復爲岳州團練使戊寅立爲皇子癸未改今
名帝聞詔稱疾益堅辭詔同判大宗正事安國公從古等往喻旨卽臥內起帝
以入甲辰見清居殿自是日再朝或入侍禁中九月遷齊州防禦使鉅鹿郡公
八年仁宗崩夏四月壬申朔皇后傳遺詔命帝嗣皇帝位百官入哭盡哀韓琦
宣遺制帝御東楹見百官癸酉大赦賜百官爵一等優賞諸軍如乾興故事遣
王道恭告哀于契丹帝欲亮陰三年命韓琦攝冢宰宰臣不可乃止乙亥帝不
豫遣韓贄等告卽位于契丹丙子尊皇后曰皇太后己卯詔請皇太后同聽政
壬午皇太后御小殿垂簾宰臣覆奏事乙酉作受命寶丁亥以皇子右千牛衛
將軍仲鍼爲安州觀察使光國公熒惑自七年八月庚辰不見命宰臣祈禳至
是月己丑見于東方庚子立京北郡君高氏爲皇后五月戊午以富弼爲樞密
使戊辰初御延和殿以疾未平命宰臣祈福于天地宗廟社稷及寺觀又禱于
岳瀆名山六月辛卯契丹遣蕭福延等來祭弔秋七月壬子初御紫宸殿帝自
六月癸酉不御殿至是始見百官癸亥歲星晝見乙丑星大小數百西流戊辰

百官請大行皇帝諡于南郊八月癸巳以生日爲壽聖節九月辛亥以光國公仲鍼爲忠武軍節度使同中書門下平章事淮陽郡王改名頊戊午上仁宗諡冊于福寧殿冬十月甲午葬仁宗于永昭陵十一月丙午祔于太廟大風霾己酉減東西二京罪囚一等免山陵役戶及靈駕所過民租辛亥契丹遣蕭素等來賀卽位十一月己巳初御邇英閣召侍臣講讀經史乙亥淮陽郡王頊出閣是歲于闐西南蕃來貢

治平元年春正月丁酉朔改元戊戌太白晝見己亥壽聖節百官及契丹使初上壽于紫宸殿甲寅賞知唐州趙尙寬修溝堰增戶口進一官賜錢二十萬三月壬寅命脩秦悼王冢置守護官戊午錄囚辛酉雨土夏四月癸未放宮女百三十五人甲午祈雨于相國天清寺醴泉觀賜諸軍錢有差五月己亥濬二股河戊申皇太后還政庚戌初日御前後殿壬子詔皇太后稱聖旨出入儀衛如章獻太后故事其有所須內侍錄聖旨付有司覆奏卽行丙辰上皇太后宮殿名曰慈壽己未熒惑犯太微上將壬戌以病愈命宰臣謝天地宗廟社稷及宮

觀閏月戊辰輔臣進爵一等六月己亥以淮陽郡王頊爲穎王祈國公頴爲保寧軍節度使同中書門下平章事東陽郡王鄂國公頴爲左衛上將軍增宗室教授丁未增同知大宗正事一員辛亥作睦親廣親宅辛酉太白晝見壬戌歲星晝見八月甲辰錄周世宗後甲寅太白入太微垣乙卯遣兵部員外郎呂誨等四人充賀契丹太后生辰正旦使刑部郎中章岷等四人充賀契丹主生辰正旦使丙辰內侍都知任守忠坐不法貶保信軍節度副使蘄州安置丁巳以上供米三萬石振宿亳二州水災戶九月丁卯復武舉庚午詔夏國精擇使人戒勵毋紊彝章冬十月丙申詔中外近臣監司舉治行素著可備升擢者二人十一月乙亥科陝西戶三丁之一刺以爲義勇軍凡十三萬八千四百六十五人各賜錢二千諫官司馬光累上疏諫之不允戊寅復內侍養子令十二月乙巳雨土丙辰契丹遣耶律烈等來賀壽聖節蕭禧等來賀明年正旦是歲畿內宋亳陳許汝蔡唐潁曹濮濟單濠泗廬壽楚杭宣洪鄂施渝州光化高郵軍大水遣使行視疏治振恤蠲其賦租西蕃瞎斡子瞎欺米征內附

二年春正月甲戌振蔡州二月甲辰大風晝冥丁未錄囚是月賜禮部奏名進士明經諸科及第出身三百六十一人三月己巳班明天曆夏四月戊戌詔議崇奉濮安懿王典禮辛丑詔監司知州歲薦吏毋徒充數丙午奉安仁宗御容于景靈宮丁未白氣起西方五月癸亥詔以綜核名實勵臣下丙子詔自今皇子及宗室屬卑者勿授以檢校師傅官乙酉詔宗室封王者子孫襲爵六月壬辰錄囚己酉詔尙書集三省御史臺議奉濮安懿王典禮甲寅罷尙書省集議令有司博求典故務在合經詔遣官與契丹定疆界秋七月癸亥富弼罷丙寅詔減乘輿服御丙子放宮女百八十人丁丑太白晝見己卯羣臣五上尊號不允庚辰張昇罷以文彥博爲樞密使八月庚寅京師大雨水癸巳賜被水諸軍米遣官視軍民水死者千五百八十人賜其家緡錢葬祭其無主者乙未以雨災詔責躬乞言初學士草詔曰執政大臣其惕思天變帝書其後曰雨災專以戒朕不德可更曰協德交脩己亥以水災罷開樂宴壬子以工部郎中蔡抗等充賀契丹生辰使侍御史趙鼎等充賀契丹正旦使乙卯減衰冕制度丙辰陝

西置壯城兵九月壬戌雨罷大宴己巳以災異風俗策制舉人壬午太白犯南斗乙酉以久雨遣使祈于岳瀆名山大川冬十月乙巳雨木冰十一月庚午朝饗景靈宮辛未饗太廟壬申有事南郊大赦上皇太后冊冊皇后以齊州爲興德軍節度辛巳加恩百官十二月辛亥太白晝見是歲蔣波繡雲龍賜等州來貢

三年春正月丙辰朔契丹遣使耶律仲達等來賀正旦戊午契丹遣使肅惟輔等來賀壽聖節丙寅幸降聖院謁神御殿癸酉契丹改國號爲遼己卯温州火燒民屋萬四千間死者五千人丁丑皇太后下書中書門下封濮安懿王宜如前代故事王夫人王氏韓氏任氏皇帝可稱親尊濮安懿王爲皇夫人爲后詔遵慈訓以瑩爲園置守衛吏卽園立廟俾王子孫主祠事如皇太后旨辛巳詔臣民避濮安懿王諱以王子宗懿爲濮國公壬午黜御史呂誨范純仁呂大防二月乙酉朔白虹貫日三月庚申彗星晨見于室辛酉黜諫官傅堯俞御史趙鼎趙瞻戊辰上親錄囚庚午以彗避正殿減膳辛未以黜呂誨等詔內外癸酉

以災異責躬詔轉運使察獄訟調役利病大者以聞辛巳慧晨見于昴如太白長丈有五尺壬午李于畢如月夏四月丙午詔有司察所部左道淫祀及賊殺善良不奉令者罪毋赦五月甲子罷知雜御史觀察使以上歲舉人乙丑慧至張而沒戊辰謂宰相曰朕欲與公等日論治道中書常務有定制者付有司行之六月己酉錄囚秋七月乙丑進濮王子孫及魯王孫爵一等八月庚午遣傅卞等賀遼主生辰張師顏等賀正旦九月壬子朔日有食之癸亥定待制諫官朝官少卿郎中遷選歲月補員格庚辰禁妃嬪公主以下薦服親之夫冬十月壬午朔以仙遊縣君任氏墳域爲園乙酉詔兩日一御邇英閣丁亥詔禮部三歲一貢舉甲午詔宰臣參知政事舉才行士可試館職者各五人十一月戊午帝不豫禱于大慶殿己未宰相始奏事辛酉降天下囚死罪一等流以下釋之十二月乙未宰相祈于天地宗廟社稷壬寅立賴王頊爲皇太子癸卯大赦賜文武官子爲父後者勳一轉遼遣蕭靖等來賀正旦壽聖節是歲遣使以違約數寇責夏國諂祚獻方物謝罪

四年春正月庚戌朔羣臣上尊號曰體乾膺曆文武聖孝皇帝降天下囚罪一等徒以下釋之大風霾辛亥蠲京師逋餽錢丁巳帝崩于福寧殿壽三十六諡曰憲文肅武宣孝皇帝廟號英宗帝自居睦親宅孝德著聞濮安懿王薨以所服玩物分諸子帝所得悉以與王府舊人既葬而辭去者宗室有假金帶而以銅帶歸主吏以告帝曰真吾帶也受之命殿侍鸞犀帶直錢三十萬亡之帝亦不問初辭皇子請潭王宮教授周孟陽作奏孟陽有所勸戒卽謝而拜之奏十餘不允始就召戒舍人曰謹守吾舍上有適嗣吾歸矣既爲皇子慎靜恭默無所猷爲而天下陰知其有聖德卽位每命近臣必以官而不以名大臣從容以爲言帝曰朕雖宮中命小臣亦未嘗以名也一日語神宗曰國家舊制士大夫之子有尙帝女皆升行以避舅姑之尊義甚無謂朕嘗思此寤寐不平豈可以富貴之故屈人倫長幼之序也可詔有司革之會疾不果神宗述其事焉贊曰昔人有言天之所命人不能違信哉英宗以明哲之資膺繼統之命執心固讓若將終身而卒踐帝位豈非天命乎其臨政臣下有奏必問朝廷故事

與古治所宜每有裁決皆出羣臣意表雖以疾疢不克大有所爲然使百世之
下欽仰高風詠歎至德何其盛也彼隋晉王廣唐魏王泰窺覲神器矯揉奪嫡
遂啓禍原誠何心哉誠何心哉

宋史卷十三

宋

史

卷十三

本紀

五

中華書局聚

宋史卷十四

元中書右丞相總裁脫脫等修

本紀第十四

神宗一

神宗紹天法古運德建功英文烈武欽仁聖孝皇帝諱頊英宗長子母曰宣仁聖烈皇后高氏慶曆八年四月戊寅生于濮王宮祥光照室羣鼠吐五色氣成雲八月賜名仲鍼授率府副率三遷至右千牛衛將軍嘉祐八年侍英宗入居慶寧宮嘗夢神人捧之登天英宗卽位授安州觀察使封安國公是年五月壬戌受經于東宮帝隆準龍顏動止皆有常度而天性好學請問至日晏忘食英宗常遣內侍止之帝正衣冠拱手雖大暑未嘗用扇侍講王陶入侍帝率弟顥拜之九月加忠武軍節度使同中書門下平章事封淮陽郡王改今諱治平元年六月進封穎王三年三月納故相向敏中孫女爲夫人十月英宗不豫帝引仁宗故事請兩日一御邇英閣講讀以安人心十二月壬寅立爲皇太子四年

正月丁巳英廟崩帝卽皇帝位戊午赦天下常赦所不原者遣馮行己告哀于遼己未尊皇太后曰太皇太后皇后曰皇太后命宰相韓琦爲山陵使辛酉遣孫坦等告卽位于遼以大行皇帝詔賜夏國主及西蕃唃廝囉丙寅羣臣表三上始御迎陽門幄殿聽政內醫侍先帝疾者皆坐不謹貶之詔東平郡王允弼襄陽郡王允良朝朔望以吳奎終喪復授樞密副使戊辰以韓琦守司空兼侍中曾公亮行門下侍郎兼吏部尙書進封英國公文彥博行尙書左僕射檢校司徒兼中書令富弼改武寧軍節度使進封鄭國公曹佾改昭慶軍節度使檢校太傅張昇改河陽三城節度使宗諤同中書門下平章事改集慶軍節度使檢校尙書左僕射歐陽脩趙概並加尙書左丞仍參知政事陳升之爲戶部侍郎呂公弼爲刑部侍郎允弼允良並加守太保弟東陽郡王顥進封昌王鄂國公頴進封樂安郡王羣臣進秩有差二月乙酉初御紫宸殿立向氏爲皇后丁亥詔入內侍省皇城司合覆奏事並執條覆奏戊子進封交趾郡王李日尊爲南平王加邈川首領董氈檢校太保詔山陵所須應委三司轉運司計置毋

輒擾民詔提舉醫官院試堪診御脈者六人庚寅以四月十日爲同天節辛卯
白虹貫日壬辰詔公主下嫁者行見舅姑禮甲辰西蕃首領拽羅鉢鳩令結二
人誘蕃部三百餘帳投夏國捕獲斬之以徇三月壬子曹佾加檢校太尉兼侍
中賜禮部進士及第出身四百六十一人甲寅陝西宣撫使郭遠討蕃部党令
征等平之賜昌王顥公使錢歲萬緡半給之丙辰昌王顥樂安郡王顥乞解官
行服不許癸亥詔入內內侍省官已經壽聖節任子者同天節權罷奏薦壬申
歐陽脩知亳州癸酉吳奎參知政事罷乙亥尤良薨閏月癸未太白晝見甲申
夏國主諒祚遣使謝罪辛卯詔齊密登華頒耀鄜絳潤婺海宿饒歙吉建汀潮
等十八州知州慶渭秦延四州通判其選並從中書毋以恩例奏授乙未張昇
以太子太師致仕庚子詔求直言御史中丞王陶乞許舉知縣資序人爲御史
裏行從之癸卯王安石出知江寧府甲辰詔諸路帥臣及副總管或有移易依
慶曆故事乙巳詔以孟夏農勞之時令監司戒飭州縣省事勸民力田民有艱
食者振之夏四月庚戌請大行皇帝諡于南郊辛酉詔內外所上封事令張方

平司馬光詳定以聞丙寅錄囚御史中丞王陶侍御史吳申呂景以過毀大臣
陶出陳州申景各罰銅二十斤吳奎罷知青州遣使循行陝西河北京東京西
路體量安撫壬申奎復位罷州郡歲貢飲食果藥癸酉詔陝西河東經略轉運
司察主兵臣僚怯懦老病者以聞五月辛巳以久旱命宰臣禱雨乙巳寶文閣
成置學士直學待制官六月己酉遼遣蕭餘慶等來弔祭己未振河北流民辛
未詔天下官吏有能知徭役利病可議寬減者以聞乙亥詔中書樞密細務歸
之有司秋七月庚辰詔察富民與妃嬪家婚姻夤緣得官者甲申石蕃來貢己
丑命尙書戶部郎中趙抃刑部郎中陳薦同詳定中外封事辛卯告英宗憲文
肅武宣孝皇帝諡于天地宗廟社稷壬辰上寶冊于福寧殿丙午文州曲水縣
令宇文之邵上書指陳得失八月丁未朔太白晝見戊午復西夏和市己巳京
師地震癸酉葬英宗于永厚陵九月丁丑詔減諸路逃田稅額壬午祧僖祖及
文懿皇后乙酉祔英宗神主于太廟樂曰大英之舞戊子減兩京畿內鄭孟州
囚罪一等民役山陵者蠲其賦辛卯徙封顯爲岐王顯爲高密郡王富弼爲尙

書左僕射遣孫思恭等報謝于遼且賀生辰正旦壬辰錄周世宗從曾孫貽廓爲三班奉職甲午遼遣耶律好謀等來賀卽位戊戌以王安石爲翰林學士辛丑韓琦罷爲司徒鎮安武勝軍節度使判相州吳奎陳升之罷樞密副使呂公弼爲樞密使張方平趙抃並參知政事邵亢爲樞密副使壬寅以曾公亮爲尙書左僕射文彥博爲司空潮州地震癸卯以權御史中丞司馬光爲翰林學士冬十月丙午漳泉諸州地震丁未富弼罷判河陽戊申建州邵武興化軍地震己酉初御邇英閣召侍臣講讀經史以右諫議大夫權御史中丞滕甫考諸路監司課績張方平以父憂去位庚戌給陝西轉運司度僧牒令糴穀振霜旱州縣癸丑詔翰林學士御史中丞侍御史知雜事舉材堪御史者各二人詔將作監主簿常秩赴闕甲寅製資治通鑑序賜司馬光癸酉知青澗城种諤復綏州十一月丁丑詔近臣各舉才行可任使者一人戊寅詔求直言丙戌詔二府各舉所知丁亥令考課院詳定諸州所上縣令治狀戊子分令宰臣祈雪置馬監于河東交城縣庚寅詔近臣以舉官不當經三劾者中書別奏取旨乙未詔令

內外文武官各舉有材德行能者十二月丙辰西南龍蕃來貢辛酉以來歲日食正旦自乙丑避殿減膳罷朝賀壬戌詔起居日增轉對官二人丙寅詔州縣吏並緣爲姦致獄多瘐死歲終會死者多寡以制其罪著爲令己巳遼遣蕭傑等來賀正旦

熙寧元年春正月甲戌朔日有食之詔改元丁丑以旱減天下囚罪一等杖以下釋之壬午令州縣掩暴骸丁亥命宰臣曾公亮等極言闕失庚寅御殿復膳壬辰幸寺觀祈雨丙申趙概罷知徐州三司使唐介參知政事丁酉詔脩英宗實錄壬寅增太學生百人二月辛亥令諸路每季上雨雪乙卯孔若蒙襲封衍聖公壬戌貸河東飢民粟三月庚辰夏主諒祚卒遣使來告哀丙戌詔恤刑戊子作太皇太后慶壽宮皇太后寶慈宮丁酉簡州木連理潭州兩毛夏四月乙巳詔翰林學士王安石越次入對戊申命宰臣禱雨以樞密直學士李參爲尙書右丞判西京留守司御史臺辛亥同天節羣臣及遼使初上壽于紫宸殿五月甲戌募饑民補廂軍庚辰詔兩制及國子監舉諸王宮學官戊戌廢慶成軍

六月癸卯錄唐魏徵狄仁傑後丁未占城來貢辛亥詔諸路興水利乙亥河決棗彊縣丙寅命司馬光滕甫裁定國用秋七月癸酉詔謀殺已傷案問欲舉自首者從謀殺減二等乙亥名秦州新築大甘谷口砦曰甘谷城丁丑詔諸路帥臣監司及兩制知雜御史已上各舉武勇謀略三班使臣二名賜布衣王安國進士及第己卯羣臣三表請上奉元憲道文武仁孝之號不許陳升之知樞密院事給濮州雷澤縣堯陵守戶壬午以恩冀州河決賜水死家緡錢及下戶粟甲申京師地震乙酉又震大雨辛卯以河朔地大震命沿邊安撫司及雄州刺史候遼人動息以聞賜壓死者緡錢京師地再震壬辰遣御史中丞滕甫知制誥吳充安撫河北癸巳疏深州溢水甲午減河北路囚罪一等丁酉賜河北安撫司空名誥敕募民入粟己亥回鶻來貢八月壬寅詔京東西路存恤河北流民京師地震甲辰又震乙卯賜河東及鄜延路轉運司空名誥敕募民入粟實邊甲子詔中書門下考屬近行尊者一人王之丙寅罷宗諤平章事丁卯遣張宗益等賀遼主生辰正旦九月辛未太祖曾孫舒國公從式進封安定郡王丁

亥減后妃臣僚薦奏推恩戊子莫州地震有聲如雷丁酉詔三司裁定宗室月料嫁娶生日郊禮給賜冬十月辛丑給天下繫囚衣食薪炭乙卯出奉宸庫珠付河北買馬戊辰禁銷金服飾十一月癸酉太白晝見癸未命宰臣禱雪丙戌朝饗太廟遂齋于郊宮廢青城後苑丁亥祀天地于圜丘大赦羣臣進秩有差乙未京師及莫州地震十二月己亥朔命宰臣禱雪癸卯瀛州地大震庚戌賜夏國主秉常詔許納塞門安遠二砦歸其綏州辛亥錄唐段秀實後癸丑禱雪于郊廟社稷庚申以判汝州富弼爲集禧觀使詔乘驛赴闕壬戌雪甲子遼遣耶律公質等來賀正旦

二年春正月丙午奉安英宗神御于景靈宮英德殿二月己亥以富弼同中書門下平章事庚子以王安石參知政事命翰林學士呂公著修英宗實錄乙巳帝以災變避正殿減膳徹樂甲子陳升之王安石創置三司條例議行新法三月乙酉詔漕運鹽鐵等官各具財用利害以聞丙戌命宰臣禱雨戊子秉常上誓表納塞門安遠二砦乞綏州詔許之乙未以旱慮囚四月丁酉朔羣臣再上

尊號不許戊戌省內外土木工壬寅遼遣耶律昌等來賀同天節丁未唐介薨
臨其喪戊申宰臣富弼曾公亮以早上表待罪詔不允癸丑曾公亮爲西京
奉安仁宗英宗御容禮儀使丁巳遣使諸路察農田水利賦役戊午外任大使
臣年七十以上令監司體量直除致仕者更不與子孫推恩甲子御殿復膳免
河北歸業流民夏稅五月辛未宴紫宸殿初用樂己卯賜河北役兵特支錢癸
未翰林學士鄭獬罷知杭州宣徽北院使王拱辰罷判應天府知制誥錢公輔
罷知江寧府丁亥奉安仁宗英宗御容于會聖宮及應天院甲午減西京囚罪
一等台州民延贊等九人年各百歲以上並授本州助教六月丁巳右諫議大
夫御史中丞呂誨以論王安石罷知鄧州以翰林學士呂公著爲御史中丞命
龍圖閣直學士張掞兼編排錄用勳臣子孫壬戌太白晝見秋七月乙丑朔日
當食雲陰不見庚午詔御史中丞舉推直官及可兼權御史者甲戌東平郡王
允弼薨辛巳立淮浙江湖六路均輸法壬午振恤被水州軍仍蠲竹木稅及酒
課癸未詔自今文臣換右職者須實有謀勇曾著績効卽得取旨甲申日下有

五色雲己丑韓琦上仁宗實錄曾公亮上英宗實錄八月癸卯侍御史劉琦貶
監處州鹽酒務御史裏行錢顛貶監衢州鹽稅亦以論安石故乙巳殿中侍御
史孫昌齡以論新法貶通判蘄州丙午同修起居注范純仁以言事多忤安石
罷同知諫院戊申河徙東行夏國請從舊蕃儀詔許之己酉范純仁知河中府
甲寅朝神御殿辛酉以祕書省著作佐郎程顥王子韶並爲太子中允權監察
御史裏行壬戌侍御史知雜事劉述同判刑部丁諷坐受刑名敕不卽下述貶
知江州諷貶通判復州審刑院詳議官王師元坐言許遵所議刑名不當貶監
安州稅九月甲子朔交州來貢乙丑以古勿峒効順首領儂智會爲右千牛衛
大將軍丁卯立常平給斂法戊辰出內庫緡錢百萬糴河北常平粟丁丑遣孫
固等賀遼主生辰正旦辛卯廢奉慈殿壬辰以祕書省著作佐郎呂惠卿爲太
子中允崇政殿說書冬十月丙申富弼罷爲武寧軍節度使判亳州曾公亮陳
升之並同中書門下平章事城綏州命郭逵選將置守具逵遣趙嵩交夏人所
納安遠塞門二砦就定地界夏人渝初盟高請城綏州不以易二砦因改名綏

德城戍戍以蕃官禮賓使折繼世爲忠州刺史左監門衛將軍蒐名山爲供備庫使仍賜姓名趙懷順丙辰詔御史請對並許直由閣門上殿戊午宗諤復平章事己未夏人來謝封冊辛酉錄楊承信曾孫立田重進曾孫章爲三班借職十一月乙丑命韓絳制置三司條例甲戌詔祖宗之後世襲補外官非袒免親罷賜名授官丙子罷諸路提刑武臣頒農田水利約束壬午御邇英閣聽講賜汴口役兵錢己丑減天下囚罪一等徒以下釋之閏月庚子濬御河壬子置交子務是月差官提舉諸路常平廣惠倉兼管勾農田水利差役事十二月癸亥朔復減后妃公主及臣僚推恩癸酉增失入死罪法丙戌增三京留司御史臺國子監及宮觀官以處卿監監司知州之老者戊子遼遣蕭惟禧來賀正旦是歲交州來貢

宋史卷十四

宋

史

卷十四

本紀

六

中華書局聚

宋史卷十四

國子監丞王德用言以

陳寶輝欲致公主死

于孫吳氏美官罪

口口身死

十一日

章事

國子監

翰林院

翰林院

宋史卷十五

元中書右丞相總裁脫脫等修

本紀第十五

神宗二

三年春正月癸丑錄唐李氏周柴氏後乙卯詔諸路散青苗錢禁抑配戊午判
尚書省張方平罷知陳州二月壬申以翰林學士司馬光爲樞密副使凡九辭
詔收還敕誥甲戌以河州刺史瞎欺丁木征爲金紫光祿大夫檢校刑部尚書
乙酉韓琦罷河北安撫使爲大名府路安撫使三月丙申孫覺呂公著張戢程
顥李常上疏極言新法不聽己亥始策進士罷詩賦論三題戊申李常言青苗
斂散不實有旨具析翰林學士兼知通進銀臺司范鎮封還詔書以爲不當坐
罷職守本官壬子賜禮部奏名進士明經及第八百二十九人乙卯詔諸路毋
有留獄丙辰立試刑法及詳刑官右正言孫覺以奉詔反覆貶知廣德軍夏四
月癸亥幸金明池觀水嬉宴射瓊林苑丙寅遼遣耶律寬來賀同天節丁卯給

宋

史

卷十五

本紀

中華書局聚

兩浙轉運司度僧牒募民入粟戊辰御史中丞呂公著貶知潁州己卯趙抃罷知杭州以韓絳參知政事監察御史裏行程顥罷爲京西路同提點刑獄壬午右正言李常貶通判滑州監察御史裏行張戢貶知公安縣王子韶貶知上元縣癸未待御史知雜事陳襄罷爲同修起居注程顥簽書鎮寧軍節度判官公事前秀州軍事判官李定爲太子中允監察御史裏行五月癸巳詔並邊州郡毋給青苗錢太白晝見壬寅詔令司馬光詳定轉對封事甲辰詔罷制置三司條例歸中書辛亥賜進士蘇丕號安退處士壬子罷入閣儀丁巳詔以審官院爲東院別置西院六月癸酉日有五色雲丁丑封宗室秦魯蔡魏燕陳越七王後爲公戊寅詔修武成王廟丙戌知諫院胡宗愈貶通判真州秋七月辛卯歐陽修徙知蔡州壬辰呂公弼罷樞密使以知太原府馮京爲樞密副使置潞州交子務戊戌兩雹癸丑詳定宗室襲封制度甲寅置三班院主簿八月戊午罷看詳銀臺司文字所丙寅以旱慮囚死罪以下遞減一等杖笞者釋之以衛州旱令轉運司振恤仍蠲租賦戊寅詔川陝福建廣南七路官令轉運司立格就

注具爲令遣張景憲等賀遼主生辰正旦己卯夏人犯大順城知慶州李復圭以方略授環慶路鈐轄李信慶州東路都巡檢劉甫監押种詠出戰兵少取敗復圭誣信等違其節制斬信及劉甫种詠死於獄是月慶州巡檢姚兕敗夏人於荔原堡鈐轄郭慶都監高敏死之九月戊子朔中書置檢正官乙未韓絳罷爲陝西宣撫使己亥始試法官庚子曾公亮罷爲司空兼侍中河陽三城節度使辛丑以馮京參知政事翰林學士吳充爲樞密副使乙巳親策賢良方正及武舉壬子太白晝見癸丑作東西府以居執政司馬光罷知永興軍詔環慶障亡義勇餘丁當刺者悉免之冬十月辛酉詔延州毋納夏使甲子雨木冰壬申朝謁神御殿丙子知慶州李復圭擅興兵敗績誣裨將李信劉甫种詠以死御史劾之貶保靜軍節度副使戊寅陳升之以母憂去位乙酉詔罷諸場務內侍監當十一月戊子振河北饑民徙京西者己丑官節行之士二十一人壬辰蠲陝西蕃部貸糧癸卯授布衣王存下班殿侍三班差使宣撫司指揮使甲辰夏人寇大順城都監燕達等擊走之庚戌詔升朝官除南郊赦封贈父母外不得

以加恩轉官乙卯以韓絳兼河東宣撫使梓州路轉運使韓疇等以能興利除害賜帛有差十二月己未詔立諸路更戍法舊以他路兵雜戍者遣還乙丑立保甲法丁卯以韓絳王安石並同中書門下平章事王珪參知政事賜布衣陳知彥進士出身知縣王輔同進士出身庚午夏人寇鎮戎軍三川砦巡檢趙普伏兵邀擊敗之丁丑增廣南攝官奉戍寅初行免役法賜西蕃董氈詔并衣帶鞍馬庚辰命王安石提舉編修三司令式壬午遼遣蕭遵道等來賀正旦癸未命宋敏求詳定命官使臣過犯是歲振河北陝西旱饑除民租交阯入貢廣源下溪州蠻來附

四年春正月丁亥朔不視朝己丑种諤襲夏兵于囉兀北大敗之遂城囉兀自是夏人日聚兵爲報復計言者以諤爲稔邊患不便壬辰王安石請鬻天下廣惠倉田爲三路及京東常平倉本從之乙未渝州夷賊李光吉叛巡檢李宗閔等戰死命夔州路轉運使孫構討平之詔詳定大辟覆讞法丁酉朝謁太祖太宗神御殿庚子幸集禧觀宴從臣又幸大相國寺御宣德門觀燈韓絳等言种

諤領兵入西界斬獲甚衆詔遣使撫問乙巳停括牧地丁未立京東河北賊盜重法庚戌罷永興軍買鹽鈔場甲寅定文德殿朔望視朝儀二月丁巳朔罷詩賦及明經諸科以經義論策試進士置京東西陝西河東河北路學官使之教導辛酉詔治吏沮青苗法者戊辰詔振河北民乏食者贖恤西界戰死軍人庚午于闐國來貢壬申進封高密郡王頽爲嘉王癸酉詔審官院所定人赴中書察堪任者引見甲戌賜討渝州夷賊兵特支錢丁丑禱雨詔增漳河等役兵三月丁亥夏人陷撫寧堡戊子慶州廣銳卒叛尋討平之庚寅詔給諸路學田增教官員辛卯遣使察奉行新法不職者癸卯減河東陝西路囚罪一等徒以下釋之民緣軍事科役者蠲其租賦丙午种諤坐陷撫寧堡責授汝州團練使潭州安置丁未韓絳坐興師敗衄罷以本官知鄧州辛亥錄唐李氏後夏四月丙辰朔恤刑辛酉遼遣蕭廣等來賀同天節壬戌遣環慶都鈐轄开贊以兵屯邠涇河中以備西夏癸亥罷陝西交子法癸酉司馬光權判西京留臺种諤再貶賀州別駕甲戌詔司農寺月進諸路所上雨雪狀丙子遣使按視宿亳等州災

傷仍令修飭武備壬午定進士考轉官五月甲午右諫議大夫呂晦卒壬寅詔許富弼養疾西京丙午高麗國來貢辛亥詔宗室率府副率以上遭父母喪及嫡孫承重並解官行服壬子詔恩冀等州災傷遣使振恤蠲其稅六月丁巳河北饑民爲盜者減死刺配庚申羣臣三上尊號曰紹天法古文武仁孝皇帝不許甲子歐陽修以太子少師致仕丙寅慮囚甲戌富弼坐格青苗法徙判汝州秋七月戊子層檀國來貢甲午振恤兩浙水災乙未錄死事將校崔達子遇爲三班奉職丁酉監察御史裏行劉摯罷監衡州鹽倉御史中丞楊繪貶知鄭州庚子詔宗室不得祀祖宗神御丁未詔唐鄧給流民田八月癸丑朔高麗來貢遣官體量陝西差役新法及民間利害甲寅詔郡縣保甲與賊鬪死傷者給錢有差庚申復春秋三傳明經取士癸酉遣楚建中等賀遼主生辰正旦置洮河安撫司命王韶主之九月丙戌河決鄆州辛卯大饗明堂以英宗配赦天下內外官進秩有差庚子夏人入貢癸卯增選人奉冬十月壬子朔罷差役法使民出錢募役立選人及任子出官試法丙辰置樞密院檢詳官戊辰立太學生內

外上舍法丙子詔罪人配流遇冬者至中春乃遣十一月壬午朔詔凡賞功罰罪事可懲勸者月頒之天下甲申詔蠲逋租丁亥作中太一宮壬寅開洪澤河達于淮十二月辛亥朔詔增賜國子監錢四千緡戊午歸夏俘己未安定郡王從式薨甲子封越國公世清爲會稽郡王丙寅省諸路廂軍乙亥崇義公柴詠致仕子若訥襲封丙子遼遣耶律紀等來賀正旦

五年春正月己丑詔聽降羌歸國己亥詔太廟時饗以宗室使相已上攝事置京城邏卒察謗議時政者收罪之二月壬子龜茲來貢以兩浙水賜穀十萬石振之仍募民興水利壬戌詔罷陝西遞運銅錫癸亥太白晝見丙寅以知鄭州呂公弼爲宣徽南院使判秦州龍圖閣直學士蔡挺爲樞密副使三月甲午李日尊卒子乾德嗣遣使弔贈戊戌富弼以司空致仕進封韓國公立文武換官法丙午以內藏庫錢置市易務夏四月庚戌朔立殿前馬步軍春秋校試殿最法乙卯遼遣耶律適等來賀同天節己未括閑田置弓箭手辛未塞北京決河五月辛巳詔以古渭砦爲安遠軍命王韶兼知軍行教閱法宗室非袒免親者

許應舉庚寅以青唐大首領俞龍珂爲西頭供奉官賜姓名包順壬辰以趙尙寬等前守唐州辟田疏水有功增秩以勸天下丙午太白晝見行保馬法六月壬子曾公亮以太傅致仕癸亥詔以四場試進士丙寅作京城門銅魚符乙亥置武學秋七月壬寅初以文臣兼樞密都承旨閏月庚戌遣中書檢正官章惇察訪荆湖北路詔入內供奉官以下已有養子更養次子爲內侍者斬八月甲申太子少師致仕歐陽修薨秦鳳路沿邊安撫王韶復武勝軍丁亥詔求歐陽修所撰五代史壬辰以武勝軍爲鎮洮軍癸巳遣崔台符等賀遼主生辰正旦乙未詔侍從及諸路監司各舉有才行者一人甲辰王韶破木征于鞏令城頌方田均稅法九月癸丑許宗室試換文資癸亥始御便殿旬校諸軍武技丙寅少華山崩詔壓死者賜錢貧者官爲葬祭淮南分東西路冬十月戊戌升鎮洮軍爲熙州鎮洮軍節度置熙河路減秦鳳囚罪一等十一月癸丑河州首領瞎藥等來降以爲內殿崇班賜姓名包約丁卯貶權監察御史裏行張英監荆南稅壬申分陝西爲永興秦鳳路仍置六路經略司章惇開梅山置安化縣十二

月丙子赦亡命荆湖溪洞者丁丑詔太原置弓箭手戊寅詔寺觀奉聖祖及祖宗陵寢神御者免役錢改温成廟爲祠壬午陳升之爲樞密使癸未兩土乙未築熙州南北關及諸堡砦己亥遼遣蕭瑜等來賀正旦

六年春正月辛亥復禧祖爲太廟始祖以配感生帝祧順祖于夾室二月辛卯夏人寇秦州都巡檢使劉惟吉敗之丙申永昌陵上宮東門火王韶復河州獲木征妻子壬寅以韓絳知大名府三月己酉詔贈熙河死事將田瓊禮賓使錄其子三人孫一人庚戌親策進士置經局命王安石提舉辛亥試明經諸科丙辰以四月朔日當食自丁巳避殿減膳降天下囚罪一等流以下釋之己未置諸路學官壬戌賜奏名進士諸科及第出身五百九十六人甲子交州來貢丁卯宰相上表請復膳不許詔進士諸科並試明法注官戊辰置刑獄檢法官庚午封李日尊子乾德爲交阯郡王夏四月甲戌朔日食不見乙亥御殿復膳西南龍蕃諸夷來貢置律學丁丑遼遣耶律寧等來賀同天節甲午定齊徐等州保甲戊戌裁定在京吏祿五月癸卯朔播州楊貴遷遣子光震來貢以光震爲

三班奉職戊申禱雨乙丑詔京東路察士人有行義者以聞遣中書檢正官熊本措置瀘夷西京左藏庫副使景思忠等攻燒遂州夷囤戰歿錄其子昌符等七人軍士死者賜其家錢帛有差辛未西南龍蕃來貢六月己亥置軍器監秋七月乙巳詔京西淮南兩浙江西荆湖等六路各置鑄錢監丙午大食陀婆離來貢己酉禱雨甲寅錄在京囚死罪以下降一等杖罪釋之丁巳詔沿邊吏殺熟戶以邀賞者戮之乙丑分河北爲東西路丙寅夜西北有聲如磴八月壬申朔遣賈昌衡等賀遼主生辰正旦甲申罷簡州歲貢綿紬甲午賜熙河涇原軍士特支錢戊戌復比閭族黨之法九月壬寅置兩浙和糴倉立斂散法戊申詔興水利辛亥策武舉戊午岷州首領木令征以其城降王韶入岷州丙寅太白犯斗戊辰詔禱雨決獄冬十月辛未章惇平懿洽州蠻辛巳以復熙河洮岷疊宕等州御紫宸殿受羣臣賀解所服玉帶賜安石甲申朝獻景靈宮丙戌振兩浙江淮饑壬辰行折二錢丁酉遣使瘞熙河戰骨十一月癸丑中太一宮成減天下囚罪一等流以下釋之乙卯親祀太一宮丙寅大雪詔京畿收養老弱凍

餒者十二月戊子詔決開封府囚丙申遼遣耶律洞等來賀正旦

七年春正月辛亥賞復岷洮等州功西京左藏庫使桑湜等遷官有差壬子幸

中太一宮宴從臣又幸大相國寺御宣德門觀燈乙卯封皇子俊爲永國公甲

子熊本平瀘夷二月辛未于闐來貢發常平米振河陽饑民癸未詔三司歲會

天下財用出入之數以聞己丑禱雨辛卯置客省引進四方館閣門使副等員

乙未知河州景思立等與青宜結鬼章戰于踏白城敗死廢遼州三月壬寅木

征鬼章寇岷州高遵裕遣包順等擊走之慮囚減死罪一等杖以下釋之癸卯

以旱避殿減膳乙巳白虹貫日丙午遣使分行諸路募武士赴熙河庚戌詔熙

河死事者家給錢有差罷兩浙增額預置紬絹令諸路監司察留獄癸丑羣臣

表請復膳不許丙辰遼遣林牙蕭禧來言河東疆界命太常少卿劉忱議之己

未行方田法甲子遣使報聘于遼乙丑詔以災異求直言夏四月癸酉以旱罷

方田是日雨遼遣耶律永寧等來賀同天節乙亥王韶破西蕃於結河川丙子

御殿復膳己卯以高遵裕爲岷州團練使甲申詔邊兵死事無子孫者廩其親

屬終身乙酉王韶進築珂諾城與蕃兵連戰破之斬首七千餘級焚三萬餘帳
木征率酋長八十餘人詣軍門降雨雹丙戌王安石罷知江寧府以韓絳同中
書門下平章事監修國史翰林學士呂惠卿參知政事置沅州丁酉詔王韶發
木征及其家赴闕遼遣樞密副使蕭素議疆界于代州境上五月戊戌朔減熙
河路囚罪一等流以下釋之辛丑詔河州瘞蕃部暴骸壬寅雨雹癸卯大雨雹
辛亥罷賢良方正等科乙丑大雨水壞陝平陸二縣六月戊寅賜討洮州將士
特支錢丁亥作渾儀浮漏廣州鳳皇見以木征爲榮州團練使賜姓名趙思忠
秋七月癸卯羣臣四上尊號曰紹天憲古文武仁孝皇帝不許癸亥詔河北兩
路捕蝗又詔開封淮南提點提舉司檢覆蝗旱以米十五萬石振河北西路災
傷八月丁丑賜環慶安撫司度僧牒以募粟振漢蕃饑民遣張芻等賀遼主生
辰正旦辛卯詔免淮南開封府來年春夫除放邢洛等州秋稅癸巳置場於南
薰安上門給流民米集賢院學士宋敏求上編修閣門儀制九月戊戌以時雨
降詔河北京西陝西淮南等路勸民趨耕有因事拘繫者釋之壬子三司火癸

丑置京畿河北京東西路三十七將甲寅詔樞密院議邊防冬十月壬申詔韓琦富弼文彥博曾公亮條代北事宜以聞戊寅詔浙西路提舉司出米振常潤州饑庚辰置三司會計司以韓絳提舉辛巳以河北災傷減州軍文武官員癸巳以常平米於淮南西路易饑民所掘蝗種又振河北東路流民十一月己未祀天地于圜丘赦天下十二月丙寅省熙河岷三州官百四十一員丁卯文武官加恩己丑遼遣耶律寧等來賀正旦是歲高麗入貢清井長寧夷十郡及武都夷內附

八年春正月庚子蔡挺罷判南京留司御史臺馮京罷知亳州丙午分京東爲東西路輟江南東路上供米均給災傷州軍丁未御宣德門觀燈乙卯詔出使廷臣所至采吏治能否以聞雨木冰戊午詔所在流民願歸業者州縣齎遣之己未洮西安撫司以歲旱請爲粥以食羸戶飢者二月甲子增陝西錢監改鑄大錢癸酉以王安石同中書門下平章事戊寅詔樞密副都承旨張誠一等以李靖營陣法教殿前馬步軍乙酉初行河北戶馬法丙戌停京畿土功七年三

月丁酉振潤州饑戊戌知河州鮮于師中乞置蕃學教蕃酋子弟賜田十頃歲
給錢千緡增解進士二人從之庚子遼蕭禧再來遣韓績往河東會議癸丑知
制誥沈括報聘復振常潤饑民戊午太白晝見夏四月乙丑詔減將作監冗官
丁卯遼遣耶律景熙等來賀同天節乙亥正禧祖禘裕東嚮位戊寅以吳充爲
樞密使壬午湖南江水溢閏月乙未陳升之罷爲鎮江軍節度使判揚州廣源
州劉紀寇邕州歸化州儂智會敗之壬寅沈括上奉元曆癸卯以宣徽北院使
張方平判永興軍分秦鳳路兵爲四將壬子沂州民朱唐告前餘姚縣主簿李
逢謀反辭連右羽林大將軍世居及河中府觀察推官徐革命御史中丞鄧綰
知諫院范百祿御史徐禧雜治之獄具世居賜死逢革等伏誅甲寅錄趙普後
乙卯詔西南蕃五姓蠻五年一入貢五月辛酉朔慮囚降死罪一等杖以下釋
之甲子分環慶兵爲四將丁丑兩土及黃毛甲申熙河路蕃官殿直頓埋謀叛
伏誅己丑遣使振鄜延環慶饑六月乙未日上有五色雲丙午醜汴水入蔡河
以通漕己酉頒王安石詩書周禮義于學官辛亥以安石爲尙書左僕射兼門

下侍郎戊午太師魏國公韓琦薨己未以琦配饗英宗廟庭秋七月甲子處州江水溢戊寅太白晝見戊子分涇原兵爲五將命韓縝如河東割地八月庚寅朔日當食雲陰不見癸巳募民捕蝗易粟苗損者償之仍復其賦丙申遣謝景溫等賀遼主生辰正旦減官戶役錢之半詔發運司體實淮南江東兩浙米價州縣所存上供米毋過百萬石減直予民斗錢勿過八十庚戌韓絳罷發河北京東兵及監牧卒修都城丁巳大閱九月庚申朔王安石兼修國史立武舉絕倫法冬十月庚寅呂惠卿罷知陳州乙未彗出軫己亥詔以災異數見不御前殿減常膳求直言壬寅赦天下罷手實法丁未彗不見丙辰御殿復膳十一月戊寅交趾陷欽州壬午立陝西蕃丁法甲申交趾陷廉州丙戌渝州改南平軍十二月丙申濬河壬寅以翰林學士元絳參知政事龍圖閣直學士曾孝寬簽書樞密院事辛亥天章閣待制趙高爲安南道招討使嘉州防禦使李憲副之以討交趾癸丑遼遣耶律世通等來賀正旦甲寅熙河路木宗城首領結彪謀叛熟羌日脚族青廝扒斬其首來獻補下班殿侍

九年春正月乙丑雨水冰戍辰交阯陷邕州知州蘇緘死之己卯下溪州刺史彭師晏及天賜州降庚辰遣使祭南嶽南海告以南伐辛巳贈蘇緘奉國軍節度使諡忠勇以其子子元爲西頭供奉官閤門祇候二月戊子宣徽南院使郭逵爲安南道招討使罷李憲以趙高副之詔占城占臘合擊交阯己丑宗哥首領鬼章寇五牟谷蕃官蘭氈訥支等邀擊大破之己亥以出師罷春宴乙卯兩霄三月丙辰朔進仁宗婉容周氏爲妃辛酉御集英殿策進士恤欽廉邕三州死事家瘞戰亡士賊所蹂踐除其田征甲戌賜進士諸科及第出身五百九十六人丁丑以廣西進士徐伯祥爲右侍禁欽廉白州巡檢宗哥首領鬼章寇五牟谷熙河鈐轄韓存寶敗之庚辰以种諤知岷州夏四月辛卯遼遣耶律庶幾等來賀同天節乙未以遼主母喪罷同天節上壽戊戌復廣濟河漕癸卯詔廣南亡沒士卒及百姓爲賊殘破者轉運安撫司具實并議振恤以聞甲辰給空名告身付安南以招降賞功詔諸路募武勇赴廣西贈廣西死事將士官有差丙午遣王苑臣等弔慰于遼辛亥茂州夷寇邊遣內副押班王中正經制甲寅

遼遣耶律孝淳以國母喪來告帝發哀成服輟視朝七日五月丙辰朔詔邕州沿邊州峒首領來降者周惠之癸亥試諸醫學生丙寅分兩浙爲東西路丁卯城茂州壬申詔安南諸軍過嶺有疾者所至護治丙子大理國來貢庚辰靜州下首領董整白等來降六月丁亥詔安南將吏視軍士有疾者月以數聞己丑綿州都監王慶崔昭用劉珪左侍禁張乂援戰茂州死之詔慶等子與借職女出家夫與奉職白丁王禹錫等二人賜錢其家辛卯詔濱海富民得養蜒戶毋致爲外夷所誘己亥慮囚降死罪一等杖以下釋之癸卯以水源等洞蠻主儂賀等七人爲定遠寧遠將軍秋七月丙辰朱崖軍黎賊黃嬰入寇詔廣南西路嚴兵備之庚申關以西蝗蝻蚘蚘生壬戌築下溪州改名會溪城癸亥靜州將楊文緒結蕃部謀叛王中正斬之以徇詔廣西死事官無子孫者許立後乙丑詔自今遇大禮推恩官昭憲太后族一人是月安南行營次桂州郭達遣鈐轄和斌等督水軍涉海自廣東入諸軍自廣南入八月甲申朔齊州監務左班殿直孫紀死賊錄其一子爲三班借職戊子以文彥博守太保兼侍中行太原尹

己丑遣程師孟等賀遼主生辰正旦罷鬻祠廟錢丁酉禁北邊民闌出穀粟庚子占城來貢九月戊午濬汴河丙寅詔罷都大制置河北河防水利司己卯遼遣使回謝詔恤嶺南死事家表將士墓冬十月乙酉太白晝見乙未詔東南諸路教閱新軍丙午王安石罷判江寧府以吳充監修國史王珪爲集賢殿大學士並同中書門下平章事資政殿學士馮京知樞密院辛亥除放沅州歸明人戶去年倚閣秋稅十一月乙卯賜廣南東路空名告敕募入錢助軍辛酉錄唐相魏徵後同州司士參軍道嚴流內銓特免試注官乙亥以安南行營將士疾疫遣同知太常禮院王存禱南嶽遣中使建祈福道場己卯洸東安撫司言包順等破鬼章兵於多移谷壬午鬼章寇岷州知州种諤等敗之鐵城十二月丙戌安南僞觀察使劉紀降置司農丞庚寅子傭生丁酉詔岷州界經鬼章兵燹者賜錢脅從來歸者釋其罪癸卯郭逵敗交趾於富良江獲其僞太子洪真李乾德遣人奉表詣軍門降遼遂班師丁未遼遣耶律運等來賀正旦庚戌詔有得鬼章泠鷄朴首者賞之置威戎軍

十年春正月乙丑御宣德門觀燈戊辰仙韶院火不視朝己巳白虹貫日二月甲申以崇信軍節度使宗旦同中書門下平章事戊子以鬼章敗种諤等賞官有差辛卯日中有黑子甲子詔宗室使相雖及十年更不取旨磨勘丁酉詔諸州歲以十一月給老疾貧乏者粟盡三月乃止己亥以王韶知洪州丙午以復廣源蘇茂等州羣臣表賀赦廣州囚罪一等徒以下釋之賜行營諸軍錢民緣征役者恤其家以廣源州爲順州赦李乾德罪以郭逵判潭州趙高知桂州己酉以交趾降赦廣南東路荆湖南路繫囚餘各降一等徒以下釋之三月辛未慮囚降死罪一等杖以下釋之壬申詔州縣捕蝗夏四月辛巳復置憲州乙酉遼遣蕭儀等賀同天節癸巳文州蕃賊寇邊州兵擊走之丁酉賜熙河路兵特支錢戰死者賜帛免夏秋稅五月戊午詔修仁宗英宗史甲戌太白晝見六月壬午注輦國朝貢癸巳王安石以使相爲集禧觀使丁未置泯州鐵城堡秋七月甲寅禱雨丁巳令諸路歲上縣令課績辛酉羣臣五上尊號曰奉天憲古文武仁孝皇帝不許乙亥郭逵以安南失律貶爲左衛將軍丙子河決澶州曹村

婦八月壬寅詔潭州置將及增武臣一員遣蘇頌等賀遼主生辰正旦甲辰詔侍從臺諫監司各舉文臣有才行者一人九月庚戌詔河決害民田所屬州縣疏濬仍蠲其稅老幼疾病者振之乙卯詔諸傳宣內批面諭事無法守並從中書樞密覆奏其祈恩澤規免罪者劾之辛酉詔鎮戎德順軍各置都監一員癸酉立義倉甲戌宗樸兼侍中封濮陽郡王冬十月戊寅朔宗樸薨癸巳昭化軍節度使宗誼封濮國公詔濮王子以次襲封奉祀戊戌太子太師張昇卒十一月庚午以西蕃邈川首領董氈都首領青宜結鬼章爲廓州刺史阿令骨爲松州刺史甲戌祀天地于圜丘赦天下十二月丁丑朔占城國獻馴象壬午詔改明年爲元豐甲申以郊祀文武官加恩丁亥封子傭爲均國公辛丑遼遣耶律孝淳等來賀正旦

元豐元年春正月乙卯以王安石爲尙書左僕射舒國公集禧觀使戊午命詳定郊廟禮儀詔減陳留捧日天武等軍剩員庚申御宣德門召從臣觀燈乙丑以太皇太后疾驛召天下醫者閏月辛巳以翰林侍讀學士寶文閣學士提點

中太一宮呂公著兼端明殿學士己丑詔贈尙書令韓琦依趙普故事壬辰樞密直學士孫固同知樞密院事己亥太傅兼侍中曾公亮薨庚子日中有黑子癸卯以公亮配饗英宗廟庭二月庚戌濮國公宗誼薨甲寅以邕州觀察使宗暉爲淮康軍節度使封濮國公戊辰詔赦安南戰棹都監楊從先等仍論功行賞三月辛巳慮囚降死罪一等杖以下釋之御邇英閣沈季長進講周禮八法癸未詔內文武官各舉堪應武舉一人廣南西路經略司乞教閱峒丁從之乙未御崇政殿閱諸軍辰沅瑤賊寇邊州兵擊走之夏四月己酉遼遣耶律承寧等來賀同天節丙辰詔增置兩浙路提舉官庚申詔除九經外餘書不得出界癸亥太白晝見乙丑封號國公宗諤爲豫章郡王戊辰塞曹村決河名其埽曰靈平五月甲戌朔賜塞河役死家錢乙亥詔試中刑法官以次推恩六月癸卯朔日有食之乙巳詔以靈平功遷太常博士苗師中等各一官秋七月癸酉朔命西上閣門使忠州團練使韓存寶經制瀘州納溪夷己亥詔齊州預備水災辛丑夔州言甘露降八月癸卯西邊將訥兒溫祿尊謀反伏誅丁未詔河北

被水者蠲其租甲寅遣黃履等賀遼主生辰正旦戊午以韓絳爲建雄軍節度使己巳詔濱棣滄三州被水民以常平糧貸之庚午詔青齊淄三州給流民食九月癸酉交趾來貢癸未李乾德表乞還廣源等州詔不許乙酉以端明殿學士呂公著樞密直學士薛向並同知樞密院事詔祀天地及配帝並用特牲是月武康軍嘉禾生河中府甘露降冬十月庚戌定秋試諸軍賞格侍禁忤全死事錄其弟宣爲三班借職辛亥韓存寶破瀘夷後城十有三圍癸亥于闐來貢十一月己丑命龍圖閣直學士宋敏求等詳定正旦御殿儀注癸巳辰州獠賊叛詔沅州兵討之己亥罷文武功臣號是月梁縣嘉禾生十二月丙午日中有黑子凡十二日辛亥錄囚降死罪一等杖以下釋之丙辰詔青州民王贇以復父讎免死刺配鄰州戊午置大理寺獄己未詔罷都大提舉在京諸司庫務司甲子以婉容邢氏爲賢妃詔罷三司推勘公事官減軍器監勾當公事審官東院流內銓及將作監三班院主簿左右軍巡判官丙寅遼遣耶律隆等來賀正

二年春正月乙亥罷岢嵐火山軍市馬丙子詔立高麗交易法壬午以容州管內觀察使上柱國南陽郡開國公楊遂爲寧遠軍節度使癸未詔知沅州謝麟督捕獠賊甲申御宣德門觀燈丁亥詔以經義論試宗室甲午京兆府學教授蔣夔乞以十哲從祀孔子從之詔辰州敘浦縣置龍潭堡是月潁州壽州甘露降二月甲寅詔瘞漢州暴骸日中有黑子乙卯以瀘州夷乞弟犯邊詔王光祖等討之丙辰詔定解鹽歲額乙丑滄州饑發倉粟振之三月庚午朔董氈遣使來貢辛未詔給地葬畿內寄敢之喪無所歸者官瘞之庚辰親試禮部進士壬午試特奏名進士及武舉癸未試諸科明法賜董氈緡錢銀帛對衣金帶等物丙戌詔雄州兩輪戶南徙者諭令復業庚寅疏汴洛夏四月辛丑幸金明池觀水嬉宴射瓊林苑甲辰遼遣蕭晟等來賀同天節丁巳陳升之以檢校太尉依前同中書門下平章事鎮江軍節度使上柱國秀國公致仕己未陳升之卒癸亥定正旦御殿儀甲子詔增審刑院詳議詳斷官罷刑部校法官是月南康軍甘露降眉州生瑞竹五月丙子順州蠻叛峒兵討平之庚辰詔以濮安懿王三

夫人並稱王夫人祔濮國辛巳太子太師致仕趙概上所集諫林甲申元絳罷知亳州乙酉詔安南軍死事孤寡廩給之戊子御史中丞蔡確參知政事六月甲辰廣西捕斬儂智春執其妻子以獻戊申命蔡確參定編修傳法寶錄癸丑詔五路帥臣副總管軍臣僚各舉任將領及大使臣者二人甲寅清汴成辛酉詔鎮寧軍節度使魏國公宗懿追封舒王是月南康軍甘露降忠州兩豆秋七月甲戌張方以太子少師致仕戊寅詳定朝會儀己卯命中書句考四方詔獄庚辰以淮康軍節度使宗暉同中書門下平章事丁亥詳定郊廟禮儀是月陳州芝草生南賓縣兩豆瓊州甘露降八月丙申朔夏人寇綏德城都監李浦敗之辛丑分涇原路兵爲十一將壬寅復分作司爲東西兩司各置監官文臣一員武臣二員遣李清臣等賀遼主生辰正旦甲寅詔增太學生舍爲八十齋齋三十人外舍生二千人內舍生三百人月一私試歲一公試補內舍生間歲一舍試補上舍生以潁州爲順昌軍節度是月曹州生瑞穀河陽生芝草九月癸未降順昌軍囚罪一等徒以下釋之甲申西南龍蕃來貢丁亥大宴集英殿

己丑進婕妤朱氏爲昭容壬辰出馬步射格鬪法頒諸軍甲午西南羅蕃方蕃來貢冬十月丙申西南石蕃來貢癸卯置籍田令詔立水居船戶五戶至十戶爲一甲戊申交趾歸所掠民詔以順州賜之己酉太皇太后疾上不視事庚戌罷朝謁景靈宮命輔臣禱于天地宗廟社稷減天下囚死罪一等流以下釋之乙卯太皇太后崩戊午詔易太皇太后園陵曰山陵辛酉以羣臣七上表始聽政命王珪爲山陵使十一月癸未始御崇政殿丁亥兩土十二月乙巳御史中丞李定上國子監敕式令并學令凡百四十條丙午復置御史六察庚申遼遣蕭寧等來賀正旦是月全州芝草生桂州甘露降

宋史卷十五

宋史卷十五

薛平字元甫五原人全德文章壯烈少壯氣

在平家上馬子遺錄是公本單今共百四十餘箇千餘寶時史大業與中

魏王魏徵山魏徵十一日將未識薛平魏徵丁亥兩六十二日心身中

志取大皇大武德九年魏徵大皇大武德九年魏徵曰山魏徵等知魏徵之

薛平薛平字元甫五原人全德文章壯烈少壯氣在平家上馬子遺錄是公

為一甲六甲交相魏徵薛平天武德九年魏徵曰山魏徵等知魏徵之

來貞孝十且丙申西魏薛平薛平薛平薛平薛平薛平薛平薛平薛平薛平

行五道魏徵薛平薛平薛平薛平薛平薛平薛平薛平薛平薛平薛平薛平

宋史卷十六

元中書右丞相總裁脫脫等修

本紀第十六

神宗三

三年春正月乙丑朔以大行太皇太后在殯不視朝癸酉陞許州爲潁昌府丙子降潁昌囚罪一等徒以下釋之戊寅上太皇太后謚曰慈聖光獻戊子詔審刑院刑部斷議官失入者歲具數罰之己丑高麗國遣使來貢白虹貫日辛卯于闐國大首領阿令顛顛溫等來貢癸巳白虹貫日二月丙午以翰林學士章惇參知政事丙辰始御崇政殿視朝丁巳命輔臣禱雨三月乙丑工部侍郎同平章事吳充罷爲觀文殿大學士西太一宮使癸酉葬慈聖光獻皇后于永昭陵丙子南丹州入貢以刺史印賜之乙酉祔慈聖光獻皇后神主于太廟戊子降兩京河陽囚罪一等民緣山陵役者蠲其賦己丑以慈聖光獻皇后弟昭德軍節度使曹佺爲司徒兼中書令改護國軍節度使餘親屬加恩有差夏四月

乙未觀文殿大學士吳充薨丁酉封宗暉爲濮陽郡王濮安懿王子孫皆進官
一等己亥遼遣耶律永芳等來賀同天節乙巳以瀘州夷乞弟侵擾詔邊將討
之戊申乞弟寇戎州兵官王宣等戰歿甲寅罷羣牧行司復置提舉買馬監牧
司乙卯令御史分案諸路監司庚申詔御史臺六察以糾劾多寡爲殿最任滿
取旨升黜辛酉增國子監歲賜錢六千緡五月乙丑詔自今三伏內五日一御
前殿辛巳以賴昌進士劉堂上制盜十策授徐州蕭縣尉甲申復命韓存寶經
制瀘夷詔改都大提舉導洛通汴司爲都提舉汴河堤岸司是月青州臨胸益
都石化爲麪六月甲午日有五色雲戊戌詔省宗室教授存十三員丙午詔中
書詳定官制罷兵部勾當公事官詔河北河東陝西路各選文武官一員提舉
義勇保甲壬子詔罷中書門下省主判官歸其事於中書是月安州臨江軍產
芝及連理麥秋七月庚午河決澶州甲戌詔自今遇大禮罷上尊號癸未彗出
太微垣丙戌避殿減膳詔求直言丁亥罷羣神從祀明堂戊子太白晝見八月
乙巳罷省寺監官領空名者癸丑遣王存等賀遼主生辰正旦戊午彗不見九

月壬戌增宣祖定州東安墳地二十頃及守園戶丙寅御殿復膳乙亥正官名以開府儀同三司易中書令侍中同平章事特進易左右僕射自是以下至承務郎易祕書省校書郎正字將作監主簿有差檢校僕射以下及階散憲銜並罷詳在職官志辛巳大饗明堂以英宗配赦天下癸未薛向孫固並爲樞密副使乙酉詔卽景靈宮作十一殿以時王禮祀祖宗以王安石爲特進改封荆國公丙戌進封岐王顥爲雍王嘉王顥爲曹王並爲司空文彥博爲太尉封曹份爲濟陽郡王宗旦爲華陰郡王馮京爲樞密使薛向罷知潁州丁亥以呂公著爲樞密副使閏九月乙卯加文彥博河東永興軍節度使以富弼爲司徒十一月己丑朔日當食雲陰不見十二月甲辰遼遣蕭偉等來賀正旦

四年春正月乙未命步軍都虞候林廣代韓存寶經制瀘夷庚子詔試進士加律義辛亥于闐來貢馮京罷知河陽孫固知樞密院龍圖閣直學士韓縝同知樞密院事二月辛未置秦州鑄錢監己卯分東南團結諸軍爲十三將三月乙未詔在京官毋舉辟執政有服親癸卯章惇罷知蔡州甲辰以翰林學士張璪

參知政事乙巳命官閱九軍營陳法於京城南戊申大閱丙辰董氈遣使來貢
夏四月癸亥遼遣耶律祐等來賀同天節御延和殿閱試保甲己巳詔罷南郊
合祭天地自今親祀北郊如南郊儀有故不行則以上公攝事壬申慮囚山陰
縣主簿余行之謀反伏誅乙酉河決澶州小吳掃五月丁酉詔河東路提點刑
獄劉定專振被水民戊申封晉程嬰爲成信侯公孫杵臼爲忠智侯立廟于絳
州六月戊午河北諸郡蝗生癸未命提點開封府界諸縣公事楊景略提舉開
封府界常平等事王得臣督諸縣捕蝗秋七月己丑太白晝見庚寅西邊守臣
言夏人囚其主秉常詔陝西河東路討之甲午鄜延涇原環慶熙河麟府路各
賜金銀帶綿襖銀器鞍轡象笏甲辰韓存寶坐逗遛無功伏誅丁未大軍進攻
米脂砦己酉詔曾鞏充史館修撰專典史事詔內外官司舉官悉罷令大理卿
崔台符同尙書吏部審官東西三班院議選格八月乙卯朔罷中書堂選悉歸
有司丙辰詔蠲河北東路災傷州軍今年夏料役錢辛酉夏人寇臨州堡詔董
氈會兵伐之以金州刺史燕達爲武康軍節度使己巳復置滑州丁丑熙河經

制李憲敗夏人于西市新城獲酋首三人首領二十餘人庚辰又襲破于女遮
谷斬獲甚衆辛巳司馬光趙彥若上所修百官公卿年表十卷宗室世表三卷
九月乙酉董氈遣使來貢且言已遣首領洛施軍篤喬阿公等將兵三萬會擊
夏國李憲復蘭州古城戊子蘭州新順首領巴令謁等三族率所部兵攻夏人
撒捕宗城敗之己亥王珪上國朝會要壬寅閱河北保甲于崇政殿官其優者
三十六人甲辰詳定郊廟奉祀禮儀丙午詔諭夏主左右并嵬各部族諸郡首
領並許自歸戊申太白犯斗庚戌夏兵救米脂砦鄜延經略副使种諤率衆擊
破之辛亥种諤又敗夏人于無定川十月丁巳米脂砦降己未拂菻國來貢庚
申熙河兵至女遮谷與夏人遇戰敗之乙丑涇原兵至磨哆隘遇夏人與其統
軍梁大玉戰敗之追奔二十里斬大首領沒囉臥沙監軍使梁格鬼等十五級
獲首領統軍姪訖多埋等二十二人已巳入銀州庚午環慶行營經略使高遵
裕復通遠軍种諤遣曲珍等領兵通黑水安定堡路遇夏人與戰破之斬獲甚
衆癸酉復韋州乙亥李憲敗夏人于屈吳山丁丑曲珍與夏人戰于蒲桃山敗

之戊寅种諤入貢州詔諸將存撫降人辛巳史館修撰曾鞏乞收采名臣高士事迹遺文詔從之涇原節制王中正入宥州十一月癸未朔日有食之丁亥諸軍合攻靈州种諤敗夏人于黑水己丑李憲敗夏人于囉逋川辛卯种諤降橫河平人戶破石堡城斬獲甚衆辛丑師還癸卯种諤至夏州索家平兵衆三萬人以無食而潰丙午高遵裕以師還夏人來追遂潰十二月辛未林廣破乞弟于納江乙亥慈聖光獻皇后禫祭宰臣王珪等上表請聽樂不許自是五表乃從之戊寅遼遣蕭福全等來賀正旦

五年春正月癸未朔不受朝丙申御宣德門觀燈己亥白虹貫日庚子責授高遵裕鄧州團練副使本州安置乙巳作新渾儀浮漏辛亥詔再議西討以熙河經制李憲爲涇原熙河蘭會安撫制置使李浩權安撫副使二月癸丑朔頒三省樞密六曹條制詔廊延軍士病不能歸者賜其家絹十匹丙辰以乞弟平班師辛酉詔董氈首領結隣死者朝辭物給其子董訥支藺氈增賜絹百匹癸亥華陰郡王宗旦薨丁卯封武昌軍節度觀察留後宗惠爲江夏郡王癸酉以出

師赦梓州路減囚罪一等民緣軍事役者蠲其賦封董氈爲武威郡王丙子渤泥來貢三月壬辰親策進士甲午策武舉己亥以日當食避殿減膳赦天下降死罪一等流以下原之詔杭州歲脩吳越王墳廟壬寅鄜延路副總管曲珍敗夏人于金湯乙巳賜進士諸科出身千四百二十八人丙午雨土夏四月壬子朔日食不見甲寅御殿復膳丁巳遼遣耶律永端等來賀同天節己未沈括奏遣曲珍將兵綏德城應援討葭蘆塞左右見聚羌落詔從之乙丑以直龍圖閣徐禧知制誥權御史中丞癸酉官制成以王珪爲尙書左僕射兼門下侍郎蔡確爲尙書右僕射兼中書侍郎甲戌太中大夫章惇爲門下侍郎張璪爲中書侍郎翰林學士蒲宗孟爲尙書左丞翰林學士王安禮爲尙書右丞錄唐段秀實後復其家丁丑同知樞密院呂公著罷知定州五月辛巳朔行官制丁亥賞平蠻將士有差癸巳豐州卒張世矩等作亂伏誅其黨王安以母老詔特原之作尙書省戊戌詔兩省官人舉可任御史者各二人甲辰遣給事中徐禧治鄜延邊事六月辛亥朔環慶經略司遣將與夏人戰破之斬其統軍鬼名姝精鬼

副統軍訛勃遇甲寅王珪上兩朝史戊午詔修兩朝寶訓詔以成都路供給瀘州邊事曲赦免二稅甲子改翰林醫官院爲醫官局壬申交趾獻馴犀二癸酉豫章郡王宗諤薨戊寅曲珍等敗夏人于明堂川作天源河秋七月辛巳廣西經略司言知宜州王奇與賊戰敗績壬午詔罷大理寺官赴中書省讞案戊子詔御史中丞舒亶舉任言事或察官十人辛卯詔尙書考功員外郎蔡京編手詔庚子以蔡京爲起居郎仍同詳定官制丁未垂拱殿宴修史官己酉始建零壇祀上帝以太宗配八月庚戌朔封御侍武氏爲才人壬子進封均國公傭爲延安郡王以昭容宋氏爲賢妃庚申帝有疾詔歲以四孟月朝獻景靈宮辛未遣韓忠彥等賀遼主生辰正旦鳳州團練使种諤以行軍迂道降授文州刺史壬申詔罷增減幕職州縣官奉甲戌城永樂戊寅河決原武九月丁亥夏人三十萬衆寇永樂曲珍戰不利裨將寇偉等死之夏人遂圍城己丑帝以疾愈降京畿囚罪一等徒以下釋之壬辰遣使行視畿縣民被水患者乙未詔張世矩等將兵救永樂砦戊戌永樂陷給事中徐禧內侍李舜舉陝西轉運判官李稷

死之己亥詔客省引進四方館東西上閣門各置使副等職庚子安化蠻寇宜州知州王奇死之詔贈忠州防禦使辛丑賞董氈將士有差癸卯滑州河水溢冬十月辛亥洛口廣武大河溢甲寅知延州沈括以措置乖方責授均州團練副使隨州安置鄜延路副都總管曲珍以城陷敗走降授皇城使丙辰修定景靈宮儀乙丑詔贈永樂死事臣徐禧金紫光祿大夫吏部尚書李舜舉昭化軍節度使並賜諡忠愍李稷朝奉大夫工部侍郎入內高品張禹勤皇城使各推恩賜贈有差癸酉貶知太原府資政殿大學士呂惠卿知單州十一月戊寅朔罷御史察諸路壬午景靈宮成告遷祖宗神御癸未初行酌獻禮乙酉以奉安神御赦天下官與享大臣子若孫一人庚寅紫宸殿宴侍祠官十二月丁巳新樂成以賢妃周氏爲德妃辛酉塞原武決河丙寅休日御延和殿引進對官十人辛未西南龍蕃來貢壬申遼遣耶律儀等來賀正旦丙子錄永樂死事將皇城使寇偉等十三人及東上閣門副使景思誼等九十人贈賜有差

六年春正月丁丑朔御大慶殿受朝始用新樂儀鸞司徹幕屋壞毀玉輅甲申

白虹貫日丁亥朝獻景靈宮己丑層檀入貢庚寅御宣德門觀燈癸巳詔御史
六察罷上下半年更易法乙未詔修周漢以來陵廟乙巳御崇政殿閱武士丙
午封楚三閭大夫屈平爲忠潔侯二月丁未夏人數十萬衆攻蘭州鈐轄王文
郁率死士七百餘人擊走之丙辰以夏人犯蘭州貶熙河經略使李憲爲經略
安撫都總管以王文郁爲西上閣門使知蘭州副使李浩爲四方館使甲子詔
供備庫使高遵治西京左藏庫副使張壽各降一官三月辛卯夏人寇蘭州副
總管李浩以衛城有功復隴州團練使乙未休日御延和殿引進對官八人丙
申河東將薛義敗夏人于葭蘆西嶺戊戌以檢校太尉上柱國太原郡開國公
王拱辰爲武安軍節度使麟府州將郭忠詔等敗夏人于七離抑部詔行賞有
差己亥河東將高永翼敗夏人于真卿流部夏四月己酉朝獻景靈宮辛亥遼
遣蕭固等來賀同天節甲子禮部郎中林希上兩朝寶訓李浩敗夏人于巴義
谿辛未雨壬申御邇英閣蔡卞進講周禮五月丙子朔于闐入貢甲申以時
暑趣決開封大理獄庚寅以旱慮囚甲午夏人寇蘭州右侍禁韋定死之癸卯

詔賜資州孝子支漸粟帛是月夏人寇麟州知州訾虎敗之六月乙巳朔詔御
史臺六察各置御史一員癸丑詔御史中丞兩省官各舉可任言事或監察御
史五人閏月乙亥朔夏主秉常請修貢許之戊寅詔陝西河東毋輒出兵丙戌
詔內外文武各舉應武舉一人汴水溢丙申太師守司徒韓國公富弼薨諡文
忠秋七月乙卯祔孝惠孝章淑德章懷皇后于廟丙辰以四后祔廟降京畿囚
罪一等流以下原之孫固罷知河陽以同知樞密院韓績知樞密院戶部尙書
安燾同知樞密院戊午朝獻景靈宮八月丙子賜升祔陪祠官宴于尙書省己
卯太白晝見乙酉遣蔡京等賀遼主生辰正旦辛卯蒲宗孟罷王安禮爲尙書
左丞吏部尙書李清臣爲尙書右丞九月癸卯朔日有食之冬十月癸酉朔乘
常遣使上表請復修職貢乞還舊疆戊子封孟軻爲鄒國公癸巳會稽郡王世
清薨庚子尙書省成辛丑封馬援爲忠顯王十二月癸卯加上仁宗諡曰體天
法道極功全德神文聖武睿哲明孝皇帝英宗曰體乾應曆隆功盛德憲文肅
武睿神宣孝皇帝甲辰朝獻景靈宮乙巳朝享太廟丙午祀昊天上帝于圜丘

赦天下甲寅文彥博以太師致仕乙卯以觀文殿大學士韓絳爲建雄軍節度使庚申幸尙書省官執政五服內未仕者一人進尙書以下官一等

七年春正月丙午封洛州防禦使世準爲安定郡王癸丑夏人寇蘭州李憲等擊走之甲寅以賢妃朱氏爲德妃二月甲戌太師文彥博入覲置酒垂拱殿癸未進封濮陽郡王宗暉爲嗣濮王封宗晟爲高密郡王宗綽爲建安郡王宗隱爲安康郡王宗瑗爲漢東郡王宗愈爲華原郡王三月辛丑賜文彥博宴于瓊林苑帝製詩以賜之庚申御崇政殿大閱壬戌詔賜鬼章寫經紙還其所獻馬癸亥白虹貫日夏四月辛未大食國來貢乙亥遼遣蕭浹等來賀同天節丁丑賜饒州童子朱天錫五經出身丙戌景靈宮天元殿門生芝草六本壬辰朝獻景靈宮癸巳夏人寇延州安塞堡將官呂真敗之五月壬子慮囚降死罪一等杖以下釋之辛酉白虹貫日壬戌以孟軻配食文宣王封荀況揚雄韓愈爲伯並從祀詔諸路帥臣監司等舉大使臣爲將領六月丙子夏人寇德順軍巡檢王友死之辛卯江夏郡王宗惠薨秋七月甲辰伊洛溢河決元城丙午遣使振

恤賜溺死者家錢壬子朝獻景靈宮甲寅王安禮罷八月庚午詔王光祖遣人招諭乞弟許出降免罪補官是歲乞弟死辛巳遣陳睦等賀遼主生辰正旦九月壬寅西南龍蕃來貢乙巳三佛齊來貢乙丑夏人圍定西城熙河將秦貴敗之冬十月乙亥夏人寇熙河庚辰饒州童子朱天申對于睿思殿賜五經出身辛巳朝獻景靈宮戊子詔分畫交阯界以六縣二峒賜之乙未夏人寇靜邊砦涇原將彭孫敗之十一月丁酉朔寇清邊砦隊將白玉李貴死之甲辰夏國主秉常遣使來貢乙卯太白晝見十二月戊辰端明殿學士司馬光上資治通鑑以光爲資政殿學士降詔獎諭庚寅詔門下中書外省官同舉言事御史辛卯遼遣耶律襄等來賀正旦是歲河東饑河北水壞洛州廬舍蠲其稅

八年春正月戊戌帝不豫甲辰赦天下乙巳命輔臣代禱景靈宮乙卯分遣羣臣禱于天地宗廟社稷二月辛巳開寶寺貢院火丁亥命禮部鎖試別所癸巳上疾甚遷御福寧殿三省樞密院入見請立皇太子及請皇太后權同聽政許之三月甲午朔立延安郡王傭爲皇太子賜名煦皇太后權同處分軍國事乙

未赦天下遣官告于天地宗廟社稷諸陵丁酉皇太后命吏部尚書曾孝寬爲冊立皇太子禮儀使戊戌上崩于福寧殿年三十有八皇太子卽皇帝位尊皇太后爲太皇太后皇后爲皇太后德妃朱氏爲皇太妃太皇太后權同處分軍國事九月己亥上大行皇帝諡曰英文烈武聖孝皇帝廟號神宗十月乙酉葬于永裕陵

贊曰帝天性孝友其入事兩宮必侍立終日雖寒暑不變嘗與岐嘉二王讀書東宮侍講王陶講論經史輒相率拜之由是中外翕然稱賢其卽位也小心謙抑敬畏輔相求直言察民隱恤孤獨養耆老振匱乏不治宮室不事遊幸厲精圖治將大有爲未幾王安石入相安石爲人悻悻自信知祖宗志吞幽薊靈武而數敗兵帝奮然將雪數世之恥未有所當遂以偏見曲學起而乘之青苗保甲均輸市易水利之法旣立而天下洶洶騷動慟哭流涕者接踵而至帝終不覺悟方斷然廢逐元老擯斥諫士行之不疑卒致祖宗之良法美意變壞幾盡自是邪佞日進人心日離禍亂日起惜哉

宋史卷十六

宋

史

卷十六

本紀

八

中華書局聚

...

...

...

...

...

...

...

...

...

...

...

...

...

...

...

...

宋史卷十七

元中書右丞相總裁脫脫等修

本紀第十七

哲宗一

哲宗憲元繼道顯德定功欽文睿武齊聖昭孝皇帝諱煦神宗第六子也母曰
欽聖皇后朱氏熙寧九年十二月七日己丑生于宮中赤光照室初名傭授檢
校太尉天平軍節度使封均國公元豐五年遷開府儀同三司彰武軍節度使
進封延平郡王七年三月神宗宴羣臣于集英殿王侍立天表粹溫進止中度
宰相而下再拜賀八年二月神宗寢疾宰相王珪乞早建儲爲宗廟社稷計又
奏請皇太后權同聽政神宗首肯三月甲午朔皇太后垂簾于福寧殿諭珪等
曰皇子性莊重從學穎悟自皇帝服藥手寫佛書爲帝祈福因出以示珪等所
書字極端謹珪等稱賀遂奉制立爲皇太子初太子宮中常有赤光至是光益
熾如火戊戌神宗崩太子卽皇帝位己亥大赦天下常赦所不原者羣臣進秩

賜賚諸軍遣使告哀于遼白虹貫日庚子尊皇太后曰太皇太后皇后曰皇太后德妃朱氏曰皇太妃命宰臣王珪爲山陵使甲寅以羣臣固請始同太皇太后聽政己未賜叔雍王顥曹王顥贊拜不名令中外避太皇太后父遵甫名詔邊事稍重者樞密院與三省同議以進庚申尙書左僕射郇國公王珪進封岐國公顥進封揚王顥爲荆王並加太保弟寧國公佖爲遂寧郡王儀國公佖爲太寧郡王成國公佖爲咸寧郡王和國公似爲普寧郡王高密郡王宗晟漢東郡王宗瑗華原郡王宗愈安康郡王宗隱建安郡王宗綽並爲開府儀同三司太師潞國公文彥博爲司徒濟陽郡王曹佺爲太保特進王安石爲司空餘進秩賜致仕服帶銀帛有差辛酉詔顏子孟子配享孔子廟庭夏四月丙寅初御紫宸殿辛未蠲元豐六年以前逋賦甲戌加李乾德同中書門下平章事董氈檢校太尉詔曰先皇帝臨御十有九年建立政事以澤天下而有司奉行失當幾於煩擾或苟且文具不能布宣實惠其申諭中外協心奉令以稱先帝惠安元元之意乙亥詔以太皇太后生日爲坤成節丁丑召呂公著侍讀諭樞密中

書通議事都堂詔遵先帝制遣官察舉諸路監司之法庚辰呂惠卿遣兵入西
界破六砦斬首六百餘級辛巳遣使以先帝遺留物遺遼國及告卽位甲申水
部員外郎王諤非職言事坐罰金丙戌以蕃官高福戰死錄其子孫丁亥復蠲
舊年逋賦五月丙申詔百官言朝政闕失資政殿學士司馬光過闕入見丁酉
羣臣請以十二月七日爲興龍節壬寅城熙蘭通遠軍賜李憲趙濟銀帛有差
甲辰作受命寶丙午京師地震復置遼州庚戌王珪薨改命蔡確爲山陵使丙
辰賜禮部奏名進士諸科及第出身四百六十一人戊午以蔡確爲尙書左僕
射兼門下侍郎韓縝爲尙書右僕射兼中書侍郎章惇知樞密院司馬光爲門
下侍郎六月庚午賜楚州孝子徐積絹米丁亥詔中外臣庶許直言朝政闕失
民間疾苦秋七月戊戌以資政殿大學士呂公著爲尙書左丞詔府界三路保
甲罷團教丙午遼人來弔祭丙辰白虹貫日吏部侍郎熊本奏歸化儂知會異
同坐罰金罷沅州增脩堡砦八月乙丑詔按察官所至有才能顯著者以名聞
己巳鎮江軍節度使韓絳進開府儀同三司癸酉遣使賀遼主生辰正旦乙亥

以供奉王英戰死葭蘆錄其子九月戊戌以神宗英文烈武聖孝皇帝之諡告于天地宗廟社稷己亥上寶冊于福寧殿己酉遣使報謝于遼冬十月甲子夏國遣使進助山陵馬癸酉詔倣唐六典置諫官丁丑令侍從各舉諫官二人詔監察御史兼言事殿中侍御史兼察事罷義倉己卯詔均寬民力有司或致廢格者監司御史糾劾之河決大名乙酉葬神宗皇帝于永裕陵丙戌罷方田以夏國主母卒遣使弔祭十一月癸巳詔按問強盜欲舉自首者毋減丁酉祧翼祖祔神宗于太廟廟樂曰大明之舞辛丑減兩京河陽囚罪一等杖以下釋之民緣山陵役者蠲其賦己酉遼遣使賀卽位十二月壬戌于闐進獅子詔却之開經筵講魯論讀三朝寶訓罷太學保任同罪法丙寅夏人以其母遺留物馬白駝來獻辛未左僕射蔡確右僕射韓縝並遷秩加食邑揚王顥荆王顥並爲太傅壬申章惇司馬光等進秩有差甲戌罷後苑西作院乙亥詔執政侍臣講讀戊寅罷增置鑄錢監十有四乙酉遼遣蕭睦等來賀正旦是歲日有五色雲者六高麗大食入貢

元祐元年春正月庚寅朔改元丙子錄在京囚減死罪以下一等杖罪者釋之
丁未詔回賜高麗王鞍馬服帶器幣有加罷陝西河東元豐四年後凡緣軍興
添置官局丙辰久旱幸相國寺祈雨立神宗原廟戊午甘露降二月辛酉以河
決大名壞民田民艱食者衆詔安撫使韓絳振之乙丑修神宗實錄丁卯詔左
右侍從各舉堪任監司者二人舉非其人有罰庚午禁邊民與夏人爲市辛未
董氈卒以其子阿里骨襲河西軍節度使邈川首領庚辰夏人入貢辛巳刑部
侍郎蹇周輔坐變鹽法落職閏月庚寅蔡確罷以司馬光爲尙書左僕射門下
侍郎詔韓維呂大防孫永范純仁詳定役法壬辰以呂公著爲門下侍郎丙午
守尙書右丞李清臣爲尙書左丞試吏部尙書呂大防爲尙書右丞白虹貫日
丁未羣臣上太皇太后宮名曰崇慶殿曰崇慶壽康皇太后宮曰隆祐殿曰隆
祐慈徽庚戌賜于闐國王服帶器幣辛亥章惇罷甲寅詔侍從御史國子司業
各舉經明行修可爲學官者二人乙卯以吏部尙書范純仁同知樞密院事丙
辰掩京城暴骸罷諸州常平管勾官三月辛未詔毋以堂差衝在選已注官置

訴理所許熙寧以來得罪者自言命太學公試司業博士主之如春秋補試法
癸酉置開封府界提點刑獄一員乙亥罷熙河蘭會路經制財用司己卯復廣
濟河輦運辛巳詔民間疾苦當議寬恤者監司具聞以程頤爲崇政殿說書乙
酉許職事官帶職夏四月己丑韓縝罷辛卯詔諸路旱傷蠲其租壬辰以旱慮
凶癸巳王安石薨辛丑詔執政大臣各舉可充館閣者二人壬寅以呂公著爲
尙書右僕射兼中書侍郎文彥博平章軍國重事乙巳詔戶部裁冗費著爲令
李憲等以用兵失利爲劉摯所劾貶秩奉祠辛亥揚王顥荆王頽並特授太尉
詔遇科舉令升朝官各舉經明行修之士一人俟登第日與升甲罷謁禁之制
知誠州周士隆撫納溪洞民一千三百餘戶賜士隆銀帛癸丑定六曹郎官員
數五月丁巳朔以資政殿大學士韓維爲門下侍郎罷諸路重祿復熙寧前舊
制庚申夏人來賀卽位壬戌詔侍從臺官監司各舉縣令一人戊辰命程頤同
修立國子監條制己巳幸揚王荆王第官其子九人癸酉復左右天廡坊壬午
詔文彥博班宰相之上六月甲辰置春秋博士呂惠卿落職分司南京蘇州居

住戊申以富弼配享神宗廟庭庚戌太白晝見甲寅詔正風俗修紀綱勿理隱疵細故復置通利軍程頤上疏論輔養君德秋七月丁巳置檢法官辛酉設十科舉士法劉恕同修資治通鑑未沾恩而卒詔官其子乙丑夏國主秉常卒庚午夏國遣使賀坤成節八月辛卯詔常平依舊法罷青苗錢壬辰封弟偲爲祁國公甲午占城國遣使入貢壬子日傍有五色雲磁州穀異隴同穗九月丙辰朔司馬光薨己未朝獻景靈宮辛酉大享明堂以神宗配赦天下丁卯試中書舍人蘇軾爲翰林學士知制誥己卯張璪罷冬十月丙戌改衍聖公爲奉聖公庚寅太白晝見壬辰夏人來告哀庚子遣使弔祭十一月戊午以尙書左丞呂大防爲中書侍郎御史中丞劉摯爲尙書右丞乙亥于闐國遣使入貢庚辰蠲鹽井官溪錢十二月庚寅詔將來服除依元豐三年故事羣臣勿上尊號戊戌華州鄭縣小敷谷山崩戊申詔以冬温無雪決繫囚是歲河北楚海諸州水二年春正月乙丑封秉常子乾順爲夏國主戊辰詔舉人程試主司毋得於老莊列子書命題辛巳詔蘇轍劉攽編次神宗御製白虹貫日二月丁亥遣左司

諫朱光庭使河北振民被災者詔施黔戎瀘等州保甲監司免歲闋丁酉加賜于闐國金帶錦袍器幣己亥命吏部選人改官歲以百人爲額辛丑詔陝西河東行策應牽制法是月代州地震三月壬戌太皇太后手詔止就崇政殿受冊戊辰詔中外侍從歲舉郡各一人令御史臺察民俗奢僭者夏人遣使入謝癸酉奉安神宗神御于景靈宮宣光殿庚辰詔內侍省供奉官以下百人爲額夏四月丙戌交趾入貢丁亥鬼章子結齷齷寇洮東戊子慮囚己丑詔太師文彥博十日一議事都堂辛卯詔冬夏旱暵海內被災者廣避殿減膳責躬思過以圖消復丁酉以四方牒訴上尙書者或冤抑不得直令御史分察之己亥太皇太后以旱權罷受冊禮癸卯兩乙丑以徐州布衣陳師道爲亳州司戶參軍丁未復制科戊申御殿復膳李清臣罷五月癸丑夏人圍南川砦丁卯以劉摯爲尙書左丞兵部尙書王存爲尙書右丞壬申于闐入貢丁丑詔御史官闕中丞御史翰林學士兩省諫議大夫以上雜舉六月辛丑以安燾知樞密院事壬寅有星如瓜出文昌丙午邈川首領結藥來降授三班奉職秋七月辛亥詔戶部

修會計錄韓絳以司空致仕夏人寇鎮戎軍詔府界三路教閱保甲復課利場務虧額科罰丙辰罷諸州數外歲貢戊午以遼蕭德崇等賀坤成節曲宴垂拱殿始用樂庚申進封李乾德爲南平王辛酉改誠州爲渠陽軍辛未韓維罷八月辛巳程顥罷經筵權同管勾西京國子監癸未以西蕃寇洮河民被害者給錢粟死者賜帛其家詔復進納人改官舊法乙酉命呂大防爲西京安奉神宗御容禮儀使庚寅西南蕃遣人入貢癸巳以夏國政亂主幼強臣乙逋等擅權逆命詔諸路帥臣嚴兵備之庚子授西蕃首領心牟欽氈銀州團練使温溪心瓜州團練使辛丑涇原言夏人寇三川諸砦官軍敗之丁未岷州行營將种誼復洮州執蕃酋鬼章青宜結九月乙卯發太皇太后冊寶于大慶殿丙辰發皇太后皇太妃冊寶于文德殿己未夏人寇鎮戎軍丁卯禁私造金箔冬十月壬午奉安神宗御容于會聖宮及應天院癸未日有五色雲戊子恭謝景靈宮辛卯減西京囚罪一等杖以下釋之己亥西南龍張蕃遣人入貢庚子論復洮州功种誼等遷秩賜銀絹有差十一月丙辰復置漣水軍庚申獻鬼章于崇政殿

以罪當死聽招其子及部屬歸以自贖乙亥大雪甚民凍多死詔加振恤死無親屬者官瘞之罷內殿承制試換文資格丙子決囚十二月乙酉賜諸軍及貧民錢丙戌興龍節初上壽于紫宸殿己丑大寒罷集英殿宴壬辰兀征聲延部族老幼萬人渡河南遣使廩食之仍諭聲延勿失河北地乙未白虹貫日壬寅頒元祐敕令式是冬始閉汴口

二年春正月己酉朔不受朝庚戌復廣惠倉己未朝獻景靈宮庚申雪寒發京西穀五十餘萬石損其直以紓民辛酉詔廣南西路朱崖軍開示恩信許生黎悔過自新壬戌罷上元遊幸壬申阿里骨奉表詣闕謝罪令邊將無出兵仍罷招納甲戌決囚二月甲申罷修金明池橋殿乙酉德音減囚罪一等徒以下釋之工役權放一年流民飢貧量與應副丙戌詔河東苦寒量度存恤戌兵癸巳罷春宴乙未白虹貫日辛丑太白晝見乙巳廣東兵馬監童政坐擅殺無辜伏誅三月丙辰韓絳薨丁巳御集英殿策進士戊午策武舉己巳賜禮部奏名進士諸科及第出身一千一百二十二入乙亥夏人寇德靜砦將官張誠等敗之

夏四月戊寅令諸路郡邑具役法利害以聞辛巳以呂公著爲司空同平章軍國事呂大防爲尙書左僕射兼門下侍郎范純仁爲尙書右僕射兼中書侍郎壬午以觀文殿學士孫固爲門下侍郎劉摯爲中書侍郎王存爲尙書左丞御史中丞胡宗愈爲尙書右丞戶部侍郎趙瞻簽書樞密院事癸巳詔定職事官歲舉升陟人數丁酉阿里骨來貢庚子詔天下郡城以地里置壯城兵額禁勿他役五月癸亥漢東郡王宗瑗薨六月癸未詔司諫正言殿中監察御史倣故事以升朝官通判資序歷一年者爲之辛丑夏人寇塞門砦甲辰五色雲見秋七月戊申荆王顥薨戊辰夜東北方明如晝俄成赤氣中有白氣經天辛未太白晝見癸酉忠州言臨江塗井鎮雨黑黍八月戊寅阿里骨入貢己卯進封揚王顥爲徐王辛巳復置荆門軍丙戌罷吏試斷刑法丁酉渠陽蠻入寇辛丑降繫囚罪一等杖以下釋之九月庚申禁宗室聯姻內臣家乙丑阿里骨復遷職加封邑詔觀察使以上給永業田丁卯御集英殿策賢良方正能直言極諫科十月丙戌詔罷新創諸堡砦廢渠陽軍戊戌復南北宣徽院十一月甲辰遣吏

部侍郎范百祿等行河丁卯大食麻羅拔國入貢詔歲以十月給巡城兵衣裘
十二月丁酉渝州獵人寇小溪壬寅白虹貫日閏月癸卯朔頒元祐式甲辰范
鎮定鑄律度量鐘磬等以進令禮部太常參定戊申減宰執賜予庚申置六曹
尙書權官丙寅詔吏部詳定六曹重複利害以聞是歲三佛齊于闐西南蕃入
貢天下上戶部主戶二百一十三萬四千七百三十三丁二千八百五十三萬
三千九百三十四客戶六百一十五萬四千六百五十二丁三百六十二萬九
千八十三斷大辟二千九百一十五人

四年春正月壬申朔不受朝羣臣及遼使詣東上閣門內東門拜表賀丙子宴
遼使于紫宸殿甲申以夏人通好詔邊將毋生事二月甲辰呂公著薨庚戌白
虹貫日乙卯夏人來謝封冊三月己卯作渾天儀胡宗愈罷丁亥以不雨罷春
宴己丑詔自今大禮毋上尊號辛卯晝有流星出東方癸巳錄囚乙未罷幸瓊
林苑金明池夏四月乙巳呂大防等以久旱求罷不允丁未曹佺薨戊申罷大
禮使及奏告執政加賜戊午立試進士四場法壬戌弛在京牧地與民五月癸

酉詔自今侍讀以三人爲額中丞李常侍御史盛陶坐不論蔡確改官辛巳貶
觀文殿學士蔡確爲光祿卿丁亥復貶確爲英州別駕安置新州丁酉于闐國
來貢六月甲辰范純仁王存罷丙午以趙瞻同知樞密院事戶部尙書韓忠彥
爲尙書左丞翰林學士許將爲尙書右丞丁未夏國來貢癸丑邈黎國般次冷
移四林栗迷等齎于闐國黑汗王及其國蕃王表章來貢秋七月丙子詔復外
都水使者丁丑遼國使蕭寅等來賀坤成節曲宴垂拱殿庚辰安燾以母憂去
位八月壬寅敕郡守貳以四善三最課縣令吏部歲上監司考察知州狀辛酉
太皇太后詔今後明堂大禮毋令百官拜表稱賀九月戊寅致齋垂拱殿己卯
朝獻景靈宮辛巳大饗明堂赦天下百官加恩賜賚士庶高年九十以上者乙
酉加賜韓縝范純仁器幣有差乙未檢舉先朝文武七條戒諭百官遵守冬十
月辛丑西南程蕃入貢丁未龍蕃入貢戊申翰林學士蘇轍上神宗御集藏寶
文閣癸丑御邇英殿講官進講三朝寶訓十一月庚午敕朝請大夫以下進士
爲左餘爲右溪洞彭儒武等進溪洞布癸未以孫固知樞密院事劉摯爲門下

侍郎吏部尙書傅堯俞爲中書侍郎乙酉有星色赤黃尾跡燭地己丑太皇太后却元日賀禮令百官拜表庚寅張惇買田不法降官辛卯改發運轉運提刑預妓樂宴會徒二年法十二月庚子遼使耶律等賀與龍節曲宴垂拱殿癸丑更定朝儀二舞曰威加四海化成天下甲寅減鄜延等路戍兵歸營戊午以御史闕令中丞兩省各舉二人是歲夏國邈黎大食麻囉拔國入貢

五年春正月丁卯朔御大慶殿視朝丁丑朝獻景靈宮二月丁酉罷諸州軍通判奏舉改官己亥夏人歸永樂所掠吏士百四十九人庚子加溪洞人田忠進等九十二人檢校官有差辛丑以旱罷修黃河癸卯禱兩嶽瀆罷浚京城壕丁未減天下囚罪杖以下釋之庚戌文彥博以太師充護國軍山南西道節度等使致仕令所司備禮冊命壬子彥博乞免冊禮從之甲子宴餞文彥博于玉津園三月丙寅朔趙瞻薨丁卯詔賜故孫覺家緡錢令給喪事壬申以韓忠彥同知樞密院事翰林學士承旨蘇頌爲尙書左丞癸未罷春宴壬辰罷幸金明池瓊林苑夏四月癸卯詔鄭穆王巖叟等同舉監察御史二月甲辰呂大防等以

旱求退不允丙午孫固薨癸丑詔講讀官御經筵退留二員奏對邇英閣丁巳詔以旱避殿減膳罷五月朔日文德殿視朝辛酉以保寧軍節度使馮京爲檢校司空五月壬申詔差役法有未備者令王巖叟等具利害以聞乙亥兩己卯御殿復膳六月辛丑錄囚癸亥晝有五色雲七月壬申涇原路經略司言諸人違制典買蕃部田土許以免罪自二頃五十畝以下責其出刺弓箭手及買馬備邊用各有差乙酉夏人來議分畫疆界九月丁丑詔復置集賢院學士冬十月癸巳罷提舉修河司丁酉詔定州韓琦祠載祀典十二月辛卯朔許將罷安康郡王宗隱薨丙辰禁軍大閱賜以銀牒匹帛罷轉資是歲東北旱浙西水災賜宗室子授官者四十四人斷大辟四千二百六十有一高麗于闐龍蕃三佛齊阿里骨入貢

六年春正月辛酉朔不受朝羣臣及遼使詣東上閣門內東門拜表賀癸酉詔祠祭游幸毋用羔二月辛卯以劉摯爲尙書右僕射兼中書侍郎龍圖閣待制王巖叟簽書樞密院事癸巳以蘇轍爲尙書右丞宗室士俛追封魏國公庚子

拂箴國來貢丁丑授阿里骨男溪邦彪錢爲化外庭州團練使三月癸亥呂大防上神宗實錄己巳御集英殿策進士庚午策武舉癸酉詔御史中丞舉殿中侍御史二人翰林學士至諫議大夫同舉監察御史二人丙子呂大防特授右正議大夫壬午賜禮部奏名進士諸科及第出身九百五十七人丁亥罷幸金明池瓊林苑夏四月乙未復置通禮科丙申詔恤刑辛丑詔大臣堂除差遣非行能卓異者不可輕授仍搜訪遺材以備擢任夏人寇熙河蘭岷鄜延路壬寅太白晝見壬子賜南平王李乾德袍帶金帛鞍馬五月己未朔日有食之罷文德殿視朝庚辰詔娶宗室女得官者毋過朝散大夫皇城使丁亥從省上元祐敕令格六月壬辰錄囚甲辰置國史院修撰官乙卯詔以田思利爲銀青光祿大夫充溪洞都巡檢秋七月癸亥復張方平宣徽南院使致仕乙丑復制置解監使己卯振兩浙水災八月己丑三省進納后六禮儀制辛卯詔御史臺臣僚親亡十年不葬許依條彈奏及令吏部檢察己亥改宗正屬籍曰宗蕃慶系錄令文武臣出入京城門書職位差遺姓名及所往己酉修神宗寶訓癸丑詔鄜

延路都監李儀等以違旨夜出兵入界與夏人戰死不贈官餘官降等乙卯夏人寇懷遠砦閏月壬戌嚴飭陝西河東諸路邊備甲子太白晝見庚午詔御史中丞舉殿中侍御史二人翰林學士中書舍人給事中舉監察御史四人壬申太子太保致事張方平辭免宣徽使不允甲申刑部侍郎彭汝礪與執政爭獄事自乞貶逐詔改禮部侍郎九月丁亥夏人寇麟府二州壬辰詔州民爲寇所掠廬舍焚蕩者給錢帛踐稼者振之失牛者官貸市之癸巳御集英殿策賢良方正能直言極諫科丁酉御試方正王普等遷官有差歲出內庫緡錢五十萬以備邊費甲辰幸上清儲祥宮壬子宮成減天下囚罪一等杖以下釋之癸丑以執政官行謁禁法非便詔有利害陳述勿禁冬十月丁卯有流星晝出東北庚午朝獻景靈宮還幸國子監賜祭酒豐稷三品服監學官賜帛有差庚辰令諸宮院建小學貴妃苗氏薨癸未編修神宗御製官轉秩加賞詔京西提刑司歲給錢物二十萬緡以奉陵寢十一月乙酉朔劉摯罷壬辰作元祐觀天曆尙書右丞蘇轍罷知絳州辛丑傅堯俞薨十二月戊辰開封府火壬申范純仁以

前禦敵失策降官是歲兩浙水定州野蠶成繭高麗交趾三佛齊入貢

七年春正月甲辰以遼使耶律迪卒輟朝一日乙巳張誠一以穿父墓取犀帶責授左武衛將軍提舉亳州明道宮二月丁卯詔陝西河東邊要進築守禦城砦三月己亥錄囚夏四月己未立皇后孟氏甲子命呂大防爲皇后六禮使甲戌立考察縣令課績法五月戊戌御文德殿冊皇后庚子罷侍從官轉對丙午王巖叟罷知鄭州大食進火浣布六月辛酉以呂大防爲右光祿大夫蘇頌爲尙書右僕射兼中書侍郎韓忠彥知樞密院事蘇轍爲門下侍郎翰林學士范百祿爲中書侍郎翰林學士梁燾爲尙書左丞御史中丞鄭雍爲尙書右丞戶部尙書劉奉世簽書樞密院事甲子置廣文館解額戊辰渾天儀像成甲戌日旁五色雲見七月癸巳詔修神宗史復翰林侍講學士己酉詔諸路安撫鈐轄司及西京南京各賜資治通鑑一部庚戌宗室總麻以上者禁析居八月丙辰罷監酒稅務增剩給賞法己未詔西邊諸將嚴備毋輕出兵乙亥戒邊將毋掙克軍士前陷交趾將吏蘇佐等十七人自拔來歸九月戊戌詔冬至日南郊宜

依故事設皇地祇禮畢別議方澤之儀以聞己酉永興軍蘭州鎮戎軍地震冬十月庚戌朔環州地震丁巳陝西有前代帝王陵廟處給民五家充守陵戶丁卯夏人寇環州十一月辛巳太白晝見甲申詔大中大夫以上許占永業田丙戌于闐入貢庚寅帝齋大慶殿辛卯朝獻景靈宮壬辰饗太廟癸巳祀天地于圜丘赦天下羣臣中外加恩罷南京權酒民罹親喪者戶以差等與免徭辛丑賜徐王劍履上殿十二月辛亥阿里骨李乾德加食邑實封甲子罷飲福宴庚午祈雪是歲兗州僊源縣生瑞穀高麗占城西南蕃龍氏羅氏入貢

八年春正月己卯朔不受朝甲申蔡確卒丁亥御邇英閣召宰臣讀寶訓庚寅詔復范純仁大中大夫壬辰幸太乙宮庚子詔頒高麗所獻黃帝鍼經于天下二月己酉詔西南蕃龍氏遷秩補官辛亥禮部尚書蘇軾言高麗使乞買歷代史及策府元龜等書宜却其請不許省臣許之軾又疏陳五害極論其不可有旨書籍曾經買者聽壬子詔刑部不得分禁繫人數瘐死數多者申尚書省癸丑詔太寧郡王以下出就外學三月甲申蘇頌罷辛卯范百祿罷庚子詔御試

舉人復試賦詩論三題夏四月丁未朔夏人來謝罪願以蘭州易塞門砦不許
癸丑詔恤刑甲寅令范祖禹依先朝故事止兼侍講丁巳詔南郊合祭天地罷
禮部集官詳議五月癸未置蘄州羅田縣丁亥罷二廣鑄折二錢己丑錄囚辛
卯監察御史董敦逸黃慶基以論蘇軾蘇轍罷爲湖北福建轉運判官己亥祁
國公偲爲開府儀同三司六月戊午梁燾罷壬戌中書後從省上元祐在京通
用條貫秋七月丙子朔以觀文殿大學士范純仁爲尙書右僕射兼中書侍郎
戊寅令陝西沿邊鐵錢銅錢悉還近地八月丁未久雨禱山川辛酉以太皇太
后疾帝不視事壬戌遣使按視京東西河南北淮南北水災癸亥減京師囚罪一
等徒以下釋之丁卯禱于嶽瀆宮觀祠廟戊辰赦天下庚午詔陝西復鑄小銅
錢辛未禱于天地宗廟社稷乙亥禱于諸陵九月戊寅太皇太后崩己卯詔以
太皇太后園陵爲山陵庚辰遣使告哀于遼甲申命呂大防爲山陵使壬辰詔
山陵修奉從約諸道毋妄有進助冬十月戊申羣臣七上表請聽政戊辰徐王
顥乞解官給喪詔不允庚午復內侍劉瑗等六人十一月丙子始御垂拱殿乙

未以雪寒振京城民飢壬寅賜勞修奉山陵兵士十二月乙巳范純仁乞罷不
允甲寅倣唐六典修官制丁巳遼人遣使來弔祭出錢粟十萬振流民己巳上
太皇太后諡曰宣仁聖烈皇后是歲河入德清軍決內黃口

宋史卷十七

宋史卷十八

元中書右丞相總裁脫脫等修

本紀第十八

哲宗二

紹聖元年春正月癸酉朔羣臣詣西上閣門進名奉慰丙申夏人來貢辛丑遣
中書舍人呂希純等行河罷河東大銅錢二月丁未以戶部尚書李清臣爲中
書侍郎兵部尚書鄧潤甫爲尚書右丞己酉葬宣仁聖烈皇后于永厚陵己未
祔神主于太廟癸亥減兩京河陽鄭州囚罪一等民緣山陵役者蠲其賦甲子
詔依章獻明肅皇后故事罷避高遵惠諱三月壬申朔日有食之乙亥呂大防
罷庚辰詔大學合格上舍生推恩免省試附科場春榜乙酉御集英殿策進士
丁亥策武舉戊子以徐王顥爲太師徙封冀王癸巳詔振京東河北流民貸以
穀麥種諭使還業蠲是年租稅丁酉賜禮部奏名進士諸科及第出身九百七
十五人蘇轍罷夏四月乙巳朔阿里骨進獅子丙午以旱詔恤刑己酉詔中外

決獄庚戌詔有司具醫藥治京師民疾壬子蘇軾坐前掌制命語涉譏訕落職
知英州癸丑改元白虹貫日甲寅以王安石配饗神宗廟庭蔡確追復右正議
大夫戊午復新城兩廟庚申減四京囚罪一等杖以下釋之壬戌以資政殿學
士章惇爲尙書左僕射兼門下侍郎范純仁罷丙寅罷五路經律通禮科丁卯
詔諸路復元豐免役法戊辰同修國史蔡卞請重修神宗實錄閏月壬申復提
舉常平官癸酉罷十科舉士法甲申以觀文殿學士安燾爲門下侍郎丙戌復
義倉丁亥詔神宗隨龍人趙世長等遷秩賜賚有差戊子詔在京諸司所受傳
宣中批並候朝廷覆奏以行乙未西南張蕃遣人入貢丙申命左僕射章惇提
舉修神宗國史丁酉詔添差徐州兵馬都監五月壬寅罷修官制局甲辰罷進
士習試詩賦令專二經立宏詞科己酉修國史曾布請以王安石日錄載之神
宗實錄太白晝見辛亥劉奉世罷癸丑詔中外學官非制科進士上舍生入官
者並罷編類元祐羣臣章疏及更改事條甲寅右正言張商英言先帝謂天地
合祭非古詔禮部太常詳議以聞乙丑鄧潤甫卒丁卯嗣濮王宗暉薨六月甲

戊來之邵等疏蘇軾詆斥先朝詔謫惠州丙子罷置制解鹽使壬午封高密郡王宗晟爲嗣濮王癸未以翰林學士承旨曾布同知樞密院事甲申除進士引用王安石字說之禁秋七月丁巳以御史黃履周秩諫官張商英言奪司馬光呂公著贈諡王巖叟贈官貶呂大防爲祕書監劉摯爲光祿卿蘇轍爲少府監並分司南京梁燾提舉舒州靈仙觀戊午詔大臣朋黨司馬光以下各輕重議罰布告天下餘悉不問議者亦勿復言八月丙戌召輔臣觀稼後苑日有五色雲壬辰應制科趙天啓以累上書狂妄黜九月癸卯遣御史劉拯按河北水災振饑民丙午御集英殿策賢良方正能直言極諫科庚戌罷制科罷廣惠倉癸丑令監司歲察守臣課績優者以聞甲寅知廣州唐義問坐棄渠陽砦責授舒州團練副使庚申太白晝見丁卯詔京東西河北振恤流民戊辰流星出紫微垣冬十月丙申三佛齊遣使入貢丁酉河北流十一月己亥朔復入路差官法壬子以冬溫無雪決繫囚蔡確特追復觀文殿大學士甲寅開封男子呂安斤乘輿當斬貸之丁巳詔河北振饑諸路恤流亡官吏有善狀才能顯著者以聞

十二月辛未申嚴銅錢出外界法庚辰命諸路祈雪丙戌滑州浮橋火己丑漳河決溢浸洛磁等州令計置堙塞甲午范祖禹趙彥若黃庭堅坐史事責授散官永豐黔州安置是歲京師疫洛水溢太原地震河北水發京都粟振之

二年春正月甲辰詔國史院增補先帝御集丙午立宏詞科己未遷奉太平興國寺三朝御容于天章閣乙丑殿前司奏獄空詔賜緡錢二月乙亥呂大防以監修史事貶秩分司南京安州居住辛巳出內庫錢帛二十萬助河北振饑甲午罷廣文館解額三月己亥宗晟薨己未試宏詞黃符等五人各循一資夏四月戊辰詔職事官罷帶職朝請大夫以下勿分左右易集賢院學士爲集賢殿修撰直集賢院爲直祕閣集賢校理爲祕閣校理壬申封華容郡王宗愈爲嗣濮王詔許將等七人不限資格各舉才行堪備任使者二人丁亥詔依元豐條置律學博士二員五月乙巳命蔡卞詳定國子監三學及外州州學制乙卯上皇太妃宮名曰聖瑞六月壬辰禁京城土人輿轎秋七月丙辰詔大理寺復置右治獄仍依元豐例添置官屬八月壬申命彰信軍節度使宗景爲開府儀同

三司封濟陰郡王甲申宗愈薨乙酉錄趙普後希莊爲閣門祇候九月甲午以安定郡王宗綽爲嗣濮王壬寅告遷神宗神御于景靈宮顯承殿癸卯詣景靈宮行奉安禮戊申加上神宗諡曰紹天法古運德建功英文烈武欽仁聖孝皇帝己酉朝獻景靈宮庚戌朝饗太廟辛亥大饗明堂赦天下冬十月甲子鄭雍罷癸酉告遷宣仁聖烈皇后神御于景靈宮徽音殿甲戌詣宮行奉安禮以吏部尙書許將爲尙書左丞翰林學士蔡卞爲尙書右丞辛巳進封冀王顥爲楚王辛卯河南府地震十一月乙未安燾罷知河南府丙申太白晝見戊戌范鏐自轉運使入對言有捕盜功乞賜章服帝曰捕盜常職也何足言功黜知壽州甲寅梁惟簡除名全州安置丙辰贈蔡確爲太師賜諡忠懷十二月乙丑復置監察御史三人分領六察不言事令翰林學士蔡京御史中丞黃履各舉御史二人壬申白虹貫月戊子詔如元豐例孟月朝獻景靈宮是歲蘇州夏秋地震桂陽監慶雲見出宮女九十一人交趾三佛齊韋蕃阿里骨入貢

三年春正月庚子韓忠彥罷知真定府甲辰朝獻景靈宮遍詣諸殿如元豐禮

庚戌引見蕃官包順包誠等賜賚有差詔鞠獄非本章所指而蔓求他罪者論如律乙卯詔戶部尚書勿領右曹戊午詔罷合祭間因大禮之歲夏至日躬祭地祇於北郊二月癸亥出元豐庫緡錢四百萬于陝西河東糴邊儲辛未復元豐恤孤幼令癸酉罷富弼配饗神宗廟庭癸未詔封濮王子未王者三人宗楚爲南陽郡王宗祐爲景城郡王並開府儀同三司宗漢爲東陽郡王乙酉宗緯薨丙戌詔三歲一取旨遣郎官御史按察監司職事丁亥夏人寇義合砦三月壬辰以禁中屢火罷春宴及幸泚苑不御垂拱殿三日癸巳夏人圍塞門砦丁酉尚書省火戊午劍南東川地震己亥封宗楚爲嗣濮王辛亥封大寧郡王似爲申王遂寧郡王佶爲端王丁巳幸申王端王府夏四月辛酉罷宣徽使丙子詔自今景靈宮四孟朝獻分爲二日五月壬子太白晝見丙辰錄囚六月癸亥令真定立趙普廟乙酉立北郊齋宮於端聖園秋七月庚戌依元豐職事官以行守試三等定祿秩罷元祐所增聚義錢甲寅令熙河立王韶廟八月辛酉夏人寇寧順砦壬戌日上有五色暈下有五色氣己卯復置檢法官庚辰以范祖

禹劉安世在元祐中構造誣謗祖禹責授昭州別駕賀州安置安世新州別駕
英州安置九月己亥邈川首領阿里骨卒己酉滁沂二州地震壬子楚王顥薨
乙卯廢皇后孟氏爲華陽教主玉清妙靜仙師賜名冲真冬十月丁巳朔以楚
王薨罷文德殿視朝壬戌夏人寇鄜延陷金明砦戊辰詔被邊諸路相度城砦
要害增嚴守備辛未西南方雷聲雨雹癸酉鍾傳言築汝遮詔以爲安西城十
一月丁未章惇上神宗實錄庚戌宴修實錄官十二月辛酉宗景坐以立妾罔
上罷開府儀同三司判大宗正司事癸酉置施州鑄錢廣積監甲戌蔡京上新
修大學敕令式詳定重修敕令遺棄饑貧小兒三歲以下聽收養爲真子孫是
歲于闐大食龜茲師王國西南蕃龍氏羅氏入貢宗室子授官者四十六人
四年春正月丙戌朔不受朝羣臣及遼使詣東上閣門拜表賀班內外學制庚
寅以阿里骨子瞎征襲河西軍節度使邈川首領甲午涇原路鈐轄王文振敗
夏人于沒煙峽庚戌李清臣罷二月己未以三省言追貶呂公著爲建武軍節
度副使司馬光爲清遠軍節度副使王巖叟爲雷州別駕奪趙瞻傅堯俞贈諡

追韓維到任及孫固范百祿胡宗愈遺表恩詔江淮巡檢依舊法招置土兵癸亥于闐來貢黑汗王攻夏人三州遣其子以聞丙寅夏人寇綏德城庚午詔國信使毋得以非例之物遺人使仍著條禁癸酉詔申王佖端王佶歲賜錢各六千五百緡丙子進神宗婉儀宋氏爲賢妃己卯復元豐權茶法庚辰罷春秋科癸未以三省言追貶呂大防爲舒州團練使劉摯爲鼎州團練副使蘇轍爲化州別駕梁燾爲雷州別駕范純仁爲安武軍節度副使安置于循新雷化永五州劉奉世爲光祿少卿分司南京黜韓維以下三十人輕重有差甲申降文彥博爲太子少保閏月丙戌朔張天說坐上書詆訕先朝處死壬寅以曾布知樞密院事許將爲中書侍郎蔡卞爲尙書左丞吏部尙書黃履爲尙書右丞翰林學士林希同知樞密院事癸卯大雨雹甲辰蘇軾責授瓊州別駕移昌化軍安置范祖禹移賓州安置劉安世移高州安置己酉御集英殿策進士庚戌策武舉三月壬戌夏人犯麟州神堂堡出兵討之及進築胡山砦癸亥賜禮部奏名進士諸科及第出身六百九人甲子詔武舉謝師古等以遠人賜帛李惟岳以

高年賜帛丁卯詔瀘南安撫司南平軍毋擅誘楊光榮獻納播州疆土庚午夏
人大至葭蘆城下知石州張構等擊走之甲戌幸金明池丙子剋胡山新砦成
賜名平羌砦辛巳西上閣門使折克行破夏人于長波川斬首二千餘級獲牛
馬倍之壬午命官編類司馬光等改廢法度論奏事狀夏四月丁亥命諸獄置
氣樓涼窗設燧飲薦席柶械五日一浣繫囚以時沐浴遇寒給薪炭甲午熙河
築金城關丙申詔發解省試添策一道丁酉進編臣僚章疏一百四十三帙己
亥呂大防卒于虔州庚子知保安軍李沂伐夏國破洪州壬寅環慶鈐轄張存
入鹽州俘戮甚衆及還夏人追襲之復多亡失甲辰置克戎砦平夏城置靈平
砦丁丑以西邊板築有勞曲赦陝西河東路追貶王珪爲萬安軍司戶參軍己
酉復文德殿侍從轉對五月丁巳文彥博薨辛酉以皇太妃服藥及亢旱決四
京囚壬戌詔陝西添置蕃落馬軍十指揮丁卯廢衛州淇水第二馬監潁昌府
單鎮馬監辛未韓縝薨丁丑貶韓維爲崇信軍節度副使六月癸未朔日有食
之丁亥太白犯太微垣戊子宗楚薨丙申詔翰林學士吏部尙書各舉監察御

史二人丁酉環慶路安疆砦成詔防托蕃漢官賜帛有差甲辰熙河進築青石
峽畢工賜名西平乙巳保寧軍觀察留後宗漢爲開府儀同三司徙封安康郡
王己酉太原地震太白晝見秋七月壬子朔太白晝見八月乙酉封湖州觀察
使世開爲安定郡王丙戌鄜延將王愨復宥州戊戌封宗祐爲嗣濮王築威戎
城己酉彗出西方九月壬子以星變避殿減膳罷秋宴詔公卿悉心修政以輔
不逮求中外直言乙卯赦天下出元豐庫緡錢四百萬付陝西廣糴詔歸明人
未給田者舍以官舍戊辰彗滅癸酉謁中太一宮爲民祈福丙子御殿復膳命
宗景爲開府儀同三司己卯封婉儀劉氏爲賢妃冬十月戊戌宗景薨壬寅廢
安國安陽淇水監及洛陽原武監十一月丁卯詔諫議大夫以上各舉監察御
史一人癸酉貶劉奉世爲隰州團練副使柳州安置丁丑詔放歸田里程頤涪
州編管十二月癸未劉摯卒甲申曲宴遼使于垂拱殿乙酉侍御史董敦逸坐
奏對不實貶秩知興國軍是歲兩浙旱饑詔行荒政移粟賑貸出宮女二十四
人宣城民妻一產四男子于闐西南蕃羅氏入貢播州夷楊光榮等內附戶部

主戶一千三百六萬八千七百四十一丁三千三十四萬四千二百七十四客
戶六百三十六萬六千八百二十九丁三百六萬七千三百三十二大辟三千
一百九十二人

元符元年春正月庚戌朔不視朝丙寅咸陽民段義得玉印一紐甲戌幸瑞聖
園觀北郊齋宮二月丙戌白虹貫日庚寅詔建五王外第壬辰復罷翰林侍讀
侍講學士丁酉宗祐薨戊申知蘭州王舜臣討夏人于塞外築興平城三月壬
子令三省樞密吏三歲一試刑法甲寅開楚州通漣河丙辰米脂砦成丁巳五
王外第成賜名懿親宅戊午封宗漢爲嗣濮王殺朱崖流人陳衍壬戌申王似
端王佖並爲司空令太常寺與閣門修定刈麥儀乙丑詔翰林學士承旨蔡京
等辯驗段義所獻玉璽定議以聞戊辰吏部郎中方澤等坐私謁后族宴聚罰
金補外庚午幸申王府辛未幸端王府甲戌進封咸寧郡王僕爲莘王普寧郡
王似爲簡王祁國公偲爲永寧郡王丙子築熙河通會關夏四月庚辰世開薨
甲申幸睿成宮及莘王簡王府丙戌章惇等進神宗帝紀梁燾卒于化州壬辰

林希罷丙申建顯謨閣藏神宗御集庚子幸睿成宮壬寅學士院上寶璽靈光
翔鶴樂章癸卯詔學官增習兩經丁未曾布上刪修軍馬敕例五月戊申朔御
大慶殿受天授傳國受命寶行朝會禮己酉班德音于天下減囚罪一等徒以
下釋之癸丑受寶恭謝景靈宮戊午宴紫宸殿庚申詔獻寶人段義爲右班殿
直賜絹二百匹六月戊寅朔改元丙戌遣官分詣鄜延涇原河東熙河按驗所
築城砦甲午蔡京等上常平免役敕令秋七月乙卯詔增置大府丞一員乙丑
敕大禮五使自今並差執政官定爲令丁卯令學官試三經庚午詔范祖禹移
化州安置劉安世梅州安置王巖叟朱光庭諸子並勒停不敘壬申京師地震
八月丙子朔熙河蘭岷路復爲熙河蘭會路庚辰詔自今三省樞密院進擬在
京文臣開封推判官武臣橫班使副及諸路監司帥守並取旨召對丁亥詔侍
從中書舍人以上各舉所知二人權侍郎以上舉一人仍指言所堪職任九月
丁未以霖雨罷秋宴庚戌秦觀除名移雷州編管癸亥賜王安石第于京師冬
十月乙未詔武官試換文資丁酉以河北京東河溢遣官振恤己亥夏人寇平

夏城癸卯駙馬都尉張敦禮坐元祐初上疏譽司馬光奪留後授環衛官十一月壬戌朝獻景靈宮癸亥朝饗太廟甲子祀昊天上帝于園丘赦天下是歲澶州河溢振恤河北京東被水者真定府祈州野蠶成繭涇原路禽夏國統軍鬼名阿埋等高麗瞎征西南蕃張氏羅氏程氏入貢西蕃首領李訛嚙巴訛支呂承信等內附

二年春正月甲辰朔御大慶殿以雪罷朝羣臣及遼使詣東上閣門拜表賀羣臣又詣內東門賀如儀丁卯出內金帛二百萬備陝西邊儲二月甲戌朔令監司舉本路學行優異者各二人韋蕃入貢己卯詔許高麗國王遣士賓貢辛巳增置神臂弓詔自今應被旨舉官所舉不當具舉主姓名以聞甲申夏人以國母卒遣使告哀且謝罪却其使不納戊子鄜延鈐轄劉安敗夏人于神堆甲午大食入貢乙未詔吏部守令課績從御史臺考察黜其不實者三月丙辰遼人遣簽書樞密院事蕭德崇來爲夏人請緩師仍獻玉帶築環慶路定邊城丁巳秦鳳經略司言吳名韋率部族孳畜歸順詔名韋補內殿承制首領李嚙補右

侍禁及賜錢帛有差庚申知府州折克行獲夏國鈐轄令王皆保乙丑祈雨己巳莘王僕爲司空夏四月庚辰幸莘王府令廣西提點刑獄司兼領鹽事丙戌築鄜延河東路暖泉烏龍砦丁亥以旱減四京囚罪一等杖以下釋之辛卯詔鞠獄徒以上須結案及審錄審奏然後斷遣不如令者坐之癸巳封永嘉郡王偲爲睦王遣中書舍人郭知章報聘于遼丁酉築威羌城五月甲辰太白晝見庚戌築鄜延路金湯城癸亥奉遷真宗神御于萬壽觀延聖殿曲赦陝西河東路減囚罪一等流以下釋之建西安州及天都等砦乙丑進章惇官五等曾布三等許將蔡卞黃履皆二等辛未詔莘王僕睦王偲母進封婕妤六月庚辰賜蘭會州新砦名會川城甲午賜環慶路之字平曰清平關戊戌築定邊白豹城訖工閣門使張存等轉官賜金帛有差秋七月乙巳盛暑中外決繫囚丁未放在京工役庚戌河北河漲沒民田廬遣官振之甲子知環州种朴獲夏國監軍訛勃囉丙寅洸西安撫使王瞻復邈川城西蕃首領欽彪阿成以城降八月癸酉章惇等進新修敕令式惇讀於帝前其間有元豐所無而用元祐敕令修立

者帝曰元祐亦有可取乎惇等對曰取其善者甲戌太原地震戊寅皇太子生辛巳降德音于諸路減囚罪一等流以下釋之乙酉賜熙河路緡錢百萬撫納部族丁亥復修會州癸巳太白晝見瞎征降甲午建葭蘆戍爲晉寧軍丙申保寧軍節度呂惠卿特授檢校司空九月庚子朔夏人來謝罪癸卯命御史點檢三省樞密院並依元豐舊制甲辰幸儲祥宮乙巳幸醴泉觀丁未立賢妃劉氏爲皇后己未青唐酋隴拶以城降壬戌兩罷秋宴甲子右正言鄒浩論劉氏不當立特除名勒停新州羈管丙寅御文德殿冊皇后閏月癸酉置律學博士員詔詳議廟制以青唐爲鄯州隴右節度邈川爲湟州宗哥城爲龍支城俱隸隴右戊寅以廓州爲寧砦城丙戌果州團練使仲忽進古方鼎誌曰魯公作文王尊彝甲午熒惑犯太微垣左執法己未越王茂薨冬十月壬子詔河北大名十二州軍置馬步軍指揮以廣威保捷爲名甲寅日有食之既十一月丁亥詔綏德城爲綏德軍壬辰詔河北黃河退灘地聽民耕墾免租稅三年乙未詔諸州置教授者依太學三舍法考選生徒升補是月河中猗氏縣民妻一產四男

子

三年春正月辛未帝有疾不視朝丁丑奉安太宗皇帝御容于景靈宮大定殿
戊寅大赦天下蠲民租己卯帝崩皇太后諭遺制立弟端王卽位于柩前皇太
后權同處分軍國事四月己未上諡曰欽文睿武昭孝皇帝廟號曰哲宗七月
丁卯以諡號冊寶奏告天地宗廟社稷八月壬寅葬于永泰陵癸亥祔太廟崇
寧三年七月加諡曰憲元繼道世德揚功欽文睿武齊聖昭孝皇帝政和三年
改諡憲元繼道顯德定功欽文睿武齊聖昭孝皇帝

贊曰哲宗以冲幼踐阼宣仁同政初年召用馬呂諸賢罷青苗復常平登俊良
闢言路天下人心翕然向治而元祐之政庶幾仁宗柰何熙豐舊姦枿去未盡
已而媒孽復用卒假紹述之言務反前政報復善良馴致黨籍禍興君子盡斥
而宋政益敝矣吁可惜哉